

24
Milik Departemen P dan K
Tidak diperdagangkan
Untuk umum

Rangkiang Luluuih

Selasih

Direktorat
Kebudayaan

Departemen Pendidikan dan Kebudayaan

RANGKIANG LULUIH

DIREKTORAT KESENIAN	
SUB DIREKTORAT PENGEMBANGAN	
APREKASI DAN EFEKTASI SENI	
STASIUN KOMENTASI	
Klas/Kole	1123/85
- DPK	14 DES 1985
1123	
85	anaf : Ony

RANGKIANG LULUIH

Oleh
SELASIH

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1984

**Diterbitkan oleh
Proyek Penerbitan Buku Sastra
Indonesia dan Daerah**

, Hak pengarang dilindungi undang-undang .

KATA PENGANTAR

Bahagialah kita, bangsa Indonesia bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemiliharaan, pembinaan, dan penggalian sastra daerah jelas akan besar sekali bantuananya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemelihaaran kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Minang, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1984

Proyek Penerbitan Buku Sastra
Indonesia dan Daerah

DAFTAR ISI

Pengantar	9
Ringkasan Cerita	11
Kato Penganta	21
Motto untuk Rangkiang Luluih	24
Pambukak Kato	25
1. Rajo Angek Garang	27
2. Puti Pinang Masak	32
3. Baralek Turun Mandi	56
4. Puti Mayang, Taural	76
5. Mambujuak Puti Mayang Taurai	100
6. Sutan Maulano	113
7. Si Bongsu Urai	134
8. Bongsu Urai Dilarikan	144
9. Angek Garang Manghadang Koto Tuo	155
10. Puti Baduo dalam Rimbo	178
11. Bongsu Urai Pulang ka Koto Lamo	203
12. Bongsu Urai Mandurhako	215
13. Sutan Maulano Kawin dengan Mayang Taurai	231
14. Sutan Maulano Pulang ka Kampuang	240
15. Alek Gadang di Rangkiang Luluih	254

PENGANTAR

Buku yang berjudul **Rangkiang Luluih** dikarang oleh Selasih adalah sebuah Hikayat Klasik Minang yang melukiskan kejadian sebelum agama Islam masuk ke Minangkabau.

Kalau kita ikuti jalan ceritanya maka jelaslah menggambarkan bagaimana cara hidup orang sehari-hari pada waktu itu. Orang belum melakukan sembahyang dan puasa. Orang meminta bukan kepada Tuhan tetapi kepada alam yaitu bumi dan langit. Walaupun tuntunan agama belum ada, tapi banyak pelajaran yang dapat dipetik dari Hikayat ini. Misalnya seorang raja yang terlalu lalim dan seorang anak yang durhaka kepada kedua orang tua akan mendapat hukuman dari alam.

Bagaimana kesewenang-wenangan raja ini dengan apa yang diingininya, walaupun dengan cara kekerasan akan dilakukannya juga. Dia tidak segan-segan merampas anak gadis dari orang tuanya dan memperistri orang yang satu ibu dan satu ayah yang ditentang oleh adat pada masa itu karena hukum agama belum ada.

Semoga buku ini akan ada manfaatnya dan menambah Khasarahan Sastra Minang Kelasik khususnya dan Sastra Indonesia umumnya.

Jakarta, April 1984
Penyunting

RINGKASAN CERITA

Cerita yang berjudul Rangkaiang Luluih ini adalah sebuah hikayat yang diceritakan pada zaman sebelum masuk Islam ke Minangkabau. Tentang Nagari Rangkiang Luluih ini berada di daerah Kubang Tigo Baleh dekat negeri Koto Tuo.

Sebelum bernama Rangkiang Luluih negeri ini bernama Koto Lamo. Negeri ini diperintah oleh seorang raja yang bernama Raja Mangkuto Ameh.

Raja ini mempunyai sifat yang sangat buruk sekali dan sangat kejam tindakannya apabila kemauannya tidak dituruti. Oleh sebab itu orang banyak yang benci padanya dan memanggil dia dengan sebutan Rajo Angek Garang. Istrinya banyak tapi dia belum merasa puas dengan istrinya yang sudah ada dan masih menginginkan gadis-gadis yang baru tumbuh.

Di dekat Negeri Koto Lamo ini ada sebuah negeri yang bernama Koto Tuo yang diperintah oleh seorang raja yang bijaksana yang bergelar Tuanku Sati. Dia mempunyai tiga orang anak perempuan yang cantik-cantik. Yang paling tua bernama Puti Pinang Masak, yang kedua bernama Puti Mayang Taurai dan yang paling kecil bernama Bongsu Urai.

Dalam usia empat belas tahun Puti Pinang Masak dijemput oleh Raja Angek Garang akan dijadikan istri yang kesepuluh. Karena ayahnya takut akan terjadi keributan maka terpaksa dia melepas anaknya dengan perasaan sedih. Tidak lama Puti Pinang Masak menjadi istri Raja Angek Garang dia sudah sering disiksa dan dituduh main cinta dengan keponakannya Sutan Maulano. Karena kekejaman Rajo Angek Garang dan cemburu kepada keponakannya maka istrinya ditendang dan jatuh dari tangga yang menyebabkan dia meninggal seketika dengan meninggalkan seorang anak yang masih kecil. Bagaimana sedihnya hati ayah dan ibu Puti Pinang Masak mendapat berita meninggalnya putrinya itu. Raja Angek Garang juga berpura-pura sangat sedih dengan kematian istrinya dan dia tidak mau turun dari anjung.

Seratus hari sesudah meninggalnya Puti Pinang Masak, Raja Angek Garang akan mengadakan pesta turun mandi anaknya di

samping itu juga akan memberi nama.

Dalam pesta itu turut hadir Puti Mayang Taurai adik dari Puti Pinang Masak. Tujuan dari Raja Angek Garang mengadakan pesta ini ialah agar dapat memandang Mayang Taurai yang lebih cantik dari kakaknya dan masih gadis dan yang akan lebih banyak tampil dalam acara ini. Sebenarnya dalam hati Mayang Taurai sudah timbul pikiran yang tidak enak bahwa dirinya satu waktu akan diambil secara paksa oleh Raja Angek Garang akan dijadikan istri.

Belum sampai seminggu sesudah Raja Angek Garang berpesta sudah disuruh orang tua-tua menjemput Puti Mayang Taurai. Sebelum orang Koto Lamo datang, Mayang Taurai sudah mengeluarkan semua perasaannya kepada ibunya bahwa dia tidak mau bersuamikan Raja Angek Garang karena sifat-sifatnya yang sangat jahat dan kejam.

Dia sudah tahu bahwa meninggalnya kakaknya Puti Pinang Masak dibunuh oleh raja itu yang diceritakan oleh Sutan Maulano keponakannya sendiri. Ibunya menceritakan kepada Mayang Taurai bahwa dialah yang mula-mula dipinang oleh raja ini tapi ditolaknya. Bukan main marahnya Raja Angek Garang ini dan dia bersumpah kalau dia tidak dapat anaknya akan diambilnya juga. Maka dibujuknya Mayang Taurai agar mau apabila orang datang meminang.

Dua hari kemudian datanglah orang meminang Mayang Taurai yang dijawab oleh ibu dan ayahnya akan menanyai Mayang Taurai terlebih dahulu. Waktu utusan raja kembali menghadapnya bukan main marahnya raja karena tidak berhasil pinangannya. Dengan perasaan marah sehari itu juga dia pergi mengambil Mayang Taurai dengan paksa dan dititipkan pada kakaknya Nilamcayo menjelang diadakan pesta perkawinannya.

Dia selalu membujuk Mayang Taurai dengan kata-kata yang muluk dan akhirnya Mayang Taurai sudah menurut saja. Di luar dia tidak kelihatan lagi marahnya kepada Raja Angek Garang dan tiap hari Mayang Taurai dilihatnya ke tempat kakaknya Nilamcayo.

Dalam pada itu dia menyiapkan akan melakukan perkawinannya dengan Puti Mayang Taurai yang akan dilaksanakan lebih meriah

dari perhelatannya dengan Puti Pinang Masak.

Sesudah beberapa tahun perkawinannya dengan Puti Mayang Taurai Raja Angek Garang memang memperlihatkan kasih sayangnya kepada Mayang Taurai tidak seperti dengan istri-istrinya sebelum ini. Tapi sesudah empat tahun perkawinannya kasih Raja Angek Garang mulai agak pudar.

Mayang Taurai mempunyai adik yang bernama Bongsu Urai yang sering datang ke tempatnya bahkan kadang-kadang sampai seminggu. Bongsu Urai ini memang lebih cantik dari Mayang Taurai tapi masih sangat kecil.

Rupanya dasar Angek Garang ini mata keranjang walaupun anak itu masih kecil tidaklah menjadi penghalang baginya untuk memikat anak ini dengan bermacam-macam cara yang menyebabkan anak itu cepat matang. Dia diberi bermacam-macam hadiah berupa perhiasan dan lain-lain. Dia sangat merasa manja dengan kakak iparnya ini. Apabila permintaannya tidak dikabulkan dia akan menangis dan menjerit-jerit. Mayang Taurai sudah merasa muak melihat tingkah adiknya dengan suaminya. Dengan diam-diam dia menyuruh Puti Nilamcayo melaporkan kelakuan adiknya dengan Bongsu Urai kepada ibunya. Betapa kagetnya ibu Mayang Taurai mendengar ini karena selama ini dia menganggap bahwa Mayang Taurai adalah satu-satunya istri yang disayangi Angek Garang. Untuk mengatasinya maka ibu dan ayah Mayang Taurai berusaha untuk membatasi hubungan Bongsu Urai dengan Angek Garang. Lama kelamaan Raja Angek Garang tahu juga bahwa mengapa Bongsu Urai tidak datang-datang lagi, lalu dia memerintahkan untuk menjemput Bongsu Urai kepada Manti Tuu.

Ayah dan ibu Bongsu Urai berunding akan menyingkirkan Bongsu Urai ke negeri Sungai Pagu dan dia sendiri yang akan mengantarkan dengan jalan membohongi Bongsu Urai bahwa akan diantar ke Koto Lamo, agar dia mau mempersiapkan diri. Sesudah selesai ia dibawa ke hutan tempat Tuanku Sati bertapa. Bongsu Urai menjerit-jerit dan minta diantar ke negeri Koto Lamo dan dalam tangisnya dia mengatakan bahwa dia berjanji akan kawin dengan Angek Garang.

Tuanku Sati sesudah mengantarkan Bongsu Urai ke dalam hutan,

kembali ke istana untuk mengambil perbekalan.

Sementara itu Angek Garang sudah tidak sabar menunggu kedatangan Puti Bongsu Urai dan dengan segera dia berangkat menuju Koto Duo kemudian memeriksa istana yang sudah tidak ada orangnya. Sesudah dia memeriksa istana datanglah Tuanku Sati, maka terjadilah pertengkarannya dengan Angek Garang, dalam pertengkarannya itu Tuanku Sati dilawan oleh anak buah Angek Garang sebanyak 13 orang yang menyebabkan Tuanku Sati kalah dan dia berpura-pura mati.

Kemudian istana dibakar oleh Angek Garang, Manti Duo menyatakan bahwa Raja Tuanku Sati sudah meninggal dan menjelang dia meninggal dia berpesan agar kita menyerah saja kepada Angek Garang.

Puti Pamato Intan dan Puti Bongsu Urai semenjak diantarkan ke hutan tidak ada lagi yang bisa menemuinya karena dia sudah pergi dari tempat semula untuk mencari air dan makanan hingga jauh tersasar ke dalam hutan. Bongsu Urai selalu menangis dan memaki-maki ibunya, dan apa makanan yang sudah didapat oleh ibunya bukannya dimakan tapi dibuangnya. Demikianlah pekerjaan mereka sehari-hari sampai mereka ditemukan oleh orang pencari kayu yang menyangka mereka itu Mambang Rimba karena mulanya melihatnya mereka itu lari. Tapi akhirnya mereka tahu juga bahwa mereka memang manusia dan kemudian pencari kayu itu menanyakan mereka dari mana asalnya dan mengapa sampai tersasar ke dalam hutan. Kedua orang itu kemudian dibawa oleh pencari kayu ke kampungnya, tapi Bongsu Urai tidak mau dan minta diantarkan ke negeri Koto Lamo. Permintaan Bongsu Urai tidak diacuhkan oleh ibunya dan mereka terus berjalan akhirnya Bongsu Urai mengikuti juga dari belakang.

Untuk sementara Pamato Intan ditampung di rumah orang yang menemukannya di hutan dan dia membantu-bantu pekerjaan orang itu. Mereka dibuatkan gubuk oleh orang-orang kampung Selasih diberi alat perabot yang dibutuhkan sehari-hari.

Puti Pamato Intan berusaha mencari penghidupan sendiri, sedang anaknya Bongsu Urai tidak mau membantu sama sekali, kerjanya hanya makan dan tidur saja.

Sesudah 6 bulan mereka tinggal di kampung Selasih ada orang Koto Tuo datang ke daerah itu dan diajak singgah oleh Pamato Intan ke rumahnya. Orang itu menceritakan keadaan Koto Tuo selama ditinggalkan Pamato Intan yaitu banyak perampok dan pembunuhan. Bongsu Urai mendengar percakapan orang itu dengan ibunya lalu dia meminta diantarkan ke Koto Lamo tapi ditolak.

Setelah setahun Pamato Intan di kampung Selasih kehidupannya sudah agak baik, di samping bertani dia juga membuka warung.

Pada suatu hari datang dubalang Koto Lamo akan minum kopi di warungnya. Dubalang itu adalah suruhan Raja Angek Garang untuk menjemput Bongsu Urai. Mula-mula Pamato Intan tidak mau menceritakan siapa dia sebenarnya. Tapi percakapan ini didengar oleh Bongsu Urai kemudian keluar dari rumah dan berkata dengan lantang bahwa dialah Bongsu Urai. Setelah lama ibunya bertengkar dengan Bongsu Urai, akhirnya dilepasnya juga Bongsu Urai dengan dubalang itu berangkat ke Koto Lamo. Dia berpesan kepada dubalang agar kepada rakyat Koto Lamo dikatakan bahwa dia telah mati kecuali kepada Mayang Taurai.

Sesudah Bongsu Urai dibawa oleh dubalang, tinggallah Pamato Intan seorang diri. Waktu siang masih banyak kawan untuk bersenda gurau tapi kalau sudah malam badan terbaring sendirian.

Bermacam-macamlah pikiran yang timbul bagaimana nasibnya sekarang. Kemudian dia teringat bagaimana dosanya terhadap kedua orang tuanya ketika dia menolak akan dikawinkan dengan Angek Garang dahulu. Tapi sebelum ayah ibunya meninggal dia sudah minta maaf.

Setelah beberapa lama hidup sendirian, dia berkeinginan untuk pergi ke Koto Lamo karena sudah sangat rindu kepada anak-anaknya terutama kepada Mayang Taurai.

Hal ini disampaikannya kepada orang yang mula-mula menampung dia tapi orang itu melarangnya, akan tetapi karena keinginannya tidak bisa ditahan lagi, akhirnya dia dilepas juga ke Koto Lamo.

Sebulan setelah Bongsu Urai sampai di Koto Lamo dia sudah

minta kepada raja agar segera dilaksanakan perkawinannya dengan raja dan permintaannya itu dikabulkan. Waktu akan dilaksanakan perkawinan Bongsu Urai dengan Angek Garang, Mayang Taurai lari dari istana dengan membawa anaknya.

Pada waktu Pamato Intan sampai di istana sebenarnya dia sudah dilarang oleh salah seorang pegawai istana, karena apabila raja sampai tahu dia datang dia akan dibunuh oleh raja, tetapi dia tidak memperdulikan larangan itu biarpun akan mati.

Sesudah masuk ke halaman istana dengan diam-diam dia mendekati Puti Bongsu Urai yang sedang berada di halaman dan dengan suara lantang dia berkata bahwa dia datang ke sini untuk meminta padi karena kelaparan. Bukan main terkejutnya Bongsu Urai mendengar suara orang ini karena dia kenal betul bahwa suara orang itu adalah suara ibunya. Walaupun Bongsu Urai mengetahui orang ini ibunya namun dengan sikap kasar diusirnya ibunya yang berpura-pura sebagai peminta-minta itu. Karena orang tua ini tidak mau juga pergi maka disuruhnya dayang-dayang mengambil kerak basah untuk diberikan kepada ibunya. Dengan perasaan sedih dimakannya kerak itu sambil menadahkan tangannya ke langit memohon agar anaknya yang durhaka ini dikutuk oleh langit dan bumi. Belum habis dia bermohon datanglah halilitar menembak rangkiang dan langsung habis ditelan bumi demikian bertubi-tubi sehingga rangkiang itu tenggelam semuanya. Orang-orang pada berlarian dan Bongsu Urai mengejar ibunya akan minta ampun. Kemudian datang suaminya dan dibawanya Bongsu Urai ke atas istana sedangkan orang-orang yang berada di istana semuanya turun. Tidak lama setelah mereka hanya tinggal berdua dalam istana maka istana itupun tenggelam pula ke dalam bumi. Dari kejauhan terdengar suara Bongsu Urai memanggil-manggil ibunya. Seharian itu tidak ada orang yang ingin pulang melihat kejadian yang sangat mengerikan itu. Kemudian Datuk Manti Tuo menjelaskan bahwa kejadian ini disebabkan oleh sifat raja yang sangat kejam dan keji sehingga bumi dan langit mengutuknya begitu juga perbuatan dari Bongsu Urai yang durhaka kepada ibunya. Semuanya ini akan menjadi suri tauladan bagi yang mudah-muda.

Setelah kejadian di istana berlalu beberapa lama, Puti Pamato Intan menanyakan keadaan anaknya Puti Mayang Taurai, oleh Puti Nilam Cayo kakak dari Aniek Garang diceritakanlah bahwa pada waktu perkawinan Bongsu Urai dengan Aniek Garang, Mayang Taurai disuruh pergi ke tempat Sutan Maulano. Karena Nilam Cayo tahu bahwa Mayang Taurai dan Sutan Maulano sudah lama mengikat kasih. Walaupun Sutan Maulano sudah mempunyai istri tapi orang-orang menginginkan agar Sutan Maulano mau memperistri Mayang Taurai dan dilaksanakanlah perkawinan itu. Kini raja Koto Lamo sudah tidak ada lagi maka orang-orang bermaksud menjemput Sutan Maulano untuk dijadikan raja dan Mayang Taurai akan dijadikan ibu suri.

Karena negeri Koto Tuo istananya sudah terbakar dan negeri Koto Lamo istananya sudah ditelan bumi maka Sutan Maulano mengajurkan agar kedua kerajaan itu bersatu dan anjuran itu pun disetujui oleh rakyat banyak, kemudian kedua kerajaan yang bersatu itu diberi nama negeri Rangkiang Luluih.

Untuk memulai kehidupan baru dalam dua bagian yang sudah dilebur menjadi satu maka diadakanlah perhelatan yang diselenggarakan oleh rakyat dengan perasaan tulus dan gembira.

Demikianlah uraian singkat mengenai Negeri Rangkiang Luluih.

--) --

RANGKIANG LULUIH

Kato Penganta

Jiko diterimo
Lah tigo malah naskah ambo
Dalam bahasa Minang iko
Nan sampai ka tangan Proyek
Iyo penerbitan
Sastera Indonesia dan Daerah

Dalam legenda nan ambo tulih
Ambo **sambiakan itu garan**
Caro manulih **bahaso Minang**
Dan lah biaso dari dahulu
Iyo balain tu saketek
Dari nan biaso kito danga
Dari **muluik nyo urang Minang**
Dalam bakato hari hari

Kalau **disabuik ari ari**
Iyo di tulih iyo hari hari
Baitu jo nan lainnya
Hati hujan – hulu sabainyo
Baitu awalan jo akhiran
Iyo di pakai itu garan
Dalam bahaso nan usali
Manga, sia, kama, sabagainyo
Asalnyo iyo mangapo, siapo sataruihnyo
Tamabahan pulo itu dangai
Kok kito danga nan **disabuik**
Indak ado patokan kito
Nan mano bahaso sabananyo
Tiok luhak lain sabutannya
Kadang kadang tiok nagari
Ado pulo nan tiok kampuang

Ambo iyo urang Minang
Di gadangkan di tanah Minang
Tapi adomah sakali

Ambo pai kakampuang ketek
Urang gaek nan elok baso
Batanyo inyo garan ka ambo
Pio kiko naak?
Tacangang ambo maso itu

Batanyo padō kawan ambo
Apo garan kan jaweknyo
Patang ciek lai ndeh
Pio baliak ka itan naak?
Bisuak ciek lai ndeh
Kalamari ado kito pakai
Baitu luso biaso juo
Patang ciek lai bisuak ciek lai
Labiah biaso tu tampaknyo

Sabagai pulo itu garan
Nan alah ambo katangahkan
Di naskah ambo nan daulu
Iyo caro mamancang galanggang
Kaduo caro batunangan
Katigo caro nikah kawin
Caro baparang rang saisuak
Alah pulo ambo katangahkan

Dalam naskah nan kiniko
Samaso Islam alun masuak
Handak ambo bari tau pulo
Iyo kaurang mudo-mudo
Baapo caro rang saisuak
Iyo baralek kamatiān
Sarato baralek turun mandi
Akhianyo baralek naiak nobaik

Kok ado juo lai tanago
Handak ambo karang itu garan
caranyo urang rajo rajo
Manulak urang bukan rajo

Untuak manjadi manantunyo

Baapo bana kayo urang tu

Bak mano pulo rancak urangnyo

Namun samando karumah rajo

Satu pantañgan maso daulu

Kok iyo sabaliaknyo

Indak baapo itu garan

Panah juo di buek urang

Kan ambo jalehkan ko isuak

Dalam kisah Bujang Piaman

Nan tapikek ka anak Rajo

Nan banamo si Payuang Lauik

Samo rancak keduonyo.

Samoga kaba ditarimo

Untuak panambah kaba lamo

Iyo dalam Pustaka Kito

Hari di ambo laruik patang

Lah sanjo bana tu mah garan

Kok nan bawenang itu dangai

Manantik nan labiah rancak

Indak kan mungkin tu rasonyo

Mangalia dari ujuang pena ambo.

Pekanbaru,
5 Februari 1983

S E L A S I H

Motto untuak Rangkiang Luluih

Tuhan mampaliekkan pada kito
Baapo bencinyo Tuhan garan
Pado urang nan durhako
Banyak salah dibuek urang
Tapi durako maninggakan tando
Jadi pangaja ka nan tingga

Di tanah Minang iko sajo
Kito mandanga kaba nyato
Tantang si Buyuang Malin Kundang
Tantang si Bincik nan bakudo
Tantang si **Kudun ngalau kamang**
Iyo si Togok Batu Batuduang
Nakhoda Lancang Gunuang Sahilan
Nan tajadi di lipek kain
Pado maso daulunyo iyo urang Minang juo

Rangkiang nan kini ko
Iyo ulah si Bongsu Urai
Anak durako ka mandehnyo.

PAMBUKAK KATO

Takana di hati nak bakaba
 Kaba lamo kaba rang saisuak
Di zaman apo itu garan
 Indak tarang indaklah jaleh
Kaba nan indak batulihkan
 Dari muluik ka muluik sajo
Baruntun dari niniak moyang
 Dari moyang turun ka unyang
Dari unyang sampai ka anduang
 Dari anduang ka andeh kito
Dari andeh turun ka ambo

 Kaba lamo kaba rang daulu
Antah iyo antah tido
 Susahlah kito manantukan
Tapi nan jaleh itu kini
 Tando tandonyo ado lai.

Kaba banamo Rangkiang Luluih
 Rangkiang punyo Bongsu Urai
Bongsu Urai anak cilako
 Anak durako ka mandehnyo
Inyo lah luluih jo rumahnyo
 Rangkiangnyo panuah jo padi
Itu garan nan jolong tajun.

I. RAJO ANGEK GARANG

Di Zaman tajadi carito ko
Urang alun tau jo Allah
Alun **abeh** tu dek rang banyak
Siapo itu Muhammad saw.
Indak tasabuik di carito ko
Urang alun lai sambayang jo puaso
Inyo mamintak ka nan sakti
Bakandak bakeh nan batuah
Manyambah nan ganjia-ganjia
Takuik ka urang nan kuaso

Tantang nagari Rangkiang Luluih
Iyo di daerah Kubung Tigo Baleh
Dakek Supayang itu garan
Indak barapo jauah bana
Dari nagari Koto Tuo

Pada maso daulunyo
Sabalun banbamo Rangkiang Luluih
Nagari banamo Koto Lamo
Saparentah Rajo Angek Garang
Tantang dek Rajo Angek Garang
Namo pameo itu garan
Iyo dek urang mudo-mudo
Namo sasuai jo kurenah
Kurenah Tuanku Angek Garang

Tantang namonyo sabananyo
Iyo Rajo Mangkuto Ameh
Bini banyak anaknyo banyak
Indak jaleh namo surang-surang

Kaik bakaik bak rotan sanik
Iyo jo urang bakululiang
Iyo di daerah Gunuang Salasiah
Sakita Gunuang Pantai Camin

Tapi indak ado urang nan suko
Bakawan bana jo inyo
Urang banci urang berang
Dek kurenahnyo maningkahak

Ado pada suatu maso
Katiko inyo sadang berang
Sadang berang sadang maradang
Tahadap urang bawahannyao
Karano ado nan barani
Iyo manyanggah parentahnyao

Bakato inyo maso itu
"Japuik juo paja mantun
Bawo sakali jo andehnyao
Usah pulo disabuik-sabuik
Denai nak kawin jo anak tu"

Manyambah garan maso itu
Iyo Datuak Kapalo Suku
Urang gadang dalam nagari
Urang nan buliah bakuaso
Urang nan buliah manggantikan
Manggantikan rajo mamarintah
Kok rajo sakik ngilu paniang
Atau pai ka nagari lain

Ampun Tuanku Rajo kami
Usah dijapuik paja nantun
Adiak kanduang dek Andeh Suri
Iyolah Puti Mayang Taurai
Indak buliah manuruik adaik
Iyo Tuanku kawin jo inyo

Sabagai pulo itu garan
Inyo nan baru ketek bana
Jiko ambo etong-etong
Alunlah sampai itu garangan
Duobaleh taun padi

"Tantang ndak buliah manuruik adaik
Kan denai nan mamacik adaik
Siapo urang nan malarang
Siapo urang nan ka berang
Iyo di dalam nagariko

Tantang urang bakuliliang
Mangapo inyo ka sato pulo
Denai dalam nagari denai
Indak sangkuik pauik jo inyo
Siapo mancubo manghalangi
Denai parangi denai rambah
Inyo sarato rakyaknyo

Dek inyo ketek baru tu
Indak mangapo itu dangai
Bawo sajo inyo kamari
Katokan ka urang banyak
Inyo **manuruik** dang kakaknyo
Iyo Puti Mayang Taurai

Jikok baitu kato Tuanku
Ambo suruah urang pai
Pai manjapuik pajā nantun
Ka nagari Koto Tuo

Tapi sabuali itu dangai
Usah Tuanku buek juo
Nan malangga adai nagari
Nan buruak padō urang banyak

Sajak dibunuah Puti Tuo
Kakak Puti Mayang Taurai
Iyolah Puti Pinang Masak
Nagari kito kanai tulah
Kanai sumpah urang daulu
Iyolah niniak moyang kito
Datuak **Parpatiah** nan Sabatang

Sarato Datuak Katumangguangan
Sajak maso katiko itu
Lah limo taun sampai kini

Padi nan indak namuah tumbuah
Hari paneh sapanjang maso
Buah buahan indak babuah
Taranak lah kuruih-kuruih
Kumpuik kuniang bakapanjangan”

’Mangapo denai disalahkan
Iyo dek ari mah nan salah
Inyo indak amuah ujan
Cari malah dukun nan pandai
Suruah inyo manurunkan ujan”

”Lah banyak dukun nan karajo
Iyo manyuruah ujan turun
Kandaknyo lai mah balaku
Ujan turun sadirau sajo
Barisuak kariang karontang
Labiah angeknyo itu garan”

”Dimano-mano rang mambunuah
Rang marampok rang mandabiah
Itan di bukik Tambun Tulang
Iyo di hutan Rimbo Panjang
Mangapo nagarinyo indak kariang
Kok iyo mambunuah tu nan salah”

”Lorong di urang nan mambunuah
Itan di Bukik Tambun Tulang
Atau di utar Rimbo Panjang
Iyo urang jahek urang ino
Iyo urang di bawah lutuik
Bukanlah urang nan disambah”

”Banyak bana coroteh Datuak
Usah denai disalahkan

II. PUTI PINANG MASAK

Kaba baraliah kini lai
Sungguah baraliah sinan juo
Tasabuik nagari Koto Tuo
Dakek nagari Koto Lamo tu
Nagari elok rajonyo baiak
Sawah laweh ladangnyo leba
Tabek ikan mamparancak koto
Dek aianyo janiah-janiah

Labuah jambatan elok pulo
Rumah-rumah banyak nan gadang
Rangkiang balirik tiok rumah
Panuah dek padi sagalonyo

Sado urang bagadang ati
Di bawah parentah Rajo Tuo
Nan bagala Tuanku Sati
Urang nan cadiak candokio

Lai tu arih bijaksano
Inyo kuat pulo batarak
Batarak karimbo gadang
Tiok bulan sagadang sabik

Salamo sahari dua hari

Tasabuik dalam carito
Kini ko inyo rusuah bana
Mamikiakan uantuang anak nyo
Nan banamo si Bongsu Urai
Anak bongsu timbunan sayang
Maningkek gadih inyo tu kini.

Mako banamo nyo si Bongsu
Dek kakaknyo ado baduo
Nan tuo banamo Pinang Masak
Nan tangah banamo Mayang Taurai

Janganlah denai diajari
 Lah cukuik mamakan garam
Kato denai nan ka didanga
 Parentah denai ka dituruik
Kok lai sayang di dunia ko
 Kok ibo di kapalo
Nan ka bacarai jo badan”

”Ampunlah ambo padu Tuanku
 Mangko ambo namuah mangecek
Ambo ko jauah labiah tuo
 Suami kakak kanduang Tuanku
Iyolah Puti Nilam Cayo
 Parentahkan ambo turuik juo
Asa Tuanku ndak manyasa
 Manyasa isuak kamudian
Ambo indak amuah sato
 Kanai **kutuaknyo niniak moyang”**

”Denai tagak di kaki denai
 Denai indak manggaduah urang
Denai nan indak mintak tolong
 Denai **manyuruah mamarentah**
Mangapo denai kan manyasa”

Anak nan rancak katigonyo
Jarang bandingan di alamko
Lorong dek Puti Pinang Masak
Baumua ampek baleh taun.

Sadang masak tu rancak nyo
Dijapuik Rajo Angek Garang
Dijadikan bini ka sapuluah
Dek inyo alah cukuik tuo
Sambilan bini dipakainyo

Bukan dijapuik elok-elok
Inyo dijapuik dengan pakso
Kok indak namuah maagiahkan
Nagari diparanginyo
Anak rakyat susah sajo
Dek ibo pado rakyat
Cameh nagari nan kan hancua
Anak kanduang si birian tulang
Disarahkan dek Rajo Tuo
Disarahkan jo hati ibo
Dilapeh jo ratok tangih
Iyo dek inyo laki bini
Dengan Puti Andeh Suri
Nan banamo Pamato Intan

Indak lamo Puti Pinang Masak
Di ustano Rajo Angek Garang
Baru sajo baranak ciek
Inyo diasab tiok hari
Iyo dek rajo nan ganeh tu
Dikatokan inyo main mudo
Jo urang Sutan Maulano
Kamanakan Rajo Angek Garang
Nan sabana pakaronyo
Bukan tu salah urang baduo
Ulah asungan bini tuo

Iyo bini Rajo Angek Garang
Nan kalua dari ustano
 Sangkek datang si Pinang Masak

Lorong ka Sutan Maulano
 Dek inyo badakek rumah
Tingganyo di rumah gadang juo
 Bahadapan ju ustano
Tantu tacaliak kadang-kadang

Tasirok darah di dadonyo
 Maliek rançak bini mamaknyo
Maalum mudo samo mudo
 Tantangan Puti Pinang Masak
Baa bana takuik ka laki
 Maliek rang mudo nan mamandang
Tantu tatagak gak sajanak
 Darah mudo naiak ka muko

Lah labiah garan duo taun
 Si Pinang tangga di ustano
Alun panah sakali juo
 Basautan kato jo paja tu
Iyo urang Sutan Maulano
Tapi sakali nan kudian
 Dek nan lain indak nan tampak
Sutan Maulano masuak ustano
 Batanyo inyo ka amainyo
Iyolah Puti Pinang Masak

”Ampun Tuanku amai kanduang
 Bari bana ambo batanyo
Lai koh siko andeh ambo
 Urang kampuang datang ka rumah
Andak basuo jo Liau tu
 Lah lamo inyo mananti”

Manolah Sutan nan batanyo
Indak ado kakak ka rumah
Dalam sahari duo nangko
Alun abih kato dikatokan
Kalua garan Angek Garang
Dari sarambi rumah gadang
Kalua jo sirah muko

”Mano ang Buyuang Maulano
Bagak bana waang garan
Barani bana waang kironyo
Bamain mudo jo bini urang
Mamak ang kontan ko mah Buyuang.

Lah banyak urang nan mangecek
Denai juo indak picayo
Bapak ang Kapalo Suku
Rang tuo nan cadiak pandai
Andeh ang kakak kanduang denai
Buyuang babuek macam itu

Barangkek ang dari nagari ko
Tinggakan nagari Koto Lamo
Kok ang lai sayang di badan ang
Usah diinjak-injak juo”

Manyambah sanan Sutan Maulano
”Ampunlah ambo Mamak kanduang
Indak ado ambo basalah
Ambo datang batanyo sajo
Andeh ambo kok lai siko”

”Mangapo ka inyo ang batanyo
Mangapo indak masuak sajo
Andeh ang di ruang tangah
Sadang mengeceknyo jo ambo

Sadang dek Puti nan rancak ko
Awak lah jaleh bini urang

Dek nak mangecek panjang-panjang
Baduto pulo inyo kini
Mangatokan andeh ang indak di siko”

Manjawek si Pinang maso itu
Ampun Tuanku rajo kami
Ambo sabana indak tau
Bahaso kakak di rumah ko
Ambo turun dari anjuang
Taruih sajo ka sarambi
Indak ambo maliek-liek
Iyo ka suok jo ka kida

Ari dek baru pagi bana
Kalam juo di tangah rumah
Indak manyangko ambo garan
Urang lah ado tu nan naiak”

”Pandai kau menjawek kato
Baduto sapanjang panjangnya
Manokan mungkin itu garan
Kami duduak di ruang tangah
Wakatu kau turun dari anjuang
Indak ba mato kau garan
Kau nan indak kan maliek”

”Ampunlah ambo Rajo Gadang
Ka ambo acok di kecekan
Mato aruuh ambo piaro
Maliek iyo sakadanyo
Sakada nan paralu sajo
Usah mato dibukak bana
Kok suko maliek kida suok
Mato ambo ka dicukia
Takuik lah ambo tantang itu”

”Usah kau manjawek juo
Urang mudo ko tampak dek kau

Untuak inyo ado mato kau
Iko mah bagian kau”

Si Pinang ditarajang maso itu
Iyo ka tanggo rumah gadang
Baguliang-buliangnya ka tanah
Mamakiak sakuak kuaiknyo
Mintak tolong padonan maliek

Bagarak Sutan Maulano
Handak manolong rang nan jatuah
Inyo pulo kanai tarajang
Jatuah maimpik Pinang Masak

Dek inyo urang laki-laki
Jatuah indak sampai ka batu
Indak bara inyo kasakitan
Bagarak inyo lalu tagak
Nyo uluakan dang tangannya
Handak manolong Pinang Masak

Untuang tampak dek andehnya
Bakato andeh maso itu
“Usah ang awai amai ang tu
Indak itu karajo ang
Banyak nan lain kan manolong
Bakirok waang dari siko”

Lah pai garan Sutan Maulano
Indaknyo pulang ka rumahnya
Pai sajo nyo jauah-jauah
Takuik dicari dang mamaknya

Tasabuik Sutan Maulano tu
Urang rancak kurenah elok
Tampan anggun dipandang mato
Amuah bagua jo rang banyak
Suko manolong urang kurang
amuah pulo inyo garan

Bakarajo di sawah ladang
 Basamo urang sarayo
Nan bakarajo untuak ayahnya
 Dek ayahnya Rajo Gumanti
Indak dapek inyo kasawah

Sutan Maulano tumpuan sayang
 Indak sajo dek ayah jo bundonyo
Tapi dek urang sanagari
 Laki-laki parampuan
Sayang jo kasiah bakeh inyo

Lorong mamaknya Angek Garang
 Indak suko inyo garan
Iyo kapado kamanakan ko
 Inyo tu camburu sajo
Sabab nan patuik manggantikan
 Iyo manjadi Rajo Koto Lamo
Indak lain indak bukan
 Salain Sutan Maulano ko

Inyo lai mandanga juo
 Kecek-kecek di dalam kampuang
Nan disampaikan pandeka rajo
 Urang nan jadi mato-matonyo
Urang manyabuik parangainyo
 Sarato mamuji Sutan Maulano

Kilek camin alah ka muko
 Kilek baliuang lah kakaki
Dek itu inyo banci bana
 Kapado Sutan nan rancak ko

Pado katiko itu garan
 Sadang inyo **duduak barundiang**
Jo kakaknya Puti Nilam Cayo
 Mamintak pado kakaknya
Supayo disuruaht itu garan
 Sutan Maulano pai jauah

Sabab tasabuik dalam tanuang
Kok inyo di nagari tu juo
Nagari kan hancua luluah
Dek Maulano urang sial

Tantang dek Puti Nilam Cayo
Bia inyo dunsanak kanduang
Iyo dek Rajo Angek Garang
Tapi budinyo lai aluiah
Dek atinyo lai elok
Bak talago di bawah gunuang
Aia nyo janiah ikannya jinak
Urang cadiak urang jawari
Tampek basanda ambo rakyat

Alah mah tau inyo garan
Apo bana itu kini
Nan dimukasuik dek adiaknyo
Tapi inyo aniang sajo

Alun sudah urang barundiang
Tajadi garan nan ndak elok
Iyo nan kito sabuik cako
Dek itu muluiknyo lah tadorong
Manyuruah bakirok dang anaknyo

Diimbaunyo urang di ustano
Manyuruah angkek Pinang Masak
Inyo balari karumahnyo
Pai mancari Sutan Maulano

Dicari karuang tangah
Dicari kaateh anjuang
Anjuang kida anjuang suok
Indak tampak Sutan Maulano

Manangih garan Nilam Cayo
Dicari anak ka lapau
Katampek inyo biaso duduak

Bakato garan urang lapau
Lai malah inyo maliek
Yo Sutan tu sadang bajalan
Bajalan ka mudiak labuah

Batanyo inyo ka urang lain
Sarupo juo mah jaweknyo
Rusuah lah ati Nilam Gayo
Dek lamo lambek bajalan
Manuruikkan jajak anak kanduang
Lah panek rasonyo kaki
Anak nan tido tampak juo

Hari batambah paneh juo
Babaliak pulang inyo lai
Kababarito ka lakinyo
Iyolah Datuak Manti Tuo

Lah tibo inyo di rumah
Kakilah bangkak dek bajalan
Datuak Tuo indak ado pulo
Baguliang inyo di sarambi
Manangih inyo kareh kareh
Maratoki untuang parasiaan

”O nak kanduang sibiran tulang
Jarek samato Bundo Kanduang
Kamano garan Buyuang pai
Mangapo denai ditinggakan
Tadorong sajo muluik andeh
Manyuruah Buyuang bakirok
Indak tu datang dari hati
Denai dek berang ka mamak ang

Kan gadang hati inyo garan
Iyo Mamak ang Mangkuto Ameh
Itu bana **nan dikandaknyo**
Itu bana nan di hatinyo
Iyo ang pai dari siko

Sakik matonyo maliek ang
Padiah hatinyo mancaliak ang
Iyo dek buyuang alah gadang
Alah buliah manjadi rajo

Sadang inyo maratok tu
Datang saurang dayang-dayang
Iyo dari rumah usang
Rumah gadang ustano Rajo
Jo tangih inyo mangecek
Ampunlah ambo Bundo Kanduang
Lakehlah bundo ka ustano
Rajo kito sadang mangamuak
Kamiko andak dibunuahnyo
Dek kami banyak nan manangih
Manangisi Tuanku Puti Mudo
Nan dilapuak nan ditampa
Dek mintak tolong marauang-rauang

Mukonyo cakuak dek tahampeh
Iyo di batu tapak janjang
Pinggangnyo mungkin patah juo
Inyo mamakiak mintak anaknyo
Nan manangih kalaparan
Inyo pulo nan kanai tapuak
Macam urang andak mambunuah
Baitu laku rajo kito”

Baapo bana padiah hati
Dek anak lah lari habih
Antah kamano inyo pai
Alun lai makan dari pagi
Takana juo bana dek inyo
Untuak mancaliak anak urang
Iyolah Puti Pinang Masak
Tantang dek Puti Nilam Cayo
Tau bana inyo garan

Iyo kurenah dang adiaknyo
Kok inyo alah naiak darah
Berangnyo baruntun runtun
Galemak peak suok kida
Indak ado saba padonyo
Indak pandai manahan hati
Muluik lapeh tangannyao lapeh
Kakinyo sato pulo

Tapi ka inyo ado juo
Sagannyao agak saketek
Karano inyo labiah tuo
Andeh ayahnyo indak ado lai

Tagak inyo maso itu
Turun sakali ka halaman
Naiak ka ateh rumah gadang
Basuo urang batangisan

Tampak Rajo Angek Garang
Duduak bajuntai di tanggo anjuang
Mukonyo sirah bak darah
Dek matonyo baitu pulo
Saroman urang batuka aka

Indak jauah ka tangah rumah
Tampak tu Puti Pinang Masak
Tajalapak di ateh lantai
Panuah balumua darah iduik

Dakek mayik puti nantun
Duduak dayang mamangku paja

Paja nan ampia kajuih pulo
Iyo kajuih dek manangih
Untuang lai iduik juo

Diambiak nyo paja maso itu
Dilarikannyo tu ka dapua

Mancari-cari aia nasi
Dek paja sangaik kalaparan

Untuang lai ado urang sabalah
Nan datang dek mandanga pakiak
Pakiaknyo Puti Pinang Masak
Urang ko baranak ketek
Disuruah inyo manyusukan
Anak Tuanku Mangkuto Ameh

Balari Puti kateh rumah
Diparentahkan urang banyak
Mambantangkan tirai langik-langik
Sarato lapiak sapanuah rumah
Dibantangkan tabia kuniang
Sapanuah dindiang ruang tangah
Tandonyo ado kamatian

Bakato inyo maso itu
Iyo kapado urang banyak
Nan ado dalam ustano
"Mano kalian nan banyak ko
Kok ado urang batanyo
Apo sabab mandiangko
Katokan inyo alah lamo
Sakik-sakik sudah baranak
Cako ko inyo tajatuah
Tahampeh di batu tapak janjang
Lansuang sajo inyo mati

Usah ado nan mangecek
Iyo tantangan iko itan
Lihia kalian tantangannya
Mano waang bujang Salamaik
Japuk dek ang Tuanku Tuo
Suruah inyo kamari
Katokan ambo di siko

Mano kalian dayang-dayang
Japuik lakeh mandeh Rubiah
Adoki karajo surang-surang
Usah kalian lalai juo

Lah datang Tuanku Tuo
Lah mangecek inyo sabanta
Iyo jo Puti Nilam Cayo
Lah arih inyo garan
Apo bana nan tajadi

Baapo bana itu garan
Iyo kan buruak dunsanaknyo
Adaik rajo dibawokan juo
Disuruah japuik itu garan
Iyo sagalo urang gadang
Sagalo datuak jo pangulu
Diguguah tabuah larangan
Diguo aguang tujuah kali
Tandonyo ado kamatiān
Iyo di ustano rumah gadang

Di tangah halaman ustano tu
Ditagakkan payuang kuniang
Nan bajambua banang ameh
Sarato tombak jangguik janggi
Lambiang parisai indak tingga

Capek-capek mayik dibungkuih
Usah tampak bakeh dicakiak
Dibungkuih dengan kain cindai
Iyolah cindai panjang tujuah

Lah sudah mayik dibungkuih
Diseraki jo bareh kuniang
Sarato bungo tujuah ragam
Dibaka kumayan putiah

Alah manangih tukang ratok
Nan lah datang **dek diimbau**
Maratok inyo jo lagu
Malagu bagai basinanduang
Maambuang suaro tinggi-tinggi

Dek pandai inyo maratok
Urang lain manangih pulo
Banduanglah ratok di ustano
Ratok pitolong untuak rang banyak

”Ampunlah ambo Andeh Suri
Mangapo Andeh mati mudo
Andeh rancak pamenan kampuang
Limpapeh dalam rumah gadang
Suko maliek alek datang
Anak ketek arek manyusu
Andeh tinggakan jo siapo

Sampai atinyo andeh kanduang
Maninggakan anak dalam baduang
Kok banyak banalah nan lain
Indak samo jo Andeh Suri
Manjago anak nan manyusu

Bajalan malah Andeh kami
Bajalan kadalam bumi
Elok-elok bumi manampuang
Elok-elok langik manuduangi
Turunkan ujan nak nyo sanang
Andeh kami urang nan elok
Indak panah mambuek salah
Usah dibaka api bumi”

Kok lah panek tukang ratok tu
Digantikan dek nan lain
Macam pulo nan disabuik nyo
Mamuji-muji nan mati tu

Lah datang datuak kasadonyo
 Sarato pangulu sanagari
Datang basamo padusinyo
 Mambawo pisang nan satandan
Sarato tabu nan sabatang

Siriah jo gambia jo gagangnyo
 Pinang mudo jo pinang tuo jo tandannyao

Tukang-tukang bagageh kini
 Mambuek balreong tungku
Sabalun mayik dikabumikan
 Urang banyak makan daulu
Makan bagadang bak baralek
 Iyo kabau nan disambaliah

Lorong Tuanku Angek Garang
 Inyo tabanam ateh anjuang
Di ateh anjuang paraduan
 Dikatokannyao inyo paniang
Indak dapek duduak jo rang banyak

Tuanku tuo urang jawari
 Baitu pulo padusinyo
Iyo puti Nilam Cayo
 Sagalo adaik dituruti
Dijago bana itu kini
 Usah tabatiak tabarito
Pinang Masak mati tabunuah

Urang gaeknyo indak janah bana
 Iyo rajo nagari Koto Tuo
Disuruah dubalang ka sinan
 Mangatokan malang nan lah manimpo

Urang lain nan bakuliliang
 Iyo rajo nan badakatan
Tantu diagaiah tau pulo
 Dek urang gadang nan matiko

Koto Lamo nagari gadang

Lah patang kironyo hari

Lah datang ayah bundonyo

Iyolah Rajo Koto Tuo

Datang adiaknyo nan baduo

Iyolah Puti Mayang Taurai

Sarato Puti Bongsu Urai

Rajo lain lah datang pulo

Bukan sagan pado Angek Garang

Tapi sagan pado Tuanku Sati

Iyolah ayah dek nan mati

Dek tandu paangkek mayik

Tandu panjang tigo dapo

Lah sudah pulo dek tukang

Naiaklah rajo Koto Tuo

Sarato Puti Pamato intan

Dek suami si mati alun turun

Iyolah rajo Mangkuto Ameh

Naiak lah puti ateh anjuang

Iyolah Puti Nilam Cayo

Bakato inyo maso itu

Mano diak kanduang si Mangkuto

Usah hati di paturuikkan

Malu kito padu rang banyak

Kok salah sangko rang baeko

Kok ado kato nan talompek

Iyo dari urang banyak

Nan ado dalam ustano

Banyak buruaknyo dari baiak

Kok sampai kaba macam iko

Iyo kapado tuan kito

Nan ado di Pagaruyuang

Buruak tibonyo padu adiak

Rajo-rajo alah bakumpua
Tuanku Sati jo padusinyo
Alah naiak kateh tandu
Mananti adiak sajo lai
Dangakan malah kato denai

Kok nan elok dipaliekkan
Antah amuah nanti Tuanku Tuo
Manyuruah anaknyo nan baduo
Manggantikan lapiak dari kakaknya.

Pajatu ado di bawah
Labiah rancak inyo dangai
Iyo dari si Pinang Masak

Mandanga kato nan bak kian
Lah duduak Rajo Angek Garang
Diganti malah kain baju
Dilakekkan sampiang jo saluak
Disisikkan karih pusako
Turunlah inyo dari anjuang
Dituruukkan Puti Nilam Cayo

Lah tibo inyo di ruang tangah
Bakato inyo maso itu
"Manolah kakak Manti Tuo
Agak elok raso badan ambo
Lah buliah **pai ka pandam**
Iyo ka pandam **kaum kito**
Maantakan si Pinang Masak

Suruahlah urang maangkeknyo
Anaknyo di bawo juo
Ambo manunggu di halaman
Lah tampak turun Angek Garang

Lah **sampai** inyo di halaman
Disambah garan mintuonyo
Ayah jo Bundo Pinang Masak

"Ampunlah ambo ayah bundo
Lah lamo ayah ambo datang
Kapalo ambo sakik bana
Pusiang indak tampak kan diliek
Ambo tanangkan ateh anjuang
Maro nan datang tibo-tibo
Indak saketek ambo sangko

Talabiah ibo ati ambo
Mamikiakan anak ambo
Arek manyusu inyo baru
Si Buyuang baru kito imbau
Alun inyo dibari namo

Nan taragak di hati ambo
Tacinto alah agak lamo
Handak baralek gadang-gadang
Manurun mandi si Buyuang ko
Iyo mambari inyo banamo
Nak tau urang nan banyak
Ambo baranak laki-laki

Satuo iko umua ambo
Baru kini ambo mandapek anak
Iyolah anak laki-laki
Alah baranak duo tigo
Padusi sajo kasadonyo

Manjawek sanan Tuanku Sati
Aia mato badarai-darai
Dari cako inyo manangih
Baitu juo Andeh Suri
Sarato Puti nan baduo

"Manolah anak Mangkuto Ameh
Marolah tibo pado kito
Indak dapek kito ilakkam
Janji lah tibo pado inyo
Indak dapek disambuang lai

Lah sudah manyambah mintuonyo
 Basalam inyo maso itu
Iyo jo rajo nan manjanguak
 Urang datang dari kuliliang

Ado sabanta antaronyo
 Tadanga ratok hiruak pikuak
Dari ustano rumah gadang
 Tandonyo mayik lah kan turun

Turunlah mayik Pinang Masak
 Diturunkan dari tingkok gadang
Tingkok sangajo untoak itu
 Disambuik urang dari bawah
Diseraki jo barch kuniang
 Sarato bungo tujuah ragam
Bapantun Mandeh Rubiah

Oh Andeh Suri janyo ambo
 Bajalan malah Andeh kini
Elok-elok Andeh bajalan
 Andeh nan baru mudo matah
Maninggakan anak ɔrek manyusu

Kapakan Andeh sakaliko
 Indakkan mambali lai
Bajalan andeh kini nangko
 Indak akan babaliak lai

Kan langang garan rumah gadang
 Sanyok nagari Koto Lamo
Kailangan kampuang Koto Dalam
 Andeh rancak bajalan jauah
Indak Andeh kan tampak lai
 Iyo dek urang nan banyak ko"

Mayik dinaiakkan kateh tandu
 Lah naiak pulo Angek Garang
Sarato Puti Nilam Cayo

Batigo dengan Manti Tuo

Diangkek tandu dek rang banyak
Pandeka nan tuo-tuo
Pambuka jalan itu garan
Dibalakangnya payuang kuniang
Sudah itu si Buyuang ketek
Dipangku dek Puti Mayang Taurai
Dakek inyo si Bungsu Urai
Sudah itu rajo-rajo
Sarato dengan padusinyo
Baru tandu ditangah-tangah
Diiringkan datuak jo pangulu
Sarato dengan padusinyo
Diturujuk dek urang banyak

Agak heran urang sadonyo
Di mano garan Sutan Maulano
Mangapo inyo indak tampak
Tapi indak ado nan batanyo
Sagan kapado Nilam Cayo
Dek inyo manangih taruih

Lorong kapado Nilam Cayo
Dek inyo manangih bana
Iyo itu inyo tangihkan
Dek anaknyo indak tampak juo
Indak mungkin inyo indak tau
Urang kuliliang tau sadonyo

Lah sudah urang babarih
Tagak di tampek surang-surang
Bagarak urang ka bajalan
Dilapeh tabuah larangan
Sarato aguang tujuah kali

Dek lambek urang bajalan
Lah sanjo urang baru sampai

Iyo di pandam nan dituju
Di tanah lapang katinggian
Di bawah baringin sakti
Bapaga jo aua kuniang
Disalo pudiang nan baririk
Pudiang ameh pudiang jurai
Pudiang maco pudiang jari tangan

Diturunkan tandu dari bahu
Iyo dek urang nan maanta
Dilatakan di tapi lubang
Lubang nan alah tasadio

Lah kamuko Mandeh Rubiah
Disiram lubang jo aia arun
Aia nan pakai minyak mawa
Disiram jo limau tujuah ragam
Diseraki mayik jo bareh kuniang
Bapantun pulo Mandeh Rubiah

Manolah bumi nan batuah
Tarimo malah andeh kami
Usah datangkan api bumi
Untuak mambaka rang rancakko

Manolah langik nan sakti
Turunkan malah ujan angkau
Pandinginkan tubuah andeh kami
Nak sanang inyo dalam pandam

Mano batang baringin sakti
Kipeh malah pandam iko
Iyo jo daun nan rimbun tu
Nak sanang lalok andeh kami

Alun abih Andeh Rubiah
Maratok baolak olai
Tadanga ratok baibo-ibo
Urang maratok taisak-isak

Bukan itu ratok pitolong
Nan kito danga sajak cako
Tapi ratok andeh kanduangnyo
Andeh kanduang si Pinang Masak
Iyolah Puti Pamato Intan

”Manolah Upiak sayang andeh
O nak kanduang sibiran tulang
Iyolah Upiak Pinang Masak
Samudo iko umua kau
Alun lai cukuik duo puluah
Lah pai jauah dari andeh

Kok rancak lai macam urang
Paunyi rimbo mah kironyo
Saelok itu muko upiak
Makanan caciang mah ruponyo
Padiah paruik den mamikiakan
Raso kan jatuah tangkai jantuang

O nak sayang jolong diambin
Timbunan sayang urang banyak
Apo nak kanduang salah upiak
Mangko berang langik jo bumi
Salakeh itu upiak pai
Sumpah siapo tu nan dapek
Anak denai urang baiak baiak
Baiak hati baiak kurenah”

Mandanga ratok Pamto Intan
Bakato rajo maso itu
Iyolah Rajo Koto Tuo

Iyo Rajo Tuanku Sati
Mano diak kanduang Pamato Intan
Usah kau manangih juo
Janganlah ratok dipapanjang
Hari basarang sanjo juo
Kok kalam ari baeko

Kok berang bumi jo langik

Tanah runtuah lubang tatutuik

Ujan kok turun pulo

Jadi panuah lubang dek aia

Baa pulo manimbonyo

Hari kok batambah malam juo

Manolah anak kanduang ambo

Iyolah Tuanku Mangkuto Ameh

Suruah malah urang nan banyak

Mamasuakkan si Pinang Masak

Iyo kalubang pandam nantun

Nak salasai karajo kito

Hari basarang malam juo”

Ampunlah ambo ayah kanduang

Ambo nan patuik manurunkan

Ambo urang nan kailangan

Mandakeklah pulo ayah bundo

Kito lapeh basamo-samo

Didakekkan mayik ka lubang pandam

Dipayuangi jo payuang kuninag

Diseraki sakali lai

Didakekkan pulo mah anaknyo

Iyo dek Puti Mayang Tauri

Banduanglah tangih dakek pandam

Maratok managih sagalonyo

Iyo padusi nan maanta

Manangih jo ati ibo

Iyo manganang Pinang Masak

Urang nan elok salamo ko

Sasudah mayik ditanamkan

Urang babaliak ka ustano

Nasi talatak di hidangan

Dalam ustano jo balerong

Untuak sagalo urang datang

Lorong dek Rajo Angek Garang
Baapo bana buruak kurenahnyo
Dek adaike di turuik juo
Manigo hari itu garan
Manujuah jo dua kali tujuah
Sarato ampek puluah hari
Disudahi jo **manyaratuih hari**
Inyo baralek mambantai kabau

III BARALEK TURUN MANDI

Sahabih manyaratuih ari Pinang Masak

Ramilah pulo urang di ustano

Dek urang nak baralek pulo

Iyo baralek turun mandi

Maagiah namo anak rajo

Iyolah Tuanku Sutan Mangkuto

Disadiokan buayan baru

Dari rotan sanik nan aluih

Dianyam dek urang nan akhli

Dibari babungo cando ungeh

Disapuah jo aia ameh

Dibuek pulo tandu baru

Dari talang nan luruih

Tandu bapaga sariak bulek

Sarato baatok daun pucuak anau

Dibari pulo pucuak balapiyah

Sarato pucuak bantuak buruang

Talang disapu aia ameh

Dek sanak baitu pulo

Pado ari nan ditantukan

Ramilah urang dalam ustano

Urang nagari Koto Lamo

Sarato nagari Koto Tuo

Tambah urang nan dijapuik

Rajo jo datuak bakuliliang

Lah duduak urang kasadonyo

Duduak di tampek surang-surang

Rajo-rajo di lamin ujuang

Di bawah tirai langik-langik

Puti Puti di lamin pangka

Batirai batabia juo

Datuak jo manti di tangah-tangah
Baitu juo padusinyo
Alek bacampua iko kini
Dek alek baturun mandi

Ado sabanta urang duduak
Lah katangah Rajo Janang
Inyo diikuik paja-paja
Nan mambawo dulang nasi
Sarato gulai di dulang juo
Baitu pulo parabuangnyo

Manuruik adaik kito juo
Parabuangnyo bukan to kue
Tapi pisang macam-macam
Mungkin mukasuik itu garan
Kok parabuang indak abih
Iyo dek urang nan makan tu
Sisonyo buliah itu beko
Dimakan paja jolong laia

Pisangnyo nan macam-macam
Iyo pisang buai, pisang rajo sarai
Pisang ameh, pisang talua
Pisang tambatu, pisang rajo
Iyo tampak talatak juo

Sagalo pisang nan talatak
Bukan dibali rang ustano
Tapi dibawo dek rang datang
Basamo bareh jo talua ayam

Alah talatak nasi jo gulai
Lah datang pulo pinggan jo cangkia
Tampek basuah datang manambah
Bakato sanan Rajo Janang

''Ampunlah ambo Dang Tuanku

Iyo Tuanku Koto Lamo
Sarato Tuanku Koto Tuo
Ajak makan alek Tuanku
Nasi jo gulai lah tahiidang”

Bakato Rajo Angek Garang
Kapado alek nan banyak tu
Ampun ambo ayah Koto Tuo
Sarato ayah jo sanak rajo-rajo

Baitu datuak jo manti manti
Tambah pandeka jo dubalang
Langik alah manurunkan aia
Bumi alah manumbuhkan padi
Sarato daun jo rumpuiknyo
Nan kan manjadi tubuah kito
Ado talatak di hidangan
Nan kan manjadi makanan kito

Birawari kito kasadonyo
Iyo manjangkau nasi jo gulai
Kito mambasuah tangan kito
Sarato manyuok kito lai”

Bakato sanan saurang rajo
Iyo nan datang dari lua
”Ampun ambo Tuanku Rajo

Iyolah Tuanku Sutan Mangkuto
Sanang hati maliek nasi
Sajuak salero maliek aia
Manarimo suko kami garan

Tapi hanyo akan sabuah
Hambo ko sambuangan lidah
Ujuang lidah dek urang banyak
Dek kami ingin batanyo
Mangapo kami dijapuik
Alek apo iko garan”

Manyaik Rajo Angek Garang

Ampunlah ambo di nan banyak
Mungkin lah ado nan tau juo
Dek Andeh Suri nan ilang
Nan alah kito tanam samo-samo
Inyo nan maninggakan anak
Iyo anak laki-laki
Dek malang tibo di ambo
Anak alun dibawo turun
Alun panah ka Koto Tuo
Alun dibari lai banamo
Andeh inyo alah daulu
Dimintak dek bumi jo langik

Dek ari nan sahari ko
Hari baiak bulan baiak
Bulan nan sadang panauh kini
Ampek baleh hari malam cako
Ambo mamintak ka nan banyak
Mamintak tuah mamintak sakti
Iyo untuak anak ambo

Kito mintak basamo-samo
Iyo ka bumi jo ka langik
Amak inyo lakeh gadang
Amak inyo lakeh tinggi
Inyo manjadi urang pandai
Iyo manjadi urang kuaik
Urang tapandang di nagari”

”Ampunlah ambo bakeh Tuanku .
Jokok baitu kan baiaknyo
Sananglah pulo ati kami
Tapi hanyo akan sabuah
Sabalun nasi kami suok
Mamintak kami bakeh Tuanku
Suruah kalua si Buyuang tu

Nak diliek basamo-samo''

''Joko baitu kato Tuanku
Sukolah ambo manarimo
Ampunlah ambo pada Bundo
Iyo Bundo Pamato Intan
Sarato kakak Nilam Cayo
Bawo katangah cucu andeh
Alek kito andak mancaliak
Mambari tuah ka si Buyuang''

Katangah tampak Pamato Intan
Sarato Puti Nilam Cayo
Diiringkan Puti Mayang Taurai
Nan maambin si Buyuang kaciak

Lah sampai inyo ka rajo
Disarahan malah si Buyuang
Dicium anak dek rajo
Disuruh bawo ka datuaknyo
Iyolah Tuanku Koto Tuo
Dicium cucu dek Tuanku
Dilatakan ameh di ubunnyo
Iyo satahia ameh urai
Dalam pundi-pundi ketek

Alah sudah itu garan
Dibawo pulo pajan nantun
Iyo kapado rajo-rajo
Urang japutan bakuliliang
Dek rajo-rajo itu garan
Maisi pulo sasukonyo

Tantang datuak jo pangulu
Sarato manti jo dubalang
Baitu urang kayo-kayo
Mambari pulo saadonyo

Lah sudah sagalo laki-laki
 Maidu mancium paja
Maagiahnyo tando suko
 Dibawo pulo ka padusi
Sagalo Puti nan duduak tu

Ado maagiah kain lampin
 Ado pulo kain paambin
Satangah cincin ameh urai
 Ado nan kambiang ka digubalo
Disabuik sajo maso itu.

Alah sudah agiah maagiah
 Anak diayun di buaian
Di tangah rumah nan gadang tu

Katangah Puti Pamato Intan
 Dipaciknya tali nan suok
Tali tu cindai nan bapilin

Dek tali sabalah kida
 Dipacik dek Andeh Nilam Cayo
Datang si Puti jo kawan-kawan
 Iyolah Puti Mayang Taurai
Inyo maayun buaian tu
 Didorong saketek dari pangka
Malagu inyo maso itu

”**Lalok** Buyuang lalok nak sayang
 Usah Buyuang manangih juo
Usah diliek urang banyak
 Iyo buruak laku anak andeh
Dindang dindinlah anak andeh
 Dindin-dindin si Buyuang rancak
Tdua Buyuang lalok nak sayang
 Andeh dindong andeh dindinkan
Simantuang di tangah padang

Di dakek batang kanari
Si Buyuang lakehlah gadang
Tampek urang basanda diri.

Simantuang di tangah padang
Di dakek batang pauah palam
Si Buyuang capek nak gadang
Paungkik batang tarandam

Simantuang di tangah padang
Tampek batenggek buruang bayan
Si Buyuang capek nak gadang
Pamaga kampuang jo halaman

Si Mayang nan rancak jo sopan santunyo
Di tangah urang nan banyak tu
Pakaian nan elok pulo
Pakaian adai urang Solok
Baju batanti jo batabua
Batabua jo ameh padu
Babantuak bungo durian
Kain batanun banang makau

Indak doh baturak upiah
Iyo bak kain Pandai Sikek
Tapi babungo pucuak rabuang
Di tangah batabua pulo

Kain dipakai duo lampih
Salampih sampai kalutuang
Nan salampih taruih katumik
Balahnyo iyo kabalakang

Abuaknyo bajalin panjang
Bajalin jo cindai aluuh
Iyo cindai buatan Cino
Bamacam macam arononyo
Dibaliakkakakapalo

Iyo duo kali baliak
Ujuang tajelo sampai ka kaki

Balokah jo kain balapak
Tujuah untai maniak di lihianyo

Di lihia mansora aluih
Sudah itu iyo mayang padi

Katigo mayang pinang pulo
Ka ampek si bungo tanjuang

Kalimo daun tigo alai
Kaanam rago batu majan

Katujuah iyo uka gerang
Sadonyo dari ameh mutu

Galangnyo iyo tujuah pulo
Di bawah galang ula taduang

Sudah itu tujuah sarangkai
Dipilin jo ganto ketek

Katigo baru galang rago
Kaampek rago campua maniak

Maniak sirah itu garan
Kalimo karanggo maniak hitam

Kaanam galang gadang tipih
Katujuah baru galang gadang

Dipakai duo balah tangan

Antiangnyo indak lanjuik bana
Tapi balingka gadang-gadang

Lingkanyo dari ameh picak
Diagiah pamato intan tulen

Kilek bakilau dari jauah

Awak rancak pakaian elok
Tumbukan mato urang banyak

Mambuck Rajo Angek Garang
Duduak galisah di tampeknyo

Bak baruak ketek batali pendek

Memang iko nan dikandaknyo
Pandangan iko nan dicintonyo
Mangkonyo amuah baralek gadang
Manurun mandi dang anaknyo
Sabab iyo manuruik adai
Kok iduik bana Pinang Masak
Nan gadih juo nan ka tangah
Maindang induangkan paja ketek

Salain pulo dari itu
Tantang kapado Mayang Taurai
Sarupo bana jo andehnyo
Iyolah Puti Pamato Intan
Idaman Tuanku Angek Garang
Wakatu samo mudo-mudo
Talangkai abih kato sudah
Inyo mah ado ditarimo
Dek Tuanku Sungai Pagu
Ayah dek Puti Pamato Intan

Tapi dek tampan Tuanku Koto Tuo
Iyolah ayah Mayang Taurai
Pamato Intan manulaknyo
Sampai malawan pado ayahnyo
Baitu pulo pado ibunyo
Kanai kutuak dek urang gaek

Dek itu Angek Garang mambaleh dandam
Dipasonyo Rajo Koto Tuo
Kan manyarahkan Pinang Masak

Kini taniaik di atinyo
Handak marabuik urang rancak
Iyolah Puti Mayang Taurai

Babaliak kito kapangka
Tasabuik Puti Nilam Cayo
Sadang si Mayang lai bapikia

Mancari pantun kan panyambuang
Inyo manyambuang dindin dindong

”Dindin dindong anak den sayang
Buyuang nak ketek lakeh gadang
Indak ado garan andeh Buyuang
Nan lain ado kan gantinyo

Indak kan tau Buyuang garan
Andeh Buyuang iyo batuka
Dek urang sarupo juo
Samorancak samo gadangnya

Maintak Buyuang nak padō langik
Sarato padō bumi kito
Usah rang lain naiak ustano
Untuak manjago anak andeh
Manggantikan andeh Buyuang”

Mandanga dendang lah baujuang
Agak tasirah iyo muko
Muko si Puti Pamato Intan
Badendang inyo maso itu

Lalok sayang nenek ayunkan
Usah Buyuang nak banyak pikiran
Alek kito lah lapa garan
Lalok Buyuang di ateh anjuang
Beko kito kan bararak
Pai mandi ka tapian
Iyo tapian Batang Ruyuang”

Di ambiaknyo pajā dari ayunan
Iyo dek Puti Pamato Intan
Disarahkan padō Mayang Taurai
Disuruah bawo kateh anjuang

Birawari Tuanku Mangkuto Ameh
Bakato inyo maso itu

Ampunlah ambo Ayah kanduang

Sarato ayah nan jadi alek
Sanak saudaro kasadonyo

Lah sudah paja diayun

Paruik kito lah lapa pulo
Ambiaklah pinggan nan talatak
Jangkaulah nasi jo gulainyo
Makan jo minum kito lai

Lah sudah minum jo makan

Makan pisang sabuah surang
Dikapua pulo malah siriah
Bakato Tuanku maso itu
Iyolah urang Angek Garang

Manolah kito nan banyakakko

Mamintak ambo kini nangko
Adokoh itu nan mangana
Siapo rasonyo nan ka elok
Iyolah namo anak ambo

Kok lah gadang inyo beko

Inyo manuruik gala mamaknyo
Iyolah Rajo Sungai Pagu
Nan bagala Datuak Majo Lelo

Alah payah ambo mamikiakan

Indak dapek namo nan elok
Tolonglah ambo kini nangko

Bakato surang Rajo Tuo

Nan datang dari Supayang
Ampunlah ambo di Tuanku
Iyo Tuanku Mangkuto Ameh
Ado tapikia tu dek ambo
Namo nan elok untoak paja ko
Iyolah Sutan Panggantian

Kok inyo urang padusi
Banamo Sari Baganti
Manggantikan dang andehnyo

Bakato saurang lai
Iyo urang tuo juo
"Itulah namo yo nan elok
Dibarikan pado si Buyuang tu"

Lah sirah muko Angek Garang
Bakato inyo katiko tu
Ampunlah ambo di nan banyak
Namo itu iyo mah elok
Tapi di ambo ndak katuju
Pado pikiran ati ambo
Usah inyo tau manau
Baso andehnyo ndak ado lai

Siapo sajo itu nanti
Nan kan datang ka rumahko
Nan kan manjadi Andeh Suri
Bia nyo sangko tu andehnyo"

Mandanga kato nan bak kian
Tatakuwa urang nan banyak
Lah abih taraso tu garan
Kilek camin alah kamuko
Kilek baliuang lah kakaki

Tadanguih rajo mudo-mudo
Labiah nan alun bapadusi
Ingin hati maliek gaduh
Iyo si Upiak Mayang Taurai

Rancak tacenceng dari jauah
Sopannya lah tampak pulo
Sabanyak itu urang duduak
Maliek inyo masuak katangah

Iyo katangah urang banyak
Matonyo indak dimainkan
Sanyumnyo indak kanampakan

Lah taraso dek nan banyak
Si Gaek si Angek Garang
Kan tagak pulo inyo mamaso

Mamaso Tuanku Koto Tuo
Kan manyarahkan dang anaknya
Iko taraso dalam hati
Iyo kapado Mayang Taurai
Tapi apo kan disabuik
Indak kan ado itu garan
Iyo urang nan barani
Malawan si Angek Garang
Kurenah samo jo namonyo
Namo paragiah urang banyak

Dek urang lamo tataku
Bakato sanan Tuanku Sati
Bapak dek Puti Pinang Masak
Mano Tuanku anak ambo
Tapikia di ambo sabantako
Kok nan banyak lai satuju
Dek neneknya itu garan
Banamo Puti Pamato Intan
Andeh ambo baitu pulo
Banamo Puti Reno Intan
Inyo itu kito bari namo
Iyolah Sutan Majo Intan

Bakato rajo maso itu
Dek sayang alun abih juo
Iyo ka puti Pamato Intan
"Kok baitu kan baiaknya
Namo di agiah dek Datuaknya
Dek ambo manuruik sajo

Manolah alek nan banyakko
Ampuni ambo kok basalah
Duduak Tuanku rajo-rajo
Sarato pangulu saandiko
Ambo nak pai tu sabanta
Maanta si Buyuang ka tapian
Iyolah Sutan Majo Intan

Mungkin tu garan ayah ambo
Nak sato pulo inyo pai
Sarato Datuak Manti Tuo
Datuak Mangku tingga di usta no

Kok ado nan mudo-mudo
Nak sato **maarak paja ketek**
Suko tarimo tu dek ambo
Nak rami labuah ka tapian

Tagaklah urang nan ka pai
Di laman alah tu mananti
Iyo karando untuak paja
Kudo pulo untuak ayahnyo
Adomah kudo anam ikua
Naiaklah Rajo Koto Tuo
Sarato rajo mudo-mudo

Mayang Taurai jo andehnyo
Sarato Puti Nilam Cayo
Itu nan duduak ateh tandu
Dek tandu indak gadang bana

Bararak urang katapian
Di muko tari galombang
Sudah itu urang bakudo
Di balakangnya payuang kuniang
Indak barajo di bawahnya
Sudah itu baru tandu si Buyuang
Di balakang itu garan

Urang padusi manjujuang dulang
Dulang barisi palimauan
Sarato badak jo kasai
Tamasuak juo bareh kuniang
Sarato bungo tujuah ragam
Iyo kumayan putiah indak lupo

Urang bajalan surang-surang
Bairiang-iriang panjang-panjang
Indak buliah itu garan
Daulu mandaului
Atau sairiang duo urang
Urang haruuh malenggang habih
Talam ndak buliah nyo diusiaik
Baitu pulo dulang-dulang
Aia arun di dalam kaco
Indak buliah dipacik juo

Malu gadang itu garan
Talabiah urang pasumandan
Indak nyo pandai tu bajalan
Bajalan manuruik adaik
Kok samo garan bangsonyo
Nan tuo musti daulu
Nan ketek di balakang juo
Panjang barisan **ndak taukua**
Bapakaian adaik kasadonyo
Laki-laki jo parampuan

Urang nan tidak bapakaian
Tagak mah sajo tu di tapi
Basamo dengan urang tuo
Sarato anak-anak ketek
Atau padusi sadang buntiang
Iyo nan sadang manyusukan

Lah tibo urang di tapian
Lah turun si Buyuang dari tandu

Turunlah pulo rajo-rajo.
Dari kudo tungganggannya

Dibarikan paja ka ayahnya
Tagak inyo maadok Timua
Tagak pulo inyiak dukun tuo
Di sabalah kanan Tuanku Rajo
Dunsanak lain nan sadarah
Babarih kida jo suok

Lah sudah itu garan
Payuang kuniang ditagakkan
Iyo di ateh si Buyuang ketek
Diseraki bareh kuniang
Sarato bungo tujuah ragam

Bakato inyo maso itu
Iyolah inyiak dukun tuo
Ampunlah ambo pada Tuanku
Tangadahkan malah kapalo
Ambo bacokan manto ambo.
Jo suaro nyariang nyo basaru.

Manolah Inyiak paunyi rimbo
Iyolah rimbo ulu tapian
Iyo tapian puti puti ko
Mamintak kami bakeh inyiak
Usah datangkan angin buruak
Usah turunkan amo panyakik
Kami nak mandi kini nangko

Mano langik tampek balinduang
Lindungi juo anak kami
Usah nyo sakik ngilu paniang
Jangan turunkan ujan kiniko
Kami handak basuko-suko

Mano matoari nan manarangi

Usah paneh dilabiahkan
Kok sakik beko anak kami
 Kamano kami kan mangadu
Matohari iyo bakuaso

Manolah bumi nan dipijak
 Nan mambari makanan kami
Relakan sagalo nan dimakan
 Usah kami bumi kutuak
Iduik kan malah anak kami
 Jo padi, ubi sarato taleh
Amak lakeh inyo gadang

Manolah Dewi urang rimbo
 Pari mambang rang bunian
Iko si buyuang anak kami
 Namo si Buyuang Majo Intan
Caliak ruponyo elok-elok
 Barinyo tuah dari dewi
Amak rancak tampan nyo nanti
 Iyo anggun, gombang ruponyo

Agiah inyo ba cik lalek
 Agiah inyo balasuang pipik.
Nak manih dipandang urang
 Nak cancak tampak sanyumnyo
Iyo dek gadih samo gadang

Manolah engkau hantu rimbo
 Hantu aia hantu tanah
Baranjak kalian dari tapian
 Kami tidak maliek kalian
Kalian ado maliek kami
 Usah kami kalian gaduh
Iyo si Buyuang Majo Intan
 Sarato kami nan banyak ko

Barangkek kalian jauah-jauah

Kok ado beko nan baliak siko
Iyo nan sakik ngilu paniang
Ulah karajo kalian tu
Hambo sumpahi ambo kutuak
Kalangik di tahan awan
Kaaia di ampeh aruiah
Lumpuah kalian ateh bumi
Iyo sampai dunia ko hancua
Huuus huuuuuus huuuuuuuuus."

Lah sudah Inyak mambaco manto
Diambiaknyo si Buyuang Majo Intan
Dari pangkuan dang ayahnyo
Diasoknyo jo kumayan putiah
Diambuihnyo ubun ubunnyo
"Manolah Buyuang Majo Intan
Lakeh handaknyo Buyuang gadang
Ditimang diayun dibuaikan
Ditatiang bak minyak panuah
Maso ketek kan ubek ati
Alah gadang tempek mangadu
Jadilah urang nan disambah
Tampek mangaku urang banyak
Tampek urang mamintak hukum
Tampek baguru urang bawahan
Nan ka jadi suri tauladan.

Asok kumayan nan harun ko
Dek kimayan kumayan putiah
Sampai kan malah manto ambo
Kapado langik, mato ari
Mambang jo Dewi di angkasa."

Birawari Inyiak Dukun Tuo
Dikareknyo limau tujuah ragam
Limau kasturi limau sariang
Limau kambiang limau karatan

Limau lunggo jo limau kapeh
Katujuah dengan limau puruik

''Manolah asok kumayan
Bawolah harun sangik limau
Iyo kalangik nan ka tujuah
Mangadok bulan matoari
Amak tarangnya sampai ka bumi
Mambawo tuah jo sakti
Kapado si Buyuang Majo Intan
Huuuuuuuuuuuuus huuuuuuuuus huuuuuuus
Paja disambua tigo kalj
Tapek di ubun-ubunnyo

Sasudah si Buyuang dilimaui
Diserakkan limau ka aia
Ka hulu tapian tujuah
Sarato bungo tujuah ragam
Baitu pulo bareh kuniang

Masuaklah Puti ka dalam kolam
Kabawah pincuran tujuah
Iyolah Puti Mayang Taurai
Jo anam Puti kawan-kawannya
Dalam si sampiang saruang
Nan dipakai di bawah lihia

Balimau inyo kasadonyo
Tagerai rambuik nan panjang
Lah sudah inyo balimau
Barulah si Buyuang diberikan
Iyo kapado Mayang Taurai
Inyo nan patuik mamandikan

Paja nan sadang mamakiak kareh
Alah tibo dalam tangannya
Tahanti garan tangihnyo
Tagalak pulo inyo lai

Tagalak pulo urang nan banyak
Bakato Andeh Nilam Cayo
Inyo dijujai dek andehnyo
Nan samo bana do nan dilieknyo
Iyo Puti Mayang Taurai”

Lah sudah si Buyuang mandi
Diagiah lampin cita aluih
Dibari baju suto cino
Diambin jo kain tanah liek
Dek gadih nan maambinnyo
Disalimuti jo cindai panjang tujuah
Iyolah Puti Mayang juo

Baliaklah urang kateh tandu
Naiaklah pulo Tuanku rajo
Sarato urang nan barampek
Iyo kaateh kudo tunggang
Bagarak urang kasadonyo
Pulang babaliak ka ustano

Lah tibo dalam ustano
Nasi mananti di hidangan
Makan pulo urang babaliak
Dek hari alah agak laruik
Alah mah cundungnyo ka barai
Lah lewaih bunta bayang-bayang

Lah sudah minum jo makan
Pulanglah urang ka tampeknyo
Baitu Rajo Tuanku Sati
Sarato Puti Pamato Intan
Dibawonyo anak kaduonyo
Iyolah Puti Mayang Taurai
Sarato Puti Bongsu Urai.

IV PUTI MAYANG TAURAI.

Alun lai sampai tujuah hari
Sasudah alek turun mandi
Alah disuruah tu mah garan
Iyolah urang tuo-tuo
Dek Rajo Tuanku Mangkuto Ameh
Kanagari Koto Tuo
Ka Ustano Tuanku Sati
Iyolah pai manalangkai
Mamintak Puti Mayang Taurai

Tantang Puti Mayang Taurai
Alah taraso tu mah garan
Bahaso urang tu kan datang
Bakato inyo ka andehnyo
Ampunlah ambo andeh kanduang
Kok datang urang maminang
Dari nagari Koto Lamo
Usah pinangnya ditarimo
Ambo lah tau bana
Baapo jaheknyo rajo nantun
Iyolah Rajo Angek garang
Namonyo sajo lah baitu
Tasuo dalam kurenahnyo.

Ambo mandanga kaba jaleh
Dari kak Sutan Maulano
Sangkek inyo singgah siko
Sabalun pai ka Koto Anau
Bahaso matinyo kak Tuo ambo
Kak Tuo Puti Pinang Masak
Dibunuah Rajo Angek Garang

Takuik bana ambo kironyo
Ka samo iduik jo urang tu
Malieknyo sajo ambo sagan

Kok kunun kan iduik di rumahnyo
Manggigia raso tulang ambo
Jokok matonyo ambo liek

Sabagai pulo itu andeh
Jokok ambo indak salah caliak
Adomah garan ati urang
Iyo kapado badan ambo
Dek inyo tu bukan urang lain
Iyolah kak Sutan Maulano

Bia ndak panah disabuiknyo
Jokok basuonyo jo ambo
Katiko kakak iduik juo
Tapi taruih dibayangkannya
Jo kiasan jo sindiran

”Mano nak kanduang Mayang Taurai
Itu bana nan jadi pikiran
Iyo dek ayah sarato andeh
Apo kan jawek kami beko
Kok urang datang manalangkai
Jikok kito tulak sajo
Tantu inyo kan berang bana
Urang nan lain berang pulo
Dek urang indak tau manau
Baa bana hubungan kito
Iyo jo Rajo Angek Garang

Bapak andeh mamak dek inyo
Iyo indak mamak kanduang
Bapaknya jalan mamak pulo
Iyo dek andeh adiak baradiak
Dek itu kami batunangan
Batuangan sajak andeh laia
Dek nagari bajauhan
Kami nan jarang mah basuo
Ayah Upiak acok kasanan

Kanagari andeh Sungai Pagu
Mamaknyo kawin di sinan
Indah jauah dari ustano
Dek pandai ayah baraka
Kami dapek mah basuo
Di rumah mandeh Rubiah
Wakatu kajadian iko
Inyo nan alah jadi rajo

Disuruahnya urang maalangkai
Ditarimo dek niniak mamak
Sabab andeh maiyokan
Titulak dek ayah bundo
Andeh malawan ka rang gaek
Berang bana inyiak jo datuak Upiak
Iyo kapado andeh nangko

Dijapuik andeh dek ayah
Dilapeh dek niniak mamak
Dianta pulo andeh garan
Iyo dek urang tuo-tuo

Di siko kami baralek
Baralek gadang itu garan
Inyiak Upiak lai iduik juo
Baitu pulo datuak Upiak
Iyo nan di ustano ko

Berang bana urang Koto Lamo
Talabiah Rajo Angek Garang
Ayah jo andeh dikutuaknyo
Disimpahi habis habisan
Basumpah pulo inyo garan
Kok andeh indak dapek dek inyo
Anak andeh kan dinantinyo

Lah gadang kakak kanduang Upiak
Iyolah Puti Pinang Masak

Batubi tubi talangkainyo
Bakareh kami manulaknyo
Kudian kasudahannyo
Ayah diancamnyo jo parang
Dek ibo kami ka rakyat
Tapaso kami manyarah

Kok kini inyo kito tulak
Urang lain ka berang pulo
Sabab kakak maninggakan anak
Iyolah anak sadang manyusu
Sado urang tandu maraso
Upiak nan patuik manjagonyo
Itu marusuah hati kami.

Kok Upiak kokan beko
Upiak bahanji dengan Sutan
Sutan Maulano kamanakannyo
Mungkin nyo cari paja nantun
Dicancangnya iduik-iduik
Sadang dek inyo lah cimburu
Cimburu bakeh paja tu
Dek Maulano tampan anggun

Nan sakarang kini nangko
Turuikan sajo elok-elok
Indakkan dapek ayah Upiak
Malawan Rajo Angek Garang
Kok inyo sabuik tuhuak parang
Baapo nyo kito nak malawan

Sajak inyo manjadi rajo
Inyo malatiah rakyat nyo
Iyo manjadi urang kuaik
Urang pandai main sanjato
Pangulu-pangulu dalam kampuang
Datuak jo manti di nagari
Indak buliah manjabaik karajo tu

Kok indak kuaik indak kaba
Indak pandai momainkan padang
Sarato karih, lambiang, tombak

Sabagai pulo tu nak kanduang
Inyo iyo urang kayo
Kok indak cukuik dek rakyat
Untuak pai tuhuak parang
Diupahnyo pandeka nagari lain
Indak takuik pitih kan abih
Asa sampai mukasuiknyo

Manangih Puti Mayang Taurai
Manangih baibo ati
Takana Sutan Maulano
Antah di mano nyo tu kini
Iyo katonyo inyo ka pai
Iyo ka nagari Koto Anau
Tapi salamo salaruik itu
Indak ado kaba baritonyo

Alun lai sampai duo hari
Sasudah si Mayang nyo mangadu
Mangaku bakesh andehnyo
Lah datang urang Koto Lamo
Laki-laki parampuan
Datang maminang manalangkai
Bakato garan nan tuonyo

“Ampunlah kami dang Tuanku
Iyo Tuanku Koto Tuo
Kami disuruh rajo kami
Datang manjapuik anak Tuanku
Nan banamo Mayang Taurai
Kan dijadikan Andeh Suri
Pangganti Puti nan lamo
Nan loho samo kito tanam

Japuik tabawo tu handaknyo

Di sinan kito baralek

Iyo baralek ketek sajo

Maalun urang ganti lapiak

Daulu kito lah baralek

Baralek gadang duo nagari

Mangko bagageh rajo kami

Dek paja si Buyuang Majo Intan

Manangih sajo karajonyo

Payahlah urang maantokkan

Sahari duo hariko

Lah payah inyo manyusu

Andeh susunyo nan baduo

Indak tidua siang malam

Dek manjago inyo sajo”

“Kok baitu kato Mamak Manti

Bia si Mayang ditanyoi

Lai kok amuah inyo garan

Manggantikan kakak kanduangnyo

Iyolah Puti Pinang Masak

Tapi sabuah itu kini

Umuanyo baru ketek bana

Alun kan patuik itu garan

Inyo manjadi Andeh Suri.

Andeh tau karenahnyo

Dek urang minantu andeh

Kok salamo inyo mananti

Dadonyo sasak tu baeko

Muluiknyo indak ditahannyo

“Kok iyo banalah baitu

Indak doh sanang hati kami

Malapeh mamak turun ndak makan

Kito ko urang basabalahan
Kok indak urusan minantu ambo
Kitokan basuo-suo juo”

”Kok baitu kan eloknyo
Kami iyo manarimo suko
Urang lapa diagiah nasi
Urang auih disuruah minum
Daulu andeh bajalan
Kami turukkan dari balakang”

Lah sudah minum jo makan
Siriah alah dikapuo pulo
Alah barangkek urang pulang
Lah tingga Tuanku nan Sakti
Basamo Puti Pamato Intan
Tunduak tangadah kaduonyo
Ndak tantu apo kan disabuik

Alah sabanta antaronyo
Bakato Rajo Tuanku Sakti
”Mano diak kanduang Pamato Intan
Pado pikiran hati ambo
Elok si Mayang kito suruah
Kito suruah lari jauah-jauah
Kanagari Talang Babungo
Di sinan ado adiak ambo
Manjadi pangulu nagari tu
Inyo kawin jo urang sinan
Bia inyo dianta bisuak
Iyo dek urang pandeka rajo”

”Jikok baitu kan eloknyo
Sanang lah pulo hati ambo
Ambo kan lai tau juo
Pado adiak Sutan Lembang alam
Pado pikiran hati denai

Elok paja dibawo kamari
Bia kami manggadangkannyo
Di siko padusi lai banyak
Nan buliah baganti-banti
Iyo mandindong mandidinkannyo

Ampunlah ambo di Tuanku
Kok dek kami indakkan baapo
Kalau itu nan ditarimo
Iyolah itu elok juo
Tapi Tuanku kan lah tau juo
Baapo kurenah rajo kami
Inyo barajo di matonyo
Inyo basutan di hatinyo
Bapikia Tuanku tantang itu

Cubo baliak mamak daulu
Sambahkan padsa rajo Mamak
Tantang jawaban denai tadi
Untuang-untuang ditarimonyo
Dek inyo alah tuo juo
Kok lai kini labiah saba

Kok baitu kato Tuanku
Nak kami cubo mangatokan
Tapi kok berang inyo baeko
Usah kami disasali
Elok bapikia kini-kini

Dalam bahandai nan bak kian
Datanglah Puti dari dalam
Iyolah Puti Pamato Intan

”Manolah Mamak sarato Kakak
Nan datang dari Koyo Lamo
Kok alah abih parundiangan
Baurak selo mamak garan
Nasi tahidang di ruang tangah

Mano andeh rumah gadangko
Usah lah kami makan pulo
Kami bagulik ko mah kini

Sarato urang padusinyo
Puti juo inyo garan
Adiak Tuanku Talang Babungo
Nan banamo Puti Kumbang Cari
Inyo batapuak maso itu
Manyuruah datang dayang-dayang
Alah mah datang kambang Cino
Bakato andeh Pamato Intan
Mano nak kau Kambang Cino
Japuik si Upiak kateh anjuang
Suruah turunnya kasurambi
Kami andak ba handai andai

Naiak si Kambang kateh anjuang
Di dapekinyo Mayang Taurai
Sadang manangih itu garan
Manangih taisak-isak

”Ampunlah ambo Tuan Puti
Ayah jo bundo itu garan
Sadang duduak di surambi
Tuanku disuruah turun
Handak dilawan tu barundiang”

”Mano diak kanduang Kambang Cino
Duduak juo itu garan
Iyo urang dari Koto Lamo
Kok inyo alun lai pai
Denai nan indak ingin turun
Dibawonyo denai beko
Indak taragak itu garan
Nak iduik di Koto Lamo
Manggantikan kakak kanduang denai
Iyolah Kakak Pinang Masak”

”Kok ditanyo pada ambo
Indak suko juo ambo garan
Tuanku manggantikannya
Dek ambo alah mandanga bana
Dari si Kambang nan di sinan
Baapo jaheknyo Angek Garang
Patiuk inyo banamo itu

Tapi sakarang kini nangko
Turun Tuanku kasarambi
Ayah usah disuruah mananti
Berang inyo beko pada kito
Sadang urang dari Pakan Lamo
Sasudah makan inyo pai
Alah mah agak lamo juo”

Turunlah Puti Mayang Taurai
Malangkah lambek-lambek sajo
Saroman urang sudah sakik
Muko pucek matonyo sirah
Ibolah hati mandeh kanduang
Mancaliak anak nan bak kian

Baru sampai inyo manyambah
Sambia manangih-nangih juo
Bakato Puti Pamato Intan
”Mano nak sayang Mayang Taurai
Usah Upiak manangih juo
Kuaik kan malah hati Upiak
Nak tubuahnya kuaik pulo
Dapek kito mancari jalan

Pado pikiran hati kami
Kok iyo Upiak anggan bana
Indak namuah kawin itu kini
Iyo jo rajo Koto Lamo
Eloklah Upiak lari jauah

Itan karumah bapak ketek
Bapak ketek Upiak nan tingga
Di nagari Talang Babungo

Tapi sabuah itu garan
Urangnya iyo pangulu
Tapi iduiknya agak payah
Kasawah kaladang inyo garan

Kok upiak tingga jo inyo
Tantu indak kan buliah nanti
Nan ka iduik manyuok sajo
Kok indak kasawah jo kaladang
Sakurangnya karajo rumah
Tantu paralu itu nak kanduang
Inyo indak badayang-dayang

”Ampunlah ambo andeh kanduang
Sarato ayah kanduang ambo
Kok bintu kan baiaknyo
Ambo manuruik itu ayah
Bia badanko nak marasai
Asalai ati lai sanang
Bia amboko alun panah
Mausiak manjantiak tanah
Batanak manggulai dalam rumah
Alun tau di asin garam
Labiah suko Upiak garan
Dari kawin jo urang gaek
Urang gaek nan tuo bangko

”Kok baitu kato Upiak
Sananglah pulo ati ayah
Di ayah baitu pulo
Bukan to garan tuonyo tu
Nan sangaik ayah binci
Tapi iyo kurenahnyo
Padusinyo alah sapuluah

Indak nan sanang di usatano
Ado nan lari jauah-jauah
 Ado nan lumpuah pulang ka andehnyo
Nan mati lah banyak pulo

Inyo balanteh angan bana
 Pado padusi-padusi tu
Talabiah pulo itu garan
 Hanyo nan tuo anak rajo
Sarato kakak kanduang kau
 Nan lain anak pangulu
Atau mah urang rancak sajo

Bakameh malah Upiak beko
 Ditolong andeh kanduang Upiak
Bawolah pakaian Upiak
 Tapi usah kasadonyo
Baitu pulo barang Upiak
 Iyo nan dari ameh perak
Pagi buto Upiak barangkek
 Dianta pandeka rajo
Bawolah kudo sambarani

Tapi lakeh suruah pulang
 Usah payah ayah baeko
Kok nak pai kamano-mano
 Kudo kito saikua sajo

Elok-elok nak Upiak marantau
 Pandai-pandai mambawokan diri
Kok puti bana di nagari
 Di rantau iyo dagang juo

Di nagari urang itu isuak
 Upiak kan iduik samo gadang
Jo urang kampuang urang dusun
 Mandi kan samo satapian
Samo ka ilia jo kamudiak

Samo ka pakan jo ka rimbo
Antah kayu nan kan dicari
 Antah lauk nan kan ditangguak
Maalum iduik dalam kampuang

Usah Upiak **angkuah** jo congkak
 Usah uju jo tinggi hati
Sipaik padi nan ka dituruik
 Makin barisi makin runduak
Indak kan bungkuak dek manyuruak
 Indak kan patah dek marandah
Nak mulia ino kan diri
 Bia urang nan manyanjuang

Aia urang nan disauak
 Rantiang urang nan dipatah
Kok mandi diilia-ilia
 Bakato di bawah-bawah
Tanah urang nan dipijak
 Bajalan usah malagak-lagak”

”Ampunlah ayah kanduang ambo
 Sagalo titah ambo junjuang
Sado pitua ambo pacik
 Kok siang akan jadi tungkek
Kok malam jadi kalang ulu
 Salamaik ambo di rantau
Kok untuang lai lakeh pulang

Sadang inyo babincang-bincang
 Manyabuik buruak jo baiak
Dek anak kan pai jauah
 Tadanga garan bunyi ganto
Ganto kudo nan dipacu
 Lah tarang bunyi tapak kudo
Takajuik urang nan batigo
 Lah balari inyo garan
Iyo mambukak pintu janjang

Lah tampak pulo dari jauah
Angek Garang datang bakudo

Si Mayang lari kateh anjuang
Tuanku jo andeh suri
Turun inyo kahalaman
Manarimo urang nan datang tu

Turun Tuanku Angek Garang

Iyo dari ateh kudonyo

Jo kasa sajo nyo bakato

”Manolah ayah rajo siko

Ambo ko datang manjapuik

Iyo manjapuik elok-elok

Manjapuik manuruik adaike

Nan lain pulo jawek ayah”

”Mano Tuanku anak ayah
Mangapo mangko berang sajo
Naiak daulu kateh rumah
Kito barundiang babicaro”

”Kok lai nan elok nan ka disabuik
Ambo lai namuah naiak
Kok nan cako kan diulang
Iyo nan di sabuik urang nan datang
Ambo lai kan naiak juo
Maelo si Mayang dari anjuangnyo”

”Naiak kito daulu
Dapek Tuanku mandanga kato
Iyo dari ayah sandiri
Bukan kato basambuang lidah
Antah iyo dari ayah
Antah ditukuak urang pulo
”Naiak ayah ka ustano
Ambo manuruik di balakang

Lah naiak urang katigonyo

Lah duduak tampak disurambi
Bakato sanan Tuanku Tuo
Iyolah Rajo Koto Tuo”

”Manolah Tuanku anak denai
Dangakan malah kato ayah
Tantang mukasuik anak kanduang
Andak pulang pado si Mayang
Kami nan tidak kan manghambek
Kami nan tidak kan malarang
Memang lah iyo di adaikkan
Kok ado kakak nan mati
Maninggakan anak pulo
Iyo adiaknyo kan gantinyo
Alah biaso itu garan
Iyo dialam Minang nangko

Ato hanyo akan sabuah
Tantang dek adiak Tuanku ko
Inyo iyo pajau baru
Umuanyo baru ketek bana
Alun patuik inyo bajunjuang
Kunun manjadi Andeh Suri

Alun kan pandai inyo garan
Iyo ka tapi jo ka tangah
Alun tau dipadeh lado
Baitu juo masin garam

Jiko Tuanku ingin juo
Nanti malah satahun duo
Kami tunjuak kami ajari
Baapo nan kan eloknyo
Iyo manjadi padusi rajo”

”Usah ayah baolak elai
Usah ambo dikutak katiak
Jo kato baiko jo baitan

Ambo lai dapek maliek
Barapo garan umua paja
Iyo sagadang inyo nantun”

”Gadangnyo iyo bak diambuih
Umuanyo alun lai bara
Inyo alun maliek bulan
Alah kok jaleh dek Tuanku”

”Kok baitu kato ayah
Ambo tau nan ka rusak
Bia inyo tingga jo ambo
Malakik inyo agak gadang
Untuak manjago Majo Intan”

Tantang manjago Majo Intan
Elok paja tu nan diangkuik
Dibawo inyo kamari
Di siko banyak tu padusi
Iyo urang nan ka manjago”

”Elok bana tu mah garan
Tuanku disiko rami-rami
Ambo nan tingga ka dinginan
Bini ambo alah mah mati
Anak ambo dibawo pulo”

”Mangko baitu kato ayah
Padusi nan lamo alun kawin
Andeh Suri nan mulo mulo
Lai mah inyo iduik juo
Sadang rancak itu kini
Kabara banalah umuanyo
Lai garan sapadan juo”

Mandanga kato nan bak kian
Tapanca berang Angek Garang
Alah lupo inyo garan
Inyo nan samo rajo-rajo

Marantak inyo maso itu
 Marantak manghantam lantai
Bakato **sakuak suaronyo**

”Mano ang Tuanku Tuo
 Lah payah denai dek basaba
Lah panek manahan hati
 Lah ba ayah awak ka inyo
Ba andeh pulo kabininyo
 Banyak pulo lai nan disabuik

Nan sakarang kini nangko
 Kato putuih ambo katokan
Kato indak disambuang lai
 Kok si Mayang indak dilapeh
Pai jo elok dangan ambo
 Ambo tangkok Pamato Intan
Ambo gungguang ambo bawo tabang
 Kok indak dapek nan banyawo
Bangkainyo ambo bawo juo
 Kato sudah ambo bari
Indak kan ambo tuka lai

Lorong kapado maso itu
 Pamato bagarak handak lari
Dikaja dek Rajo Angek Garang
 Dipaluak handak dipangkunyo
Dibawo turun ka janjang

Sakuak tulang nyo malawan
 Ditolong pulo dek suaminyo
Tapi Tuanku Angek Garang
 Labiah kuaik inyo garan

Mandanga hiruak di surambi
 Turunlah Puti Mayang Taurai
Sarato Puti Bongsu Urai
 Mancaliak andehnyo kanai pangku

Bagarak inyo nak manolong
Dalam sakajap itu juo
 Bak alang manyemba anak ayam
Mayang Taurai nan kanai semba
 Dipangku dibawo turun
Dilarikan kaateh kudo
 Kudo di pacu kancang-kancang
Pakiaknyo sajo nan tadanga

Dek inyo mamakiak kuaik nantun
 Takajuik urang di rumahnya
Maliek urang dari tingkok
 Bakato sanan Angek Garang
Mano diak sayang Mayang Taurai
 Usah Upiak mamakiak juo
Malu kito padu rang banyak
 Kok Upiak elok-elok sajo
Ndak ado urang kan heran
 Mancaliak kito nan baduo
Dek urang baganti lapiak
 Bia alun kito baralek
Sudah biaso tu diak sayang
 Dek urang bajalan baduo

Elok-elok Upiak duduak
 Bagantuang padu lihia ambo
Buliah kudo kito pakancang
 Jan sampai hari malam bana
Kito sampai di Koto Lamo

Lah labiah garan ampek bulan
 Sajak matinyo kakak Upiak
Kakak ko iyo ingin bana
 Untuak mambawo Upiak pulang
Jo kudo saroman iko kini
 Kiniko baru sampai taragak

Mari sayang mari diak kanduang
Buah hati pamenan mato
Urang tarancak di nagari
Usah ambo digigik juo
Usah ambo digurameh
Jokok taberang ambo beko
Nan buruak pulo nan tasuo

Dangakan bana kato Kakak
Nak sanang dalam paratian
Jokok Upiak malawan juo
Ndak namuah dibujuak elok-elok
Upiak tau dikareh ambo
Ambo cancang jadi bubua
Ambo hiruik darah adiak
Kato jantan ambo katokan

Tapi kok adiak elok-elok
Amuah manuruik kato Kakak
Kakak tanai bak minyak panuah
Kakak junjuang bak mangkuto
Kakak turuikkan nan di ati
Kakak bari sagalo kandak

Mungkin ado Upiak mandanga
Pinang Masak acok kanai berang
Tapi itu dek salahnyo
Matonyo iyo tajam bana
Iyo maliek Sutan Maulano

Tapi sekarang kini nangko
Sutan Maulano alah mati
Mati dibunuah urang parampok
Sananglah pulo ati ambo

Kok inyo iyo iduik juo
Matonyo indak kan ditahannya
Iyo taradok adiak kanduang

Apo lai itu garan
Adiak iyo labiah rancak
Dari urang ka sadonyo

Bia kakak ko urang tuo
Lai pandai kakak garan
Manyanangkan hati paja-paja
Dek Puti Pinang Masak
Lai mah sayang nyo kaambo
Tapi apo kan di sabuik
Umua sakuaso bumi jo langik
Indak garan kuaso kito”

Dek pandai Rajo Angek Garang
Dilapehkannya mah kakinyo
Lah duduak inyo elok-elok
Sananglah hati Angek Garang
Dipacunyo kudo agak kancang

Dek lambek lamo di jalan
Sampai inyo ka Koto Lamo
Indaknya taruih ka ustanonyo
Tapi ka ustano Nilam Cahayo
Lah tagak urang di halaman
Maliek Rajonyo datang

Diambiak tali dek Datuak
Iyolah Datuak Manti Tuo
Dikabekkan kudo Balang Candai
Iyo ka batang kamuniang sakti

Saturun inyo dari kudo
Iyolah Rajo Angek Garang
Diturunkannya Mayang Taurai
Indak dilataknya di tanah
Dipangku lansuang naiak janjang
Pintu dibukak Nilam Cayo

Lah sampai ka dalam rumah
Inyo lansuang ka ruang tangah
Disinan barunyo baranti
Ditagakkannya Mayang Taurai
Tangannya mambalik pinggang
Iyo pinggang paja rancak þu
Bakato inyo maso itu

”Mano Kak tuo Nilam Cayo
Iko mah inyo adiak kakak
Urang rancak nan kakak puji
Ambo cakau ambo bawo tabang

Jinak bak ayam dalam kandang
Indak mambantah indak manulak
Sananglah þulo hati ambo

Nan sakarang kini nangko
Tarimo inyo di rumah ko
Kito dek alun lai baralek
Buruak jangga diliék urang
Kok inyo lansuang ka ustano

Manuruik kato ayah di sanan
Iyo di nagari Koto Tuo
Inyo alun manampak bulan
Ambek kito baralek daulu
Dalam sabulan duo nangko
Bia inyo tingga jo kakak sajo

”Kok jinak bana lah marpati
Elok inyo dijago bana
Indak cukuik jo sangka sajo
Dek kito manguruang inyo
Kakak agiah inyo batali
Iyo batali banang suto
Nan tidak lapuaknya dek ujan
Tidak lakangnya dek paneh

Alah ka jaleh tu dek **Kakak**

Dalam inyo bakato itu

Tangannya manggapai badan si Mayang

Areknya bak banang suto

Maalun paja jolong gadang

Lah lupo inyo ka berangnyo

Indak takana lai bancinyo

Malakok sajo inyo kini

Sanyum saketek ka Nilam Cayo

Mandanga kato nan bak kian

Bakato Puti Nilam Cayo

”Mano diak kanduang Mangkuto Ameh

Jikok baitu kato adiak

Sananglah pulo hati ambo

Kok inyo kan tingga siko

Batambah suko ambo garan

Jadi sumarak rumah gadang

Indak panah didiami gadih

Anak denai saurang sajo

Lah mati pulo inyo kini

Si Upiak Puti Mayang Taurai

Buliah paubek-ubek ati

Mano Upiak mano diak sayang

Ganti malah baju Upiak

Lah basah garan dek paluah

Mari kito kaateh anjuang

Buliah beko samo makan

Iyo jo inyo kakak kau

Iyo Tuanku rajo kami

Si Mayang tampaknya alah kanai

Dikabek tali banang suto

Tali ndak tampak dek mato

Indak taraso tu dek jari

Tali pitunduak jo pakasiah
Pakaian urang maso itu
Talabiah rajo rajonyo

Lorong kapado Angek Garang
Kabaapo bana kasanyo
Bak mano banalah jaheknyo
Tamak jo loba dipakainyo
Tapi taradok ka si Mayang
Inyo manih bak tangguli
Iyo lamak bagai santan

Sabagai pulo itu garan
Inyo disabuik alah gaek
Iyo urang tuo bangka
Dek bininyo alah sapuluah
Tapi ditiliak-tiliak bana
Kan barapo banalah umuanyo

Inyo kawin umua tujuah baleh
Memang adaik di maso itu
Sapuluah banalah bininyo
Hampia tiok taun dicaraikannya
Hanyo nan tuo nan gak lamo
Saratoi Puti Pinang Masak

Lorong ruponyo Angek Garang
Biapun indak anggun bana
Tapi lai tampan juo
Dek inyo anak rajo-rajo
Indak panah karajo barek
Indak tau manjantiak tanah

Sabagai pulo itu garan
Dek adaik di maso itu
Jakok Puti indak rancak
Indak kawin nyo jo rajo

Manuruik adaik biasonyo
Ditambiakan padō ayam
Kok induaknya lai kuriak

Anaknya kuriak juo
Kadang kadang manjadi biriang
Sakuiangnya lai bintiak juo

Lah baliak urang dari anjuang
Nilam Cayo jo si Mayang
Nasi alah mah tahidang
Lah makan urang nan barampek

Lah sudah minum jo makan
Bakato malah Angek Garang
Mano kakak nan baduo
Kak Datuak, kakak Nilam Cayo
Elok pai kakak barisuak
Iyo karumah Mayang Taurai
Jalang ayah sarato bundo
Bawolah siriah di carano
Carano ameh kakak bawo
Sabuik ambo mamintak maaf
Sagalo karajo nan talanjua

Katokan bana elok-elok
Dek Si Mayang tingga jo kakak
Manjalang kito kan baralek
Mukasuik ambo itu garan
Iyo andak baralek gadang
Kiniko alun lai takao
Dek kito abih baralek

Bia pulang ambo daulu
Bisuak pagi ambo kamari
Manolah Upiak Mayang Taurai
Eloklah tidua kateh anjuang
Adiak lah panek itu garan
Agak lamo duduak ateh kudo

MAMBUJUAK PUTI MAYANG TAURAI

Pagi-pagi itu garan
Baru baliak dari tapian
Alun kariang ambun di daun
Alah naiak Tuanku Angek Garang
Iyo ka rumah Kak Tuonyo
Pai basuo jo si Mayang

Alah sampai di ruang tangah
Tampak si Mayang sadang asik
Iyo manyusun nyusun samba
Malatakkkan piriang di hidangan
Disembango tangan pajan nantun
Dielonyo masuak ka surambi
Di sinan ado kasua pendek
Tampek duduak tamu nan datang
Lah duduak inyo kaduonyo
Iyolah duduak badakatan

Diraiahanyo kapalo si Mayang tu
Diciumnyo ubun-ubunnyo
Dilatakkannyo di ribaan
Digeraikannyo rambuik panjang
Diidu diusok-usok
Dirosoknyo muko lambek-lambek
Bakato inyo maso itu

”Mano diak sayang Mayang Taurai
Buah hati pangarang jantuang
Alah ko abih berang adiak
Ato ko iyo berang juo
Cubo garumeh muko kakak
Iyo sarupo nan kapatang
Gigik pulo tangan kakak ko
Mangapo adiak diam sajo

Lieklah bakeh gigik adiak

Amam gigi tagamba sinan
Untuang darahnya indak banyak
 Tapi kan capuak itu nanti
Kan jadi tando kasiah kakak

Nan salamo saluruik iko
Kakak basuo parampuan
 Alah sabaleh mah jo adiak
 Alun ado tu surang juo

Nan kakak bujuak macam iko
 Iyo diraiah ka pangkuan
Bialah sudah tu baralek

Si Mayang tadiam sajo
 dipaguik dipaluak dek Tuanku
Dicium pipi jo matonyo
 Inyo indak manggarik lai
Manyarah di lua tu tampaknyo
 Di dalam ndak ado rang nan tau

Ado sabanta antaronyo
 Datanglah Puti Nilam Cayo
Maajak makan inyo lai
 Tagalak sanyum inyo sanan
Maliek laku rang baduo

Nan adaik dalam nagari
 Kok urang alun lai kawin
Usahkan duduak badakatan
 Basuo sajo indak buliah
Indak buliah manuruik adaik

Sabuah pulo itu garan
 Gadih-gadih nan alun kawin
Mancaliak sajo dari jauah
 Indak barani inyo garan
Kunun kan duduak di ribaan

Lah makan urang nan barampek

Sarupo kapatang pulo
Bakato sanan Angek Garang
Manolah kakak kaduonyo
Alah ko cukuik itu garan
Siriah pinang jo caranonyo

Bajalan kakak baduo
Racaklah kudo Balang Candai
Usah mambawo dayang-dayang
Kok urang beko salah sangko
Mintak pakaian Mayang Taurai
Iyolah hanyo kain baju
Galang subang usah dibawo
Ado di siko untuak inyo

Agak pagi kakak bajalan
Usah hari paneh bana
Baru pulang sasudah makan
Jangan kakak baguluik bana
Tapikia pulo urang beko

Buek sajo sarupo biaso
Kito kan iyo badunsanak
Badunsanak sajak daulu
Bujuaklah urang nan baduo
Nak elok atinyo baliak

Mano diak sayang Mayang Taurai
Naiak diak kanduang kateh anjuang
Usah turun adiak kabawah
Sabalun pulang kakak kito
Bawo makanan tangah hari
Makan di anjuang adiak nanti

Sabagai pulo tu diak kanduang
Usah upiak mangecek-ngecek
Iyo jo urang di rumahko
Biapun inyo dayang-dayang
Baitu di rumah nan di muko

Sampai kito baralek nanti
 Bia pulang ambo daulu
Beko sanjo ambo kamari
 Mandanga kaba dari kakak

Lah patang kironyo hari
 Lah pulang urang nan baduo
Pulang nan dari Koto Tuo
 Mambawo pasan dari sinan

Naiaklah Puti Nilam Cayo
 Naiak ka ateh anjuang ameh
Tampak si Mayang sadang duduak
 Sadang **malantua-lantua** jari

Ndak tampak garan di mukonyo
 Inyo nan sadang rusuah risau
Gadanglah ati Nilam Cayo
 Bakato inyo maso itu

”Mano diak kanduang Mayang Taurai
 Iko mah kain baju Upiak
Lai ditarinyo jo elok
 Iyo dek adiak Pamato Intan

Sanangkan hati adiak siko
 Usah dirusuah dirisaukan
Nan kan manjago ayah bundo
 Inyo baduo alah mah tanang
Mandanga Upiak indak **lai** berang
 Iyo kapado kakak Upiak
Diak Rajo Mangkuto Ameh

Tasanyum sajo Mayang Taurai
 Indak inyo bakato sapatah
Iyo sajak kapatangtu
 Indak padlo siapo tido

Diambiaknyo baju nan agak rancak
 Digantinyo pakaiannya

Barunyo turun ka surambi
Nilam Cayo alah daulu

Baru tibo di tanggo bawah
Angek Garang alah mananti
Dipangkunyo kakasua pendek
Duduak baduo bak paginyo

”Rancak bana adiak den kini
Bidodari dari kayangan
Bak Mambang kalua dari lauik
Iyolah dewi dari rimbo
Sasuai bana baju nangko
Untuak pakaian adiak sayang
Bawo tangan adiak kamari
Amak denai agiah bagalang
Nak batambah rancak adiak sayang
Bia denai batambah gilo

Lah sudah galang talákek
Tangan iyo batambah rancak
Dimainkan dek Angek Garang
Dicium digigik-gigik
Mayang Taurai aniang sajo

Lah datang pulo rang maimbau
Iyo untuak makan malam
Lah tagak inyo keduonyo
Lah samo makan kasadonyo

Bakato sanan Angek Garang
”Manolah kakak keduonyo
Ambo mambali katitiran
Katitiran nan alah mau
Lah salah bali ambo kironyo
Tabali jo anak puyuah
Usah inyo kan basiputu
Mandanguih sajo inyo ndak amuah”

Lah sudah minum jo makan
Lah pulang Tuanku Mangkuto Ameh
Barisuak pagi datang pulo
Mambawo dukuah bungo tanjuang
Nan batabua pamato intan
Sasudah dukuah di kaluangkan
Iyo ka lihia Mayang Taurai
Dicimumnyo lihia itu
Dicium sapueh hati
Sudah itu dicakiaknyo
Dicakiaknyo sampai mangasan
Disangko si Mayang kan mamakiak
Tapi inyo diam sajo
Antok aniang saribu kato
Baitu hari barikuiknyo

Lah sampai duo kali tujuah
Taruih baitu dibueknyo
Iyo dek Sutan Mangkuto Ameh
Lah cukuik barang dibawonyo
Galang tangan galang kaki
Sapasang-sapasang itu garan
Subang jo cincin alah pulo

Barang tu malakek di badannya
Iyo di badan Mayang Taurai
Tapi inyo aniang juo
Usah mangecek inyo amuah
Tasanyum sajo inyo indak

Romannyo batambah rancak
Maalun urang bapingik
Indak ado kalua rumah
Indak buliah sato bakarajo
Karajonyo basikek jo babadak

Nyampang urang ko indak tau
Inyo lai pandai mangecek

Mangecek basando gurau
Badendang maayun anak
Mungkin disangko inyo garan
Si Mayang rang bisu bana
Iyo si bisu biasonyo
Pandai galak pandai mamakiak
Mangecek juo jo isaraik
Tapi rang bisu nan surangko
Saroman tunggua mati sajo

Kapado Puti Nilam Cayo
Inyo nan angguak geleng sajo
Takadang sanyum nyo saketek
Bakato sapatah tidak

Lah pai garan Nilam Cayo
Karumah Puti Pamato Intan
Bacarito inyo tantang itu
Disabuik juo itu garan
Barang-barang nan diagiahnyo
Dibali baru kasadonyo
Tantang barang Puti Pinang Masak
Kan alah diberikan kasadonyo
Iyo kapado Pamato Intan
Katiko maratuih hari

”Manolah adiak Pamato Intan
Biasokoh itu garan
Inyo babuek nan bak kian

Bagateh marajuak macam itu
Indak amuah minum makan
Indak amuah bakato kato

Manolah kakak kanduang ambo
Iyo kakak Nilam Cayo
Dari paja nan batigo
Iyo batigo anak ambo
Inyo garan nan paliang saba

Inyo urang panuruik bana
Indak paganyi indak parajuak
Inyo suko bakarajo
Indak manyuruah dayang sajo

Galaknyo sapanjang hari
Keceknyo bak murai batu
Badendang inyo suko pulo
Tadanga sampai ka halaman

Kandaknyo indak panah banyak
Apo diagiah nyo tarimo
Kito iyo dipaluaknyo arek
Tandonyo tarimo suko
Heran pulo ambo kironyo
Mangapo inyo baitu

Apo kecek Pamato Intan
Disampaikan Nilam Cayo
Iyo kapado dang adiaknyo
Heran bana tu kironyo
Iyo Tuanku Mangkuto Ameh
Dek inyo takana juo
Wakatu alek nan lah sudah
Riangnyo tampak dalam nan banyak
Kiniko mangapo nyo barubah

Kok inyo tarang indak suko
Tantu inyo berang-berang
Inyo ndak namuah didakeki
Kini inyo bak anak kuciang
Di dakeki inyo malakok
Mangeong sakali indak

Alah sampai garan sabulan
Inyo tingga di Koto Lamo
Parangainyo alun barubah
Lah macam aka Angek Garang
Inyo dicubiak aniang sajo

Digalitiak inyo indak bagarak
Iyo sabagai tunggu mati
Untuang lai amuah bajalan

Ado pada satu katiko
Lah tabik berang Angek Garang
Dek inyo nyato rang pemberang
Lah habih garan sabanyo
Bakato inyo maso itu

”Anak sarau anak cilako
Anak singiang-ngiang rimbo
Awak tuo dipamainkan
Dibuek bak anak ketek
Turun kau dari rumah ko
Den bawo kau ka tapian
Nak den dabiah den cancang haluih
Bia den isok darah kau
Siapo urang nan ka berang
Kok datang ayah mandeh kau
Kan abih juo inyo garan
Hancua di mato padang denai”

Lah tagak Puti Mayang Taurai
Turunlah inyo ka halaman
Dituruikkan dek Angek Garang
Dibalakangnyo Nilam Cayo

Bajalan gontai Puti Mayang
Dituruik jalan ka tapian
Indak tampak saketek juo
Dek inyo alah mah takuik

Nan takuik bana itu kini
Iyolah Puti Nilam Cayo
Inyo tau laku adiaknyo
Urang nan indak panah suruik
Katonyo tatap nyo tapati
Bia manyasa kamudian

Indak mamusiang tu dek inyo

Bajalan capek Angek Garang

Maulonyo tibo di tapian

Dielonyo padang dari saruang

Diasah pado batu licin

Ado sabanta sudah itu

Lah tibo garan nan baduo

Bakato Puti Nilam Cayo

"Mano diak Kanduang Puti Mayang

Lakeh lah sambah kakak kau

Usah katonyo nyo lakukan"

Tapi si Mayang diam sajo

Inyo tagak indak bagarak

Mahadoki matohari tabik

Rusuahlah hati Nilam Cayo

Inyo lah sayang ka si Mayang

Alah sabulan mah bacampua

Manangih inyo maso itu

Bakato pado dang adiaknyo

Mano diak Buyuang Mangkuto Ameh

Usah mukasukil dilalukan

Manyasa gadang buyuang beko

Salah paja ko alun tantu

Inyo taruih manyarah sajo

Sagalo kato dituruiknyo

Tasabuik Rajo Angek Garang

Lah berang bana inyo garan

Mamakiak inyo maso itu

"Bia padang ko makan darah

Nak sanang bana ati kau

Nan elok urang pabuek

Di kau indak nan mangasan"

Dikaja garan Mayang Taurai

Iyo dek Rajo Angek Garang

Padang tahunuih di tangannya
 Bakilek kanai cahayo
Tapakiak Puti Nilam Cayo
 Antah siapo nan manolong
Tataruang tampak Angek Garang

Tatalungkuik di balakang si Mayang
 Padangnyo iyo tapalantiang
Diambiak dek Nilam Cayo
 Dilantiangkannya jauah-jauah

Ado sabanta sudah itu
 Alah mah duduak Angek Garang
Managih inyo maso itu
 Manangih taisak-isak
Inyo kareh iyo bak setan
 Sajak inyo alah mah gadang
Alun panah inyo manangih
 Bininyo lah banyak mati
Anaknyo iyo ado pulo
 Alun panah satitiak juo
Aia matonyo nan kalua

Maliek cando nan bak kian
 Dibaliakkan badan dek si Mayang
Tapi inyo tagak luruih juo
 Diambiak tangannyo dek Puti Nilam
Dielonyo ka rajo Angek Garang
 Dek inyo manuruik sajo
Dipaluak badannyo dek Rajo Angek
 Dipangku dibawo pulang
Dituruikan dek Puti Nilam Cayo
 Heranlah urang tangah jalan
Apo gerangan nan tajadi

Sajak maso katiko itu
 Sakali tidak itu garan
Angek garang naiak rumah gadang

Tampat tingga Mayang Taurai
Tapi inyo bagarak kini
 Manyiapkan alek nan gadang
Labiah gadang inyo kandaki
 Dari alek Puti Pinang Masak

Rangkiang tujuah di laman ustano
 Inyo suruah kariangkan sajo
Rangkiang si Tinjau Lauik
 Gajah menong si kapuak gadang
Alah cukuik itu garan

Untuak alek sanagari tu
 Tapi inyo alun sanang
Disuruah juo itu lai
 Mangosongkan nan ampek lai
Disuruah jamua padi sadonyo
 Disuruah tumbuak barami-rami

Baitu juo kabau jo jawi
 Inyo bali banyak-banyak
Agak barubah tu saketek
 Iyo dari nan sudah-sudah
Sabab iyo nan sudah-sudah
 Kok inyo handak baralek
Disuruahnyo sajo rakyatnyo
 Maantakan bareh jo kabau
Iyo sagalo nan paralu

Lorong dek Rajo Koto Tuo
 Lai dijapuik untuak barundiang
Untuak jadi si pangka alek
 Tapi inyo agak mailak
Datangnyo sakali duo kali
 Dek sagan di urang banyak
Katiko basuo jo si Mayang
 Talabiah Puti Pamato Intan
Abih manangih katigonyo

Bapasan ayah jo bundo
Iyo kapado Mayang Taurai
 Dari padu buruak nan tasuo
Elok inyo manyarah sajo
 Manuruikkan nan di urang
Dek awak indak batanago
 Kan malawan kuaik urang

Tasabuik Puti Mayang Taurai
 Inyo iyo nak mancuboi
Baapo bana itu kini
 Sayangnyo Tuanku Angek Garang
Hingga rela inyo mati
 Dibunuah Angek Garang di tapian
Dek Angek Garang lah manyasa

Sampai baurai aia mato
 Inyopun kini alah tanang
Alah manyarah sapanuahnyo

Dalam alek itu garan
 Inyo lah baliak bak samulo
Iyo urang nan ramah tamah
 Urang nan galak suok kida
Baitu tahadok suaminyo
 Alah mah inyo manuruik sajo
Indak lai babisu-bisu
 Awak di dalam tangan urang
Apo lai nan ka dikarehkan
 Sananglah hati Angek Garang
Lah tampak pulo mah sayangnyo.

SUTAN MAULANO

Lorong kapado Sutan Maulano
 Nan alah disabuik juo
Iyo nan lari kalua kota
 Lah payah andehnyo yo mancari
Inyo nan indak dapek juo

Mulo mulo itu garan
 Inyo pai ka Koto Tuo
Di sinan ado kariknyo
 Iyo mamak dek andehnyo
Adiak Rajo Mangkuto Ameh Tuo
 Nan digantikan Angek Garang

Tantang Sutan Mangkuto Ameh
 Bukan ndak buliah jadi rajo
Manggantikan yo kakaknyo
 Tapi inyo indak amuah
Dek nagari kacau **balau**
 Dikacau dek Angek Garang
Angek Garang nan dari ketek
 Mausahokan dirinyo jadi rajo

Katiko datang Sutan Maulano
 Talonjak raso hatinyo
Kamanakan ko iyo acok datang
 Tapi lamo ndak tampak-tampak

Mano ang Buyuang cucu denai
Mangapo lamo ndak kamari
 Taragak niniak padu Buyuang
Apo kaba ayah jo andeh Buyuang
Lah lamo bana ndak kamari

Ampun ambo niniak kanduang
 Makonyo kami jarang kamari
Karajo barek dalam kampuang

Iyo ka sawah jo ka ladang
Manolong urang sarayo
Dek ayah banyak karajonyo
Untuak nagari Pakan Lamo

Tantang mamak kanduang ambo

Iyo Tuanku Mangkuto Ameh
Niniak iyo kan tau juo
Baapo bana kurenahnyo
Tahadok urang di nagari
Kok indak ayah nan manyalanggarokan
Handam karam Koto Lamo
Rugilah kito kasadonyo

Mangko ambo kiniko datang
Hambo lari ko mah niniak
Dek ulah jahek mamak ambo
Di mato ambo itu garan
Amai ambo iyo bininyo
Ditarajangnyo dari ateh janjang
Bagolek-golek ka batu tapak
Tampaknyo indak banyawo lai

Mamak ambo sadang camburu
Kami mengecek tu sabanta
Ambo iyo ditarajang juo
Iyo jatuah kaateh amai
Iyo untuang untuak ambo
Tapi cilako untuak amai
Tantu matinyo dipalakeh

Sadang inyo mangecek-ngecek
Iyo niniak jo cucunyo
Datang urang manyuruah makan
Lah tagak garan kaduonyo
Iyo masuak ka ruang tangah
Nasi talatak di hidangan

Dibukak Sutan tuduang saji
Lah makan inyo kaduonyo

Baru sudah minum jo makan
Datang urang maimbaukan
Ado dubalang Koto Lamo
Andak basuo jo niak Sutan

Barawari Sutan Maulano
Lari inyo ka dalam biliak
Kadalam biliak niniaknyo

Dek anduangnya alah maningga
Barani sajo inyo masuak

Lorong kapado Sutan Tuo
Dituruiknyo urang ka halaman
Disurua masuak itu garan
Manyambah dubalang maso itu

”Ampunlah ambo di Tuanku
Usah ambo naiak pulo
Kaba buruak nan ambo bawo
Iyo Andeh Puti Pinang Masak
Lah daulu inyo garan
Inyo mati tibo-tibo
Tajatuah di janjang ustano
Dek tampak panyakiknyo
Sabanta tibo di ustano
Sapakiak duo nyo mamakiak
Ilang nyawonyo maso itu

Ampunlah ambo inyiak Sutan
Barangkek ambo daulu
Ambo alun masuak ustano
Iyo Ustano Koto Tuo
Dek iko nan labiah dakek
Kamari ambo daulu
Kanai berang ambo beko

Kok ambo lambek kasanan
Kok baitu janyo du balang
Denai lapeh dubalang pai
 Bia alun minum jo makan
Manuruik adaik biasonyo
 Katokan padu Mangkuto Ame
Sarato Puti Nilam Cayo
 Baitu pulo Sutan Maulano
Sarato ayah kanduangnyo
 Ambo lai mah kan datang”

”Ampunlah amboi nyiak Sutan
 Tantang Tuanku Sutan Maulano
Indak di rumah tu mah kini
Ambo ko iyo disuruah
 Disuruah andeh Puti Nilam
Iyo mancari Tuanku Sutan

Tapi sakarang kini nangko
 Dek iko suruhan rajo kito
Iko nan ambo karajokan
 Ambo takuik padu baliau
Iyo baliau Tuanku Rajo”

Mano dubalang urang mudo
 Memang iko nan labiah paralu
Tantang si buyuang Sutan Maulaño
 Urang jantan tu mah dubalang
Jantan badan jantan hatinyo
 Indak usah dicari bana
Inyo itu kan pulang juo”

”Ampunlah ambo Inyiak Sutan
 Ambo barangkek anyo lai
Iyo barangkek ka ustano
 Ustano nagari Koto Tuo
Lah pai dubalang Koto Lamo
 Lah naiak Sutan Mangkuto Ame

**Lansuang sakali kadalam biliak
Basuo dengan Sutan Maulano**

Mano ang buyuang Sutan Maulano
Denai iyo sangaik suko
Kok buyuang tingga di siko
Tapi untuak buyuang surang
Babahayo tu nak kanduang
Nagariko iyo dakek bana
Jo nagari Koto Lamo
Pado pikiran hati denai
Elok buyuang ka Koto Anau
Katampek mamak ang nan di sinan
Urang saayah jo andeh buyuang

Inyo iyo lai mudo juo
Iyo adiak dek Nilam Cayo
Tapi kakak dek Rajo Mangkuto
Sabagai pulo itu buyuang

Inyo banyak kapandaian
Iyo ilmu nan baguno
Mamak ang Tuanku Mangkuto
Banyak baguru pado inyo

”Jikok baitu kato Niniak
Sananglah pulo hati ambo
Tapi anyo akan sabuah
Ambo alun panah kasinan
Iyo nagari Koto Anau
Jalan ambo itu garan
Iyo sampai Supayang sajo
Indak buliah dek andeh ambo
Iyo ambo bajalan jauah”

”Lalok Buyuang di siko daulu
Barisuak kito barangkek
Bia niniak maanta Buyuang
Nak sanang hati Nilam Cajo

Baeko ambo barundiang
Barundiang baduo sajo
Iyo jo Upiak Nilam Cayo”

Pailah sutan Mangkuto Ameh
Pai ka nagari Koto Lamo
Pai manjanguak nan kamatian
Iyolah Sutan Angek Garang
Kok Tuo banalah inyo
Tapi dek lai nyo barato
Disurahnyo juo yo anaknyo
Anaknyo nan laki-laki
Mambawo kabau yo saikua
Antahuntuak panigo hari
Antahuntuak panujuah hari
Pulang maalum pado si pangka
Maalum rajo kamatian
Indak saketek itu paralu
Iyo padi sarato taranak

Dek inyo pai bakudo
Agak talakeh inyo tibo
Dari urang nan lain-lain
Ditanyokannya Angek Garang

Disabuik urang sadang sakik
Iyo di atah anjuang ameh
Dicarinyo si Nilam Cayo
Ditanyokannya Sutan Maulano
Alah manangih inyo garan
Iyo urang si Nilam Cayo

Dibawo dek Sutan Mangkuto
Kamanakannya itu garan
Baganjua ka suduik rumah
Dibisiakkannya lah di sinan
Baso si Sutan di rumahnyo

Kan diantanyo barisuaknyo
Iyo ka tampak adiiak si Nilam
Iyo ka nagari Koto Anau

Sananglah hati Nilam Cayo
Memang itu labiah elok
Kok mati Pinang Masak
Gantinyo tantu mudo juo
Camburu adiaknyo Angek Garang
Indakkan dapek dipadami
Ditanyo ati keteknyo
Tantulah ibo itu garan
Anak surang timbunan sayang
Alah buliah barumah tanggo
Tapi dek alun amuah juo
Kini kan bacarai tu jo inyo
Antah dalam barapo lamo
Bumi jo langik nan ka tahu

Lah pai garan dang mamaknyo
Dicarinyo Datuak Manti Tuo
Dibisaikkannyo kaba tadi
Tananglah pulo Rajo Gumanti
Karajo banyak kan dikaykok
Usah anak mambuek rusuah pulo
Tantang urang nan baduo ko
Ayah jo andeh sutan Maulano
Kok ado urang nan batanyo
Tantang anaknyo Sutan Maulano
Dikatokannyo agak sakik
Mancari dukun ka Supayang

Pado hari barisuaknyo
Tantang urang Sutan Maulano
Mamintak izin inyo garan
Pai karumah Tuanku Tuo
Andak basuo jo Mayang Taurai
Alah tibo inyo di situ

Didapekinyo si Mayang tingga surang

Ayah jo andehnyo tu garan

Babaliak ka koto Lamo

Disinan banyak karajo

Si Bungsu Urai menuruik pulo

Sananglah ati Sutan Maulano

Dapek inyo barasio

Baitu pulo Mayang Taurai

Uranglah lamo baintaan

Dikatokan si Sutan pado si Mayang

Inyo ka pai ka Koto Anau

Tapi kok ado urang batanyo

Katokan ndak tau sajo

”Manolah adiak Mayang Taurai

Buruak bana nasib ambo ko

Awak lai kamanakan rajo

Kan iduik jadi urang kampuang

Malarik di rantau urang

Manumpang pado makam tiri”

Manolah kakak Sutan Maulano

Usah kakak manangisi nasib

Nan alun Kakak jalani

Antah mah elok nan mananti

Di mano Kakak dapek tau”

”Dimanolah dapek iyo nan elok

Namonyo sajo pai marantau

Ujan ameh dirantau urang

Ujan batu di nagari awak

Elok juo tingga di kampuang

Sabagai pulo tu di adiak

Kok urang pai marantau

Mambawo pitihnyo kan pokok

Iyo awak ka rantau urang

Mambawo jari nan sapuluah

Sarato lidah jo gigi sajo
Di mano kan turun ujan ameh”

Tagalak Puti Mayang Taurai
Bakato inyo maso itu
”Kak Sutan urang anggun tampan
Indak kan sarik tu dek kakak
Iyo mancari ujan ameh
Mungkin nuri di sangka ameh
Inyo jatuhknn mah taluanyo
Taluwa manjadi ujan ameh”

Tatakua Sutan Maulano
Agak sabanta itu garan
Katiko mati diangkeknyo
Balinang cando aia mato
Jo galak inyo ilangkan

”Mano diak Mayang Taurai
Tampan nan tidak jadi pokok
Indak dapek dipadagangkan
Awak rancak kupiah teleng
Diliiek saku ndak barisi
Urang di mano nan kau suko

Sabagai pulo tu diak kanduang
Ambo iko iyo urang malang
Mukasuik ati mamaluak gunuang
Apo dayo tangan ndak sampai
Dek mato alah tapikek
Ati iyo lah lakek pulo
Mato jo ati ndak nyo tau
Di mano inyo patuik inggok
Bak pungguak marindukan bulan”

”Mangapo kakak mangino bana
Kakak iyo kamanakan rajo
Kok mati Tuanku Angek Garang
Tantu kakak kan manggantikan”

Itu adai tu diak kanduang
Limbago biaso nyo dituang
Tapi padu diri ambo
Jauah tampaknyo jalan kaken

Pabilo inyo kan mati
Namonyo sajo Angek Garang
Di sabuik dek anak mudo-mudo
Inyo tu iyo kuaik kaba
Ilimunyo sabakua buruak
Apo dikandak apo dapek

Urang iyo benci ka inyo
Tapi ndak ado nan barani
Iyo malawan kapadonyo
Piganta pitunduak nan dipakainyo
Mampan bana itu garan

Tinggalah adiak Mayang Taurai
Ambo pai mambawo untuang
Kok adiak lah masuak nanti
Iyo disangka ameh urang
Siapo juo lah urangnyo
Cubo juolah sakali-sakali
Maliek bulan sadang panuah
Di sinan tabayang isuak
Mato si Pungguak marindukanyo”

Manolah kakak Sutan Maulano
Salamaik kakak bajalan
Tantang dek diri ambo nangko
Indak taragak tu dek ambo
Andak masuak ka sangka ameh
Kok urang nan punyo sangka
Indak suko dek hati ambo”

”Mano diak kanduang Mayang Taurai
Usah lamo ambo di siko

Salah pulo tampak dek urang
Sabagai pulo itu garan
Niniak ambo lamo mananti
Iyolah inyiak Sutan Mangkuto
Jawek diak kanduang salam ambo”

Bajalan turun Sutan Maulano
Lah tingga Mayang Taurai
Galak babuek keduonyo
Dek galak malipua malu
Hati mah itu samo kanai
Jalan manghubuang indak tampak
Marameh paruik keduonyo

Maninjau padilah masak
Batang naneh di ujuang jalan
Hati risau dibawo galak
Bak paneh manganduang ujan

Lah sampai sutan Maulano
Di rumah niniak sutan Mangkuto
Nasi tahidang kan dimakan
Lah makan pulo keduonyo
Bakato garan Sutan Maulano

”Ampunlah ambo niniak kanduang
Ambo iyo kan niniak anta
Gadang tu garan ati ambo
Tapi baapo itu garan
Kain baju ndak tabawo
Salain dari nan di badan
Adokoh urang nan manjua
Atau babaliak ambo daulu”

”Manolah Buyuang Sutan Maulano
Usah Buyuang mambali siko
Jangan pulo Buyuang babaliak
Pakai dek Buyuang kain niniak

Ado tu garan ciek duo
Buliah pulo niniak mamintak
Ka anak niniak ciek surang
Alah banyak itu baeko

Sabagai pulo itu Buyuang
Kok Buyuang mamakai kain baju
Iyo punyo Buyuang sandiri
Sapanjang nan niniak liek
Iyo pakaian anak rajo-rajo
Labiah tu beko urang tau
Adok kamano Buyuang pai
Sanang sajo urang mancari

Salain pulo dari itu
Kito iyo baduo sajo
Nan kan bajalan dalam rimbo
Jalan satapak itu Buyuang
Kok basuo urang nan jahek
Payahlah kito ka mailak

Bia Buyuang manyaru daulu
Manyaru jadi urang kampuang
Buliah salamaik jalan kito
Itan di dalam rimbo rayo

Kok lah pulang denai nanti
Iyo dari Koto Anau
Barang sabulan duo bulan
Denai nan tibo di nagari ko
Denai ka pai ka Koto Lamo
Mambawo baju nan Buyuang pakai
Iyo nan Buyuang pakai kini
Kapado Upiak Nilam Cayo
Kan denai suruah mah rewakkan
Kapado urang sanagari
Baso bajuko niniak bali
Dari urang manggaleh

Isuah niniak kaba kan pulo
 Bahaso niniak iyo mandanga
Dek buyuang alah mah mati
 Dibunuah urang parampok
Itan jauah di Rimbo Panjang
 Di jalan ka Alahan Panjang
Kok itu alah tadanga
 Iyo dek mamak kanduang buyuang
Lah sanang malah atinyo
 Sanang pulo buyuang di rantau
Indak dikutiak urang lai

Kok taragak Buyuang isuak
 Nak basuo jo andeh bapak
Bia inyo pai ka sanan
 Kok lai ambo iduk juo
Ambo malah maantakannyo
 Adokoh sanang ati Buyuang”

Jakok baitu kato niniak
 Lah sanang garan ati ambo
Kok lah buliah kito barangkek
 Amak mandi ambo daulu
Mano garan pakaian niniak
 Iyo nan kan ambo pakai”

”Manolah Buyuang urang mudo
 Alah ase garan niniak buyuang
Iyo dari malam cako
 Iko baju nan ka dipakai
Iko pulo nan kan dibawao
 Nasi jo samba ado pulo
Untuak kito makan di jalan
 Kok lambek basuo lapaun
Usah kito kalaparan

Baju buyuang nan dipakai ko
 Tinggakan malah di siko

Kan tando bukti itu nantik
 Bahaso Buyuang alah mati
Kok lah sudah buyuang ba kameh
 Sabalam buyuang pai mandi
Basuo malah buyuang beko
 Iyo jo anak-anak ambo
Katokan buyuang agak sakik
 Nak pai kini ka Supayang
Dek ambo nan kan maantakan”

Lorong dek urang Sutan Maulano
 Manuruik sajo inyo garan
Niniaknyo nyato urang cadiak
 Urang tuo bapangalaman
Tampek batanyo urang banyak

Usah kito panjangkan kisah
 Tantang urang nan baduo
Sutan Maulano jo niniaknyo
 Salamaik sajo nyo di jalan
Sampailah inyo kaduonyo
 Di nagari Koto Anau

Nagari rancak labuanyo gadang
 Pudiang ameh batimba jalan
Rumah-rumahnya rancak pulo

Baitu kapuak rangkaingnyo
 Banyak baukia aia ameh
Sanang hati Sutan Maulano
 Kan diam di nagari tu
Kok inyo lai ditarimo
 Dek mamaknyo Datuak Majo Lelo

Indak payah urang mancari
 Nan mano rumah Majo Lelo
Dek Urang Sutan Mangkuto
 Alah panah inyo kasinan

Sangkek kakaknyo iduk juo

Iyo ayah Nilam Cahyo

Lah tibo urang di halaman

Iyo halaman rumah gadang

Rumahnya Datuak Majo Lelo

Batanyo Garan Sutan Mangkuto

Kok datuak lai nyo di rumah

Lah turun Datuak Majo Lelo

Agak takajuik inyo garan

Maliek urang nan datang tu

Urang nan datang dari jauah

Inyo nan lupo-lupo ingek

Katiko alah disabuik

Iyo dek urang Sutan Mangkuto

Siapo inyo garan

Siapo urang nan dibawo

Sananglah hati Majo Lelo

Raso basuo jo kakaknyo

Iyo jo Puti Nilam Cahyo

Dek Jaleh di mukonyo

Inyo itu agak heran

Maliek pakaian Sutan Maulano

Dicaritakan malah dek iniak sutan

Baapo asa mulonyo

Mangko inyo sampai kasinan

Mamintak pulo Sutan Mangkuto

Usah nan lain diagiah tau

Bahaso Maulano urang gadang

Sabuik sajo cucu inyo

Datang ka sinan nak badagang

Lai mambawo kain baju

Lah habih garan parundingan

Baru inyo dibawo naiak

Iyo naiak ka rumah gadang
Rumah gadang sambilan ruang
Baanjuang suok jo kida
Sarupa Ustano Koto Lamo

Indak kito panjangkan kisah
Sutan Maulano ditarimo elok
Ditarimo jo gadang ati
Iyo dek Datuak Majo Lelo
Inyo banyak mambawo kain baju
Ditambah pokok dek Majo Lelo
Disuruahnyo Sutan baniago
Amak urang samo picayo
Maulano bukan sutan-sutan
Tapi cucu Sutan Mangkuto
Iyo urang Koto Tuo

Di nagari Koto Anau
Namo diganti itu garan
Iyo dengan Bujang Maulano
Inyo sudaga kain baju

Lah sanang tampak Bujang Maulano
Barangkek malah Sutan Mangkuto
Pulang babaliak ka Koto Tuo
Dianta dek Datuak Majo Lelo
Dek inyo ko kan pai juo
Ka nagari Koto Lamo
Pai manjanguak dang adiaknya
Iyolah Rajo Mangkuto Ameh
Nan baru kamatian bini

Sananglah ati Nilam Cayo
Basuo jo adiak Koto Anau
Tampek manumpang Sutan Maulano
Wakatu adiak ko handak pulang
Dikirimkan pakaian Sutan Maulano
Dikirim pulo itu garan

Iyo ameh sapuluah taia
Kan pokok Sutan baniago

Katiko baralek Rajo Angek Garang

Baralek jo Mayang Taurai

Babaliak Datuak Majo Lelo

Iyo kanagari Koto Lamo

Inyo datang jo padusinyo

Mambawo ameh lai sataia

Pado maso dewaso itu

Mamintak inyo bakeh kakaknya

Kok lai izin kakaknya

Handak maambiak Sutan Maulano

Iyo untuak anak gadihnyo

Nan banamo si Cinto Manih

Manolah kakak kanduang ambo

Ambo datang kamari nangko

Indak untuak baralek sajo

Ado tu kandak bakeh kakak

Dek itu padusi ambo bawo

Tantang si Buyuang anak kito

Anak kito Sutan Maulano

Lah ampia satahun nyo jo ambo

Disiko taraso hari tu pendek

Dek kakak baralek taruih

Mulai dari kamatian

Alah sampai maratuih hari

Sampai pulo baturun mandi

Nan kiniko baralek pulo lai

Dek kami iyo urang kampuang

Tiok pagi tiok patang

Karajo nan itu itu juo

Indak ado tukuak tambahnyo

Indak manurun indak mandaki

Taraso bana yo panjangnyo

Bukan ambo bosan tu kak tuo
Maliek kamanakan kanduang
Tingga jo awak dalam rumah

Tapi iyo sabaliaknyo
Bagadang ati kami garan

Tapi sabaliak itu kini
Maingek umuanyo alah lanjuik

Kok ambo indak salah etong
Lah ampia garan dua puluah

Lah patuik bana inyo garan
Iyo pulang karumahnyo

Dek ambo baitu pulo
Kakak lai tau juo
Ambo punyo anak gadih

Iyo inyo si Cinto Manih

Dek urang ko lah samo patuuh
Sumbang jangga di caliak urang

Dek inyo tingga sarumah
Maalun kakak tantang itu

Sabagai pulo itu kakak
Kami indak punyo dayang-dayang

Sagalo karajo ateh rumah
Si Cinto Manih mangarajokan

Juo mancuci kain baju
Tamasuak kain baju Maulano

Maulano panah mah manyabuik
Hatinyo alah panah kanai

Iyo ka puti Mayang Taurai
Kiniko si Mayang alah kawin

Siapo lai dinantinyo

Tantang si Upiak Cinto Manih
Ado juo mah rancaknyo

Iyo indak sarancak i si Mayang
Maireh ireh ado juo

Inyo babako bakeh kakak
Kok indak kan sarupo
Dek inyo iyo anak kampuang
Saketek tabawo juo
Roman kakak di mukonyo

Nan sakarang kini nangko
Di kakak kaputusannyo
Sarato kakak Manti Tuo
Maulano manyarah **bakeh kakak**

Sabuah lai nan takana
Sutan Maulano iyo tungkek rajo
Kok mati Tuanku Mangkoto Ameh
Iyo inyo nan ka manggantikan
Kok tajadi itu beko
Sutan mamiliah gadih lain
Untuak manjadi **Andeh Suri**
Kami indak kan ketek hati
Baitu juo Cinto Manih”

”Mano adiak kanduang Majo Lelo
Sarato andeh si **Cinto Manih**
Kato kalian alah didanga
Kok pintak alah mah sampai
Amek kalian pulang daulu
Kakak handak barundiang garan
Iyo jo kakak jo Gumanti
Lah panah inyo manyabuik
Akan manjapuik si Maulano
Untuak kamanakan kanduangyo
Nan banamo Reno Bulan”

Pado hari barisuaknyo
Tantang Datuak Majo Lelo
Dipanggia inyo dek kakaknyo
Iyo kakaknyo Rajo Gumanti
Bakato Tuanku Manti Tuo

”Manolah adiak Majo Lelo
Lah sampai tu mah ka ambo
Kato kalian nan kapatang
Pado pikiran hati kakak
Itulah kato paliang elok
Sasui kandak bumi jo langik

Anak ambo pai lari
Mancari tampek nan bataduah
Mancari urang tampek balinduang

Sabanyak iko dunsanak kito
Mangapo ka adiak inyo lari.
Di Salak ado dunsanak
Di Salayo mah ado pulo
Rumah adiak nan dicarinyo

Lah kandak langik tu diak kanduang
Satuju dek bumi pulo
Di sinan mananti yo jodonyo
Asam di gunuang garam di lauik
Batamu dalam balango
Kok ambo rabuik itu dangai
Dek sayang kakamanakan
Mungkin nan buruak nan tasuo

Sampaikan sajo ka si Buyuang
Usah mancaliak ka nan lain
Kandak bumi sarato langik
Lah tatulih sajak daulu
Tasurek di tapak tangan
Hanyo kitoko nan indak tau

Buek rundingan masak-masak
Suruah urang manjapuik kami
Rumah iko sarato ustano
Katokan adiak ka baminantu
Baminantu urang Koto Tuo

Kok lai kami sejaik sejaik
Kami ka datang tu baeko
Manjadi alek adiak kanduang
Usah tabatiak tabarito
Siapo si Sutan sabananyo
Tantang Tuanku Rajo kami
Inyo alun picayo bana
Baso si Sutan alah mati

Katiko kami mandanga kaba
Kami iyo indak baralek
Mambaka kumayan indak pulo
Manyarahkan arwahnyo kateh langik

Kami hanyo manangih sajo
Urang nagari badatangan
Mambawo pisang buah lain
Manyangko kami kan baralek

Kok datang inyo ka alek
Pandai-pandai malipua jajak
Saketek usah mangasan
Untuak manyimpan rasio ko

"Kok baitu kato kakak
Lah sanang pulo hati kami
Barisuak kami kan pulang
Tibo di rumah itu nanti
Kami ajak urang barundiang

VII. SI BONGSU URAI

Baliak kito ka pangka kaji
Iyo nan mulo kito sabuik
Tantang Tuanku Angek Garang
Manyuruah japuik Bungsu Urai
Iyo baduo jo andehnyo
Limo taun kiro-kiro
Sasudah alek Mayang Taurai

Dibantah kato maso itu
Dek Tuanku Manti Tuo
Rajo Angek batambah berang
Dihunuih padang katiko tu
Handak mamancuang urang tuo
Nan manghalangi kahandaknyo

Ado sataun itu garan
Manjalang paja ka disuruaah japuik
Si Bungsu memang acok datang
Iyo karumah kakaknyo tu
Bahari hari inyo di sinan
Kadang-kadang bapakan-pakan
Panah pulo sampai sabulan

Alasan inyo kasinan
Iyo manjago Majo Intan
Anak ko umua tigo taun
Kakaknyo baranak ketek
Jarang turun dari anjuang

Tapi inyo nan sabananyo
Inyo nan jadi pamenan
Jadi pamenan Angek Garang
Digendong sapanjang rumah
Dicium diidu saluruah badan
Adang-adang dijulang tinggi

Sudah itu dibuai-buai
Dibuek macam pauang rancak
Dibujuak jo barang ameh
Bak si Mayang maso daulu.

Bongsu Urai iyo labiah rancak
Maaluruh gadih jolong naiak
Buah dadonyo sadang kamek
Dibukak sapanjang hari
Itu manggilo Angek Garang
Iyo urang mato karanjang
Bia kini lah tuo bangka

Tantang si Upiak Bongsu Urai
Indak sajo inyo dibujuak
Inyo juo pandai mambujuak
Baapo itu Angek Garang
Iyo kan lakek kapadonyo
Galaknyo badarai-darai
Dendangnyo bak aia ilia
Manari inyo pandai pulo
Kok tampak kakaknyo kabajalan
Iyo kakaknyo Angek Garang
Inyo bagantuang dilihia kakak
Kadang-kadang marengek-rengek
Malarang urang kan pai
Tatingga karajo Angek Garang

"Manolah kakak kanduang Upiak
Di rumah sajo kito kini
Ambo sagan tingga surang
Indak ado kawan bagaluik
Majo Intan agak sakik kini
Barisuak ambo kan pulang"

"Mano diak sayang Bongsu Urai
Kakak namuah tingga di rumah
Asa upiak indak pulang bisuak

Upiak tingga sapakan lai”

”Upiak namuah tingga sapakan
 Tapi balikan galang ameh
Nan sarupo punyo kak Mayang
 Dalam maso sapakan tu
Kakak taruih tingga di rumah
 Usah pai kamano-mano

Dilapehkannya lihia kakaknya
 Balari inyo mintak dikaja
Bakaja kajaran sapanuah rumah
 Sambia bakulik macam alang
Marumeh paruik Mayang Taurai
Adang-adang inyo manyuruak
 Manyuruak mintak dicari
Kok kakaknya lambek mancari
 Inyo bahe manangih gadang
Manangih minta dibujuak
 Dibujuak jo dukuah ameh
Itu malalai Angek Garang

Alah hampia mah sataun
 Kajadian nan bak kian
Kian hari batambah laruik
 Acok manangih Puti Mayang
Di tagah indak tatagah
 Inyo pulo nan kanai berang
Iyo dek Rajo Angek Garang

Patangkaran acok tajadi
 Antaro si Mayang jo lakinyo
Inyo ingekkan janji daulu
 Samaso inyo alun kawin
Kan sayang sapanjang maso
 Kan elok sapanjang hari
Kiniko iko nan tasuo
 Habih batangka biasonyo

Inyo juo nan kanai tapuak
Kok datang elok Angek Garang
 Acok pulo inyo bakato
Mano adiak sayang Puti Mayang
 Buah hati balahan jiwa
Sayang ka Upiak ndak barubah
 Mangapo Upiak berang-berang
Si Bongsu adiak kito baduo
 Indak inyo ambo pangapokan
Bagaluik bariang hati
 Apo pulo kan salahnyo
Inyo baru paja andia
Paja andia paja anyia
 Alun tau maapuih salemo
Kan ambo pangakan inyo garan

Dek kau lah lamo sakik
 Dek rumahko aniang sajo
Bak rumah indak bapaunyi
 Itu ambo gadang hati
Kok inyo datang kamari

Datangnyo indak kakak japuik
 Inyo disuruan urang sinan
Datang manjago Majo Intan
 Mangapo inyo çakak tulak
Salah malah kakak beko
 Iyo dek ayah mandeh kito

Tantang urang nan baduo ko
 Alah sayang nyo jo ambo
Sajak Upiak sayang jo kakak
 Sajak kito mulo kawin

Alah sabaleh bini kakak
 Alun ado kakak sayangi
Sarupo sayang ka upiak
 Kan Upiak lai tau juo

Kakak manjokan siang malam
Kok rancak bana Bongsu Urai
Indak sapadan lai-jo kakak
Parangainyo lain pulo
Gilo mamintak tiok ari
Kok pintaknyo indak balaku
Nyo hantam mamakiak kareh
Abih pungguang den dilakaknyo

Sabagai pulo itu garan
Indak buliah sapanjang adaik
Kalian kakak paduokan
Dek kalian badunsanak

Anak kito mah ado pulo
Nan maikek kasiah kito
Tampek kito manumpang isuak
Kok kito lah tuo pulo
Usah sayang diak berang-berang
Usah Upiak managih juo
Denai kan iyo punyo Upiak
Indakkan batuka lai
Indakkan barubah lai
Ambiak padang balahlah dado
Denai sarahkan nyawo kakak”

Itu disabuik Angek Garang
Kok si Bongsu sadang ndak ado
Kok inyo babaliak beko
Dek ragam babaliak pulo
Saroman nan kito sabuik cako

Katiko lah muak Mayang Taurai
Urang lain lah bosan pulo
Takuik si Bongsu kan diulam
Dek rimau dahan Angek Garang

Pai Puti Nilam Cahayo
Disuruah dek Mayang Taurai

Iyo kapado Pamato Intan
Manyabuik parangai adiak kanduangnyo
Sarato Puti Bongsu Urai

Agak takajuik Pamato Intan
Indak inyo sangko-sangko
Sabab nan tau inyo garan
Mayang Taurai itu garan
Timbunan kasiah Angek Garang
Dek saroman jo inyo sangkek mudo

Sabagai pulo tu sababnya
Mako inyo indak manyangko
Si Bongsu indak panah kanai japuik
Inyo sajo nan nak kasinan
Sabab disuruah Mayang Taurai
Baitu kato Bongsu Urai
Tiok inyo kan barangkek

Sajak Puti Nilam cayo
Mandatangi rumah Koto Tuo
Si Bongsu indak lai datang
Ka nagari Koto Lamo

Taheran garan Angek Garang
Si Mayang diberanginyo
Tapi si Mayang inyo mangaku
Inyo indak tau manau

Untuang si rajo indak tau
Iyo kakaknyo nan lah pai
Iyo pai ka Koto Tuo
Kok tau inyo garan
Tantu inyo kan berang bana
Iyo padu Nilam Cayo

Ado sabulan sudah itu
Datang Puti Pamato Intan

Maliek anak jo cucunyo
Lah lamo indak dilieknyo
Bakato inyo pada rang baduo
Iyo si Mayang jo Tuanku
Iyo Tuanku Angek Garang

”Manolah anak kanduang Aneh
Si Bongsu andeh larang kamari
Baitu kato Bong Mano adiak kito badu
Indak dek sabab apo-apo
Inyo mah lah duo baleh
Alah patuuh inyo dipingik

Sabagai pulc itu garan
Amai si Mayang adiak ayahnya
Lah datang inyo ka rumah
Mamintak si Bongsu uatuak anaknya
Anaknya Sutan Pamenan
Urang nan sadang manih a rancak
Sukolah kami manarimo

Tasirah muko Angek Garang
Indak manjawek inyo garan
Tasanak raso dadonyo
Tapi apo kan dibuek
Urang kuaso ateh anaknya

Tantang si Upiak Bongsu Urai
Sajak inyo tu dipingik
Indak saketek berang hatinyo
Inyo mamakiak kareh-kareh
Kadang managih marantak-rantak
Macam urang batuka aka

Inyo indak amuah paduli
Pado Sutan Pamenan
Biapun alah di sabuik

Sutan ko nan ka jadi rajo
Manggantikan ayahnya isuak

Acok tadanga dek rang lain
Inyo berang baturo turo

Mancaroteh ka andehnyo
Ambo kan indak mangapo-ngapo

Iyo di rumah kak tuo ambo
Kak Tuo Mayang Taurai

Mangapo ambo ndak buliah kaken
Mangapo ambo dikuruang

Kak Pinang umua duo baleh
Inyo lah buliah kawin

Kak Mayang baitu pulo
Ambo sajo nan dipingik

O andeh lapehkan ambo
Beko ambo mambunuah diri

Lah panek inyo berang baitu
Dibujuaknyo pulo mah andehnyo

Manolah andeh kanduang ambo
Ambo nak mandi ka tapian

Indak lamak mandi di rumah
Bukakkan pintu anjuang ambo

Ambo indak kan kamano-mano
Tolong antakan ka tapian

O Andeh dangakan juo
Pasuokan ambo jo kak Pamenan

Mangapo ambo ka dipatunangangkan
Kok ambo indak tau jo inyo

Antah nyo pakak antah buto
Ambo ndak amuah manarimo

Kadang-kadang inyo manangih
Manangih sahari-hari

Bagolek-golek di katianyo
Indak amuah makan jo minum

Ado pulo itu garan
Inyo diam-diam sajo
Indak manyauik kok disapo
Agak rusuah pulo andehnyo
Maliek anak damikian

Dek lah lamo nan baitu
Kabanyo iyo sampai juo
Sadang kapadao Rajo Koto Lamo
Indak tabado doh berangnya

Dek itu inyo suruah japuik
Inyo paso urang manjapuik
Japuik tabawo jo andehnyo
Andehnyo kan dimaki-maki
Inyo dipandang nan basalah

Lah payah Datuak Manti Tuo
Mambana malarang nyo manjapuik
Tapi inyo kareh juo
Indak inyo bapikia panjang
Indak maliek kabalakang

Barangkek dubalang jo pandeka
Mambawo kudo sikua surang
Manjapuik si Bongsu jo andehnyo
Ka nagari Koto Tuo

Pandeka indak ditarimo
Iyo dek Tuanku nan sati
Dikatokan itu garan
Inyo lai kan datang surang
Diantakanryo sandiri
Sarato Puti Pamato Intan

Lah berang pulo mah pandeka
Inyo taraso dihinokan
Sabab indak dibawo naiak ustano
Disuruah sajo nyo babaliak

Disuruh sajo nyo babaliak
Alun lain turun dari kudo

Babaliak inyo jo hati berang
Mangadu bakeh rajonyo

Baapo inyo dipalakukan
Iyo dek Rajo Koto Tuo
Batambah berang Angek Garang
Inyo sandiri tu mah garan
Iyo kan pai barisuaknyo
Pai manjapuik Bongsu Urai
Sarato Puti Pamato Intan
Basamo pandeka jo dubalang
Kok Rajo Koto Tuo tu
Indak nyo datang sandirian

VIII. BONGSU URAI DILARIKAN

Tasabuik Rajo Koto Tuo
Mupakaik inyo laki bini
Kan maantakan Bongsu Urai
Ka nagari Sungai Pagu
Inyo bana nan ka pai
Baduo jo kamanakannyao
Iyolah urang Sutan Pamenan

Banyak taraso nan tak lamak
Kok si Bongsu dipaturuukkan
Dibawo ka Koto Lamo
Si Mayang akan mandarito
Angek Garang malangga adaik
Nagarinyo lah susah kini
Nagari lah kanai kutuak
Paneh sajo sapanjang taun
Tanaman indak babuah
Hambo rakyat mandarito

Lah pai urang nan manjapuik
Disuruah si Bongsu bapakaian
Baitu pulo dang andehnyo
Dikatokan kan pai ka Koto Lamo
Disuruah bawo tu pakaian
Iyo pakaian agak banyak
Inyo buliah tingga di sinan
Barang sabulan duo bulan
Di sinan inyo ka dipingik
Iyo dipingik dek kakaknyao
Iyo kakaknyao nan baduo
Manjalang inyo dikawinkan
Iyo jo urang Sutan Pamenan

Gadanglah hati Bongsu Urai
Basorak-sorak inyo garan
Badendang ka tangah jo katapi

**Sadang mangumpukan baju
Ameh perak dibawo juo**

**Dek barang-barang itu
Pambarian Angek Garang**

**”Beko buliah andeh caliak
Baapo sayangnyo bakeh ambo**

**Ambo nan indak kan dilapeh
Iyo tagak di ateh tanah**

**Nyato didukuang dari kudo
Dijulang dibuai-buai**

**Dipaluak diciumnyo pueh-pueh
Sarupo jo Majo Intan**

**Sarato Upiak Sari Intan
Iyo anak kami batigo**

**Hati siapo ndak kan sanang
Dibuek sarupo itu**

**Lorong dek kakak Sutan Pamenan
Bia inyo urang mudo**

**Alun tantu macam itu
Sangkek inyo datang ka ustano**

**Andak basuo tu jo ambo
Manyapo sajo inyo indak**

**Sanyum kida sanyum suok
Sarupo urang alah bisu**

**Naiak ayahnyo kateh kudo
Naiak pulo si Bongsu urai**

**Dinaikkan dek dubalang
Dibalakangnyo Pamato Intan**

**Dek kudo lai gadang tinggi
Dek itu banamo Sambarani**

**Tuanku rajo sadang berang
Sadang datang kakuatannya**

Capek juo lari kudo tu

Singgah sabanta itu garan
Iyo di rumah Manti Tuo
Sabanta pulo sudah itu
Iyo di rumah Mangku Bumi
Dipacu kudo masuak rimbo
Indak jaleh arah tujuan

Manggaretang Bongsu urai
Nak malompek dari kudo
Dipacik arek dek andehnyo
Dek lambek lamo di jalan
Sampai inyo katangah rimbo
Katampek Tuanku biaso batarak
Disinan ado pondok ketek
Tampek Tuanku manyatukan diri
Iyo jo bumi dengan langik
Di waktu bulan baru tabik
Duo hari dalam sabulan
Lah turun Tuanku nan Sati
Diturunkannyao Bongsu Urai
Malompek sorang Pamato Intan
Dek inyo pandai naiak kudo
Alah manangih Bongsu Urai
Manangih baibo-ibo
"Mangapo ambo dibunuah
Dianta ka dalam rimbo
Apo garan salah ambo
Ambo bukan tu nak kawin
Iyo jo kakak Mangkuto Ameh
Ambo lai tau juo
Inyo tu laki kakak ambo
Indak buliah manuruik adaik
Ambo yo takuik kanai sumpah
Bakato garan andehnyo
Indak Upiak kan dibunuah

Indak kan dipangapo-ngapo
Dek sayang kami jo Upiak
Mangko Upiak dilarikan

Tantang Rajo Mangkuto Ameh
Eloknya sabanta sajo
Kok lah **muak inyo isuak**
Upiak kan dianiayo

Jolong mandapek kakak Upiak
Iyo Puti Pinang Masak
Sayangnya indak tabado
Sagalo kandak inyo bari
Inyo buai inyo dindongkan
Iyo samacam anak ketek

Tapi kasudahannya
Dek si Mayang lah gadang pulo
Inyo takuik itu garan
Si Mayang kan dapek dek Sutan Maulano
Bamukasuik inyo garan
Ka mambunuah keduonyo

Kabatulan sajo maso itu
Paja-paja tu sadang tagak
. Di pintu surambi jalan turun
Iyo dakek pangka janjang
Ditarajangnya keduonyo
Tunggang langgang ka tapak tanggo
Si Pinang alun mati bana
Iyo pinggangnya alah patah
Dicakiak dek Angek Garang
Nak lakeh iyo matinyo
Manggigia tulang rang maliek

”Kaba duto itu andeh
Kak Pinang inyo jatuah surang
Dek inyo lah lamo sakik
Iyo sakik baranak ketek

Lorong kakak Sutan Maulano
Memang inyo diusia kakak
Diusaha dari nagari
Sabab inyo baintaian
Iyo jo kakak Pinang Masak

Kakak kau Sutan Maulano
Indak inyo baintaian
Iyo jo Upiak Pinang Masak
Basuo sajo nyo ndak panah
Bia rumahnya bahadokan

Kabatulan sakali tu
Dek inyo mancari andehnya
Tasarobok si Pinang nak kalua
Iyo batanyo inyo garan
Batanyo tantang andehnya

Sabagai pulo itu Bongsu
Sutan indak mato karanjang
Saroman Tuanku Angek Garang
Inyo bajanji jo si Mayang
Mangapo si Pinang digaduahnya

Ampunlah ambo mandeh kanduang
Kok iyo ambo indak ka dibunuah
Kok datang ayah baeko
Tolong malah andeh kecekan
Ambo ko iyo nak dianta
Ka rumah kakak Mangkuto Ameh

Taruih tarang upiak katokan
Upiak iyo lah bajanji
Kakawin jo kakak Mangkuto Ameh
Dek Upiak yo ketek baru
Bajanji kami duo taun

Kini lah abih mah sataun
Sataun lai kami nantik

Baru kami kan baralek
Dalam taun iko nantik
Ambo iyo kan dimanjokan
Macam si Majo jo si Sari
Mungkin labiah pado ambo

Sasudah baralek nanti
Tasarah pado kak Mayang
Kok inyo nak tingga juo
Buliah pindah ka anjuang perak
Kok inyo ndak tahan ati
Bakirok inyo dari ustano
Indak pusiang tu dek ambo.

Ambo sumpah ayah jo andeh
Ambo kutuak salamo iduik
Kok ambo indak diantakan
Kasiah ambo ayah putuihkan
Sayang ka kakak Mangkuto Ameh
Urang rajo dalam nagari
Nan babuek sakandaknyo
Andeh karek andeh campakkan
Andeh buang jauah-jauah.

Sadang andeh nan malahiakan
Dek ayah nan manjadikan
Indak panah mamanjokan ambo
Sarupo kakak Mangkuto Ameh
Kiniko ambo andeh pisahkan
Iyo jo kakak nan ambo cinto
Dek sayang pado kak Mayang
Kakak ambo alah mangecek
Inyo hanyo sabanta sajo
Iyo sayang pado kak Mayang
Dek ambo ketek bana baru
Sajak ambo acok ka sinan
Kami bamain patang pagi

Iyo bagaluik siang malam
Indak inyo panah mandakek
Pado kakak Mayang Taurai

Mandanga kato nan bak kian
Takajuik bana Pamato Intan
Tamanuang tatakuwa nyo sabanta
Alah rusak anaknyo garan
Iyo rusak lua jo dalam
Dirusakkan urang nan dibancinyo
Dibanci dikutuak sajak mudo
Nan diharok si Bongsu Urai
Tampek basanda hari tuo
Si Pinang alah dibunuahnyo
Si Mayang dapek dikabiknyo
Tingga si Bongsu nan diharok
Kironyo iko nan tasuo
Manangih Puti Pamato Intan
Manangih taisak-isak
Padiah paruiknyo mamikiakan
Putuih raso tali jantuangnyo

Dandam tak lapeh Mangkuto Ameh
Dibalehkannya ka anak awak
Lah payah sajo malaiakan
Iyo jariah sajo manggadangkan
Paja-paja iyo rancak-rancak
Baru pucuak pucuak bulek
Diulam dek Angek Garang
Bak kuciang maulam anak mancik
Sirah baru kalua sarang
Dimainkannya tu sabanta
Kok inyo alah mah pueh
Lah tampak pulo nan lain
Ditalan dilulua habih
Mangapo andeh manangih
Iduik sanang mananti ambo

Ambo kan jadi bini rajo
Iyo manjadi Andeh Suri
Kan disambah dek rang banyak

Dek kakak lai mah disabuik
Andeh manangih iyo nak kawin
Iyo nak kawin andeh jo kakak
Tapi kakak indah namuah
Dek andeh iyo labiah tuo
Lai pulo indak rancak bana

Kok dek itu andeh berang
Bia kito tingga basamo
Bia kak Mayang iyo nan pai
Iyo pai ka Koto Tuo
Inyo pai mangawani ayah

Bapikia Puti Pamato Intan
Bodoh bana kironyo paja nangko
Alun tau disalah bana
Alun jaleh dek inyo buruak baik
Batanyo Puti tu maso itu
"Manolah Upiak Bongsu Urai
Kok kau lalok di Koto Lamo
Panah kok kau lalok garan
Iyo jo Rajo Angek Garang"

Itu ambo dek berang ka inyo
Kok lah sudah minum jo makan
Iyo wakatu malam hari
Bagaluik kami sabanta
Bagaluik sapanuah rumah
Ambo dijulang dibuaikan
Dipangku naiak kateh anjuang
Iyo kaateh anjuang perak
Dibukaknyo baju ambo
Digantinyo jo nan lain
Disalimutinyo badan ambo

Sudah itu ambo ditinggakan
Kadang ambo manangih kareh
Mintak lalok samo jo inyo
Tapi inyo indak amuah
Ambo bagantuang dilihiyano
Dicumnyo badan ambo
Dipaluaknyo ambo kuaik-kuaik
Iyo itu nan lamak bana
Tapi indak amuah tidua
Inyo takuik ka kakak Mayang
Dek itu ambo banci kini
Banci kapado kakak Mayang
Mangapo mako dilarangnyo

Dikatokannyo pada ambo
Pintu anjuang usah dikunci
Tapi inyo indak panah datang
Tantu ndak buliah dek kak Mayang
Manangih ambo manantinyo

Pagi-pagi ambo dijapuik
Dijapuik kaateh anjuang
Dibawo mandi kabalakang
Dibukaknyo sagalo kain
Digosoknyo ambo lamo-lamo
Jo sabun nan harum bana
Sudah itu dibadakinyo
Dipakaikan pakaian baru
Sananglah pulo hati ambo
Lupo diberang tadi malamnyo

Sataun andeh maazab ambo
Kini ambo dikicuah pulo
Dibawo ka dalam rimbo rayo
Di mano ambo indak berang
Ambo berang ambo manyumpah
Andeh kacekkan dek sayang andeh

Kok iyo andeh lai sayang

Kok datang ayah baeko

 Antakan juo ambo lakeh

Amboh baleh isuak sayang andeh

Kok takuik ayah jo andeh

Iyo kapado kakak ambo

 Latakkan ambo di tapi koto

 Bia ambo bajalan surang

Indak kan sasek ambo garan

 Alah acok ambo kasanan”

Andehnyo tahaniang sajo

 Indak tantu nan ka disabuik

Anak lah jaleh kanai rayu

 Kartai bujuak kanai pakasiah

Inyo nan baru paja ketek

 Di mano jiwanyo nan ka tahan

Sadang si Mayang nan lah gadang

 Lah binci lamo kapadonyo

Lah punyo pulo tampek hati

 Lai dapek inyo pangaruhi

Sayang tatungkuik bakeh inyo

 Lah lupo sutan Maulano

Lah lamo orang nan baduo

 Iyo manunggu Tuanku Rajo

Inyo nan indak datang juo

 Lah hampia malam pulo hari

Rusuahlah hati keduonyo

Sabagai pulo itu garan

 Makanan alun lai tabawo

Apo tidak lain dari kain

 Itupun indak banyak bana

Iyo pitih ameh jo perak

 Disimpan sajo di pinggangnya

Nan di badan urang tu sajo
Iyo nan tingga padō inyo

Lah malam kironyo hari
Catuih api indak ado pulo
Bapaluakan nyo dalam kalam
Bongsu Urai managih baliak

”Iko tandonyo sayang ayah
Kito dianta masuak rimbo
Inyo nan indak baliak juo
Apo jadinyo kito andeh
Kan jadi lauak harimau sajo

”Mano nak upiak Bungsu Urai
Lalok upiak kalok nak sayang
Usah lai takuik bakeh rimau
Iko tampek ayah batarak
Indak ado harimau siko
Kok ado bana inyo garan
Indak inyo kan marusak
Inyo takuik bakeh ayah upiak

Tantang ayah Upiak itu
Indak mungkin inyo talambek
Kalau indak ado nan tajadi
Nasi alun lai tabawo
Kito indak ditinggakan pitih

IX ANGEK GARANG MANGHADANG KOTO TUO.

Lorong kapado Angek Garang
Mancaliak taruih kahalaman
Kok iyo datang Bongsu Urai
Dianta ayah jo andehnyo

Dek indak datang-datang juo
Berangnya batambah garan
Bak urang satangah gilo
Indak amuah nyo lai tu
Mananti hari bisuak
Turun inyo kahalaman
Batapuak tangan tigo kali
Lah datang dubalang tuo
Bakato inyo maso itu
”Mano mamak Dubalang Tuo
Kumpuakan dubalang nan baranam
Sarato pandeka baranam pulo
Agiah inyo alaik sanjato
Iyo padang dengan tombak
Kumpuakan kudo duo baleh
Kudo pandeka jo dubalang
Kito barangkek ka Koto Tuo
Kito hadang nagari tu
Kito bunuah yo rajonyo

Mandanga kato nan bak kian
Manyambah garan dubalang Tuo
”Ampun ambo Tuanku Rajo
Mangapo kito pai manyarang
Manyarang ka Koto Tuo
Iyo nagari Andeh Suri
Ayah andeh nan ka kito sarang

Usah lai mamak banyak kecek
Kan denai nan mamaciak tampuak

Tampuak nagari nangko
Kato denai nan ka didanga
Parentah denai nan ka dituruik
Kok lai ibo di batang lihia

Kok Mamak nak tau juo
Apo garan nan mambuek
Iyo ambo berang kini

Tanyokan padō pandeka rajo
Sarato dubalang tangah hari
Nan disuruh ka Koto Tuo

Tasabuik Datuak Rajo Gumanti
Urang tuo dalam nagari
Maliek kudo duo baleh
Pandeka dubalang disampiangnyo
Takajuik bana inyo garan
Balari turun ka halaman
Lansuang ka laman istano rajo

Mancaliak rajo tagak sinan
Manyambah inyo maso itu
”Ampun ambo Tuanku Rajo
Apo garan nan tajadi
Adokoh musuah nan datang
Dari mano garan datangnyo
Ambo nan indak diagiah tau”

”Manolah kakak Manti Tuo
Sangajo ambo babuek
Indak sapakaik jo nan banyak
Sabab nan lain iko beko
Banyak nan indak ka satuju
Dek ambo pai manghadang
Manghadang ka Koto Tuo
Ayah Mayang Taurai
Mayang Taurai Andeh Suri

Kok salah tu baeko

Ambo surang nan kan salah

Nan lain indak tabawo

Kok buruak iyo ambo nan ka buruak

Usah ambo dilarang

Usah ambo ditagah

Ambo indak talarang jo tatagah

Mnolah Mamak Pandeka Rajo

Sarato Mamak Dubalang Tuo

Naiklah kaateh kudo

Saruangkan padang di kida

Angkk tombak jo kida

Pcik tali sabalah tangan

Turuikenai dari balakang

Kio manghadang Koto Tuo

Pacu kulo sacapek mungkin

Usih ado nan ka tinggalan

Indak lano inyo di jalan

Samailah inyo maso itu

Iyo di laman rumah gadang

Ustao Tuanku Koto Tuo

Mamakiak Rajo Angek Garang

Basonk dari kudo sajo

Nyariang lantang suaronyo

”Manolah urang ustano ko

Nan banamo laki-laki

Turun malah ka halaman

Kito mambiek paretongan”

Sakali inyo nanyaru

Indak ado urang nan turun

Indak ado urang manjanguak

Iyo manjanguak dari tingkok

Disarunyo sakali lai

Sakuaik kuaik suaronyo
Turun garan bujang salamaik
Dari janjang in'yo lah manyambah

Ampun Tuanku Koto Lamo
Dalam Ustano iko kini
Urang banamo laki-laki
Iyolah diri ambo surang
Rajo kami pai bajalan
Maanta Tuanku Bongsu Urai
Kanagari Koto Lamo

Ha, ha, hahahaha...tadanga Angek Garang galak
"Inyo pai lai bakudo
Atokah inyo bajalan kaki
Bari bana ambo batanyo"

"Ampunlah ambo dang Tuanku
Inyo pai iyo bakudo
Saikua kudo untuak batigo
Dari pagi inyo barangkek"

Sampai kini alun tibo
Ado garan jalan lain
Iyo jalan ka Koto Lamo
Jalan baru garan dibuek
Dek Tuanku Sati Koto Tuo"

Turun Tuanku Angek Garang
Nan lain tagak dakek janjang
Mananti parentah dari rajonyo

Tadanga parentah Angek Garang
Marantak mahantam tangah rumah
Mamanggia kambang dayang-dayang
"Mano kalian nan banyak ko
Cubo jawek tanyo denai

Dijawek jo nan bana
Kok tasuo duto kalian
Lihia kalian tantangannya
Denai batanyo kini nangko
Di mano Rajo kalian
Di mano Andeh Surinyo
Di mano Puti Bongsu Urai

Manyambah garan nan tuonyo
"Ampunlah ambo dang Tuanku
Iyo Tuanku Rajo kami
Sarato andeh Suri kami
Inyo pai ka Koto Lamo
Maanta Tuanku Bongsu Urai

Mano andeh inang pangasuh
Mangapo si Bongsu diantakan
Indak ado urang manjapuik
Inyo anak dalam dipingik
Tunangan Sutan Pamenan"

"Mangko inyo diantakan
Dek manangih siang malam
Manangih mintak diantakan
Inyo taragak jo kakaknyo
Kakaknyo Tuanku Mayang Taurai

"Ado kalian nan lain ko
Nan tau bana itu garan
Kamano urangko barangkek
Jalan nan mano dituruiknyo

Manjawab saurang dayang-dayang
Nan agak bagak itu garan
"Ampunlah kami di Tuanku
Inyo bakato bakeh andeh
Baitu juo salamonyo
Dari andeh kami tau

Kamano garan inyo pai
Kok indak inyo kasinan
Indak basuo nyo di jalan
Rusuahlah kami mamikiakan”

Batapuak tangan Angek Garang
Batapuak duo kali duo
Naiak dubalang jo pandeka
Barampek urang naiak rumah

”Manolah Andeh Inang pangasuan
Sarato dayang kasadonyo
Bukak sagalo biliak anjuang
Sarato biliak tangah rumah
Kami ko handak mancari
Dimano garan rang nan tigo
Manyuruak di rumah nangko

Birawari dayang jo panginang
Dibukak sagalo pintu biliak
Biliak anjuang dipareso dek Tuanku
Biliak lain dek urang nan barampek
Dek indak ado nan basuo
Iyo urang nan dicari
Turunlah inyo kahalaman
Naiak sakali kateh kudo
Barangkek inyo kasadonyo
Karumah Datuak Manti Tuo.

Baru sampai tangah halaman
Tampak kudo Tuanku Sati
Dipacik dubalang dang talinyo
Iyo dubalang di rumah tu

Turun inyo dari kudo
Iyo Tuanku Angek Garang
Tali kudo nyo lapehkan sajo
Naiak sakali kateh rumah

Indak ado urang nan manyuruah
Takajuik sanan Tuanku Sati
 Sarato Datuak Rajo Gumanti
Datuak Mangku di situ pulo
 ”Ampun ambo Tuanku Sati
Ambo datang kini nangko
 Iyo manjapuik adiak ambo
Disuruah Mayang Taurai
 Adiak ambo si Bongsu Urai
Di mano inyo disuruakkan”

”Mano Tuanku anak ambo
 Mangapo inyo dijapuik
Inyo iyo dalam pingitan
 Indak buliah ka mano-mano
Manuruik adaik jo limbago”

”Tau bana Tuanku garan
 Iyo jo adaik jo limbago
Mamingik anak dalam tanah
 Atau di ateh awan tinggi
Bukan di anjuang rumah gadang”

”Dipareso itu garan
 Iyo rumah gadang ambo
Sadang ambo indak di rumah
 Ambo indak ado manyimpan
Iyo anak bini urang
 Mangapo rumah digaledah”

”Jangan Tuanku banyak kecek
 Katokan kini nangko
Di mano paja tu disuruakan
 Nak ambo japuik nyo kasinan
Sudah itu baru kito barundiang

”Mano Tuanku Koto Lamo

Mangapo dituntuik anak urang
Bini tido jando tido
Indak ambo ka mangecekkan
Cari ka rimbo jo ka lauik
Atau ka awan jo ka bumi
Kok andak basuo juo”

Dicabuik padang dek Angek Garang
Dirambahnyo Tuanku Sati
Urang nan indak basanjato
Tagalak tampak Manti Tuo
Inyo tau rajonyo kuaik kaba
Tahan basi tahan godam

Maliek manti lah tagalak
Balari kalua Angek Garang
Diambiaknyo tombak si dubalang
Baru pulo naiak inyo karumah
Ditusuaknyo paruik Tuanku Sati
Paruik kareh bak parisai

Batapuak inyo banyak-banyak
Lah naiak urang duo baleh
Disuruahnyo angkek samo-samo
Iyo Rajo Tuanku Sati
Lah payah urang dek maangkek
Indak taungkik dari tagak
Maalum urang biaso batarak
Batambah berang Angek Garang

Diumbaunyo langik jo bumi
Sato pulo nyo maangkek
Tadanguih Datuak Manti Tuo.
Tapakiak cando Datuak Mangku
Urang surang di lawan tigo baleh
Adaik di mano itu garan
Ndak takuik di bumi dengan langik.

Diam sajo urang nan banyak
Diangkeknyo rajo ka halaman
Dihampehkan ka batang kayu gadang
Disuruah pijak dek kudonyo
Jatuah tatungkuik Tuanku Sati
Indak inyo bagarak lai.

Basaru inyo Angek Garang
"Manolah Datuak Manti Tuo
Sarato iyo Datuak Mangku
Kumpuakan pangulu duo baleh
Barangkek ka Koto Lamo
Di sinan kito barundiang
Rajo kalian alah mati
Tasarah pado kalian
Handak manuntuik denai tarimo
Handak ka parang **elok bana**
Jakok manyarah labiah elok

Samalam malamnyo hari
Bia kalian ka basuluah
Denai nantik di Koto Lamo
Kato putuih denai katokan
Indak dapek diubah lai

Sahabih inyo bakato
Indak inyo mananti jawek
Diracaknyo dang kudonyo
Babaliak masuak ustano

Masuak inyo kabiliak-biliak
Alah kosong langang mah ustano
Kuciang sikua indak mangeong
Mancikpun indak nan mancicik
Kok kunun pulo manusia
Antah kamano batabangan
Si Kambang sarato dayang-dayang

Lah turun inyo kahalaman
Bakato rajo maso itu
Siapo kalian nan marokok
Kaluakan malah catuih api
Iduikkan api bak padusi
Ambiak daun karambia nan lah kariang
Cubo baka rumah urang ko”
Sambia galak inyo bakato tu

Tahaniang sajo dang mulonyo
Iyo urang nan duo baleh
Saroman indak mangarati
Apo bana makasuik rajonyo

Mano kalian kasadonyo
Lai tadanga kato denai
Alah pakak kalian garan
Disangko denai baolok-olok

Baka rumah gadang nangko
Indak ado gunonyo lai
Ndak buliah rajo duduak siko
Saparentah ambo nagari ko

Bia tampak dek Pamato Intan
Baa karehnyo Angek Garang
Indak subawo tu mah garan
Urang mambari ambo gala
Gala ejekkan paja-paja
Iyolah Rajo Angek Garang

Amaknyo caliak dari jauah
Baapo garan garang api
Kok nyo nak tau baapo angeknyo
Bia malompeknyo kadalam

Dek ndak ado nan barani
Iyo manantang Angek Garang

Dibaka rumah dek dubalang
Manyuruak sagalo laki-laki
Nan ado bakuliliang tu
Bagageh Bujang Salamaik
Iyo karumah Manti Tuo

Dek inyo balari-lari anjiang
Iyo urang Bujang Salamaik
Hampia pingsan tibo di sinan
Tampaklah urang sadang bakumpua
Mangaliliangi mayik Tuanku
Iyo Tuanku Rajo Koto Tuo

Bacarito Bujang Salamaik
Bacarito tapatah patah
Baulang ulang mangko jaleh
Camehlah urang mandangkan

Ado sabanta antaronyo
Tampak rajo mambuka mato
Bakato inyo maso itu
Manolah Mamak Manti Tuo
Sarato sanak Datuak Mangku
Tantang diri ambo nangko
Antah kan iduik antah mati
Kok iduik ambo garan
Indaklah lai ka baguno
Mungkin mati nan labiah elok

Pado pikiran hati ambo
Elok manyarah pado Angek Garang
Manuruik sajolah sadonyo
Pado parentahnyo nan cako
Lai tadanga mah dek ambo
Ambo babuek buék mati
Amak sanang di hatinyo
Kok ambo lai iduik juo

Dalam sahari duo nangko
Tolong antakan ambo garan
Karimbo tampek ambo batarak
Sinan mananti Pamato Intan

Kok buliah ambo mamintak
Barangkek dubalang kini juo
Bawolah kudo Sambarani
Mambawo makanan untuak inyo
Pamato Intan jo si Bongsu

Makanan ado dalam sumpik
Nan tagantuang di pungguang kudo
Tingga mambawo itu garan
Katokan padu urang banyak
Bahaso ambo alah mati
Dikabumikan di dalam rimbo
Ditanam indak manuruik adaik
Dek ambo iyo urang kalah
Mati indak sabagai rajo

”Ampunlah ambo dang Tuanku
Sagalo titah kami junjuang
Diangkek Tuanku kateh rumah
Dibariangkan di ateh tilam bungo
Nanti kok ado urang datang
Bia inyo picayo pulo
Bahaso Tuanku alah ndak ado
Nak tasia kaba di nagari
Iyo Tuanku alah mati
Tantang kapado mambawo nasi
Iyo kapado Andeh Suri
Tantu ambo nan ka pai
Indak ado urang nan tau
Tampektu iyo dirasiokan
Dirasiokan dari daulu
Ambo kumpuakan kini dangai

Iyo pangulu duo baleh
Kok lah takumpua itu beko
Kami barangkek ka Koto Lamo
Mangku Bumi tingga di siko
Maunyikan dang Tuanku

Indak lambek kami di jalan
Kami bakudo kasadonyo
Sabaliak kami dari sinan
Ambo barangkek jo dubalang
Maanta nasi utuak andeh
Samalam malamnyo hari
Alah ko suko hati Tuanku

Birawari dubalang banyak
Nan lah tibo di dakek rajo
Datang nan dari rumah gadang
Wakatu itu alah punah
Dimakan api nan gadang sangaik

Urang mah takuik kan manolong
Habih tabaka rumah gadang tu
Api bakisa ka rangkiang
Tujuah rangkiang baririk
Habih punah di makan api
Manangih urang padusi
Maliek padi jadi abu.

Tagalak Datuak Manti Tuo
Maliek dubalang nan barampek
Alah bagarak nyo tu garan
Handak maangkek dang Tuanku
"Manjauah kalian kasadonyo
Ambo surang maangkek baliau
Alun ambo kan kabaratan
Baliau ko ringan bak kapeh
Balain tu mah jo cako tu

Tigobaleh urang maangkek
Baru taangkek nyo kalua
Kini liek dek kalian
Barapo tuah rajo kito

Diangkek rajo kateh rumah
Bakumpua pangulu jo dubalang
Sarato pandeka nagari tu
Mangalilingi yo rajonyo
Bakato Datuak Mangkubumi
Wakil rajo urang patamo
Manolah kito kasadonyo
Alah mah tau itu garan
Kito dihadang Angek Garang
Alah kalah rajo kito

Manuruik pasan dang Tuanku
Usah kito malawan lai
Urang baparang caro kuaiknyo
Indak inyo manuruik adaik
Indak manuang jo limbago
Adaik limbago dari muyang

Kito disurah manyarah
Kito katokan ka rang banyak
Rajo kito alah mah mati
Indak ado lai nan ka malawan

Rasiokan pado urang banyak
Rajo nan lai iduik juo
Bia urang manangih kini
Isuak kok lai kan tagalak
Kito nan bukan urang salah
Bumi jo langik kan manyubalah
Kapado kito kasadonyo

Barangkek pangulu kasadonyo
Dikawal dubalang jo pandeka

Dikatuo urang tuo kito
Iyolah Datuak Manti Tuo

Ambokan tingga mah di siko
Iyo maunyikan rajo kito
Katokan malah ambo tingga
Manjago mayik jo nagari
Barisuak akan ditanamkan

Lah turun urang ka halaman
Lansuang sakali naiak kudo
Barangkek malah kasadonyo
Pandeka rajo pambukak jalan
Pandeka rimbo di balakang
Manti Tuo ditangah-tangah

Alah sampai inyo garan
Ka halaman Ustano Koto Lamo
Inyo dinantik dek dubalang
Disuruh masuak ka balerong
Balerong tabukak itu garan

Batanyo dubalang maso itu
"Manolah urang baru datang
Siapo garan basanjato
Manyalang ambo sabanta
Ado mah barang kan dikarek

Manyauik Datuak Manti Tuo
Mangapo kami basanjato
Kami nan tidak pai parang
Disuruh datang kan barundiang
Iyo siriah nan kami bawo
Dek siriah dalam carano"

"Manolah urang nan banyak ko
Ambo iyo ingin marokok
Siapo garan punyo catuih

Salangi ambo sabanta
Mari kito marokok samo”

”Mano dubalang urang siko
Indak ado nan punyo catuih
Indak ado kami nan marokok
Rajo kami malarang marokok
Marokok iyo urang dalang
Urang nan suko sia baka
Rokok dibaka ndak manantu
Indak manganyang inyo garan
Indak pulo malapehkan auih”

Manolah rang banyak di balairong
Laloklah siko sampai siang
Kami di siko iyo dalang
Indak ado nan ka barundiang
Samalam malaman iko
Barundianglah jo nyamuak banyak

Sudah bakato nan baitu
Dubalang naiak ka ustano
Memang iyo indak ado
Urang nan datang samalam tu
Untuak barundiang babicaro

Rusuah lah ati Manti Tuo
Inyo bajanji jo Tuanku Rajo
Maantakan nasi jo catuih api
Kapado Tuanku Andeh Suri
Ditampek baliau iyo batarak

Bakato surang dari dubalang
Iyo dubalang nan paliang tuo
Ampunlah ambo mak Manti Tuo
Kok ambo pulang sabanta
Iyo basuo jo rajo kito
Mangabakan padō baliau

Kito nan indak buliah pulang
Dapek ambo mambawo makanan
Untuak kito saketek surang

Manolah kakak dubalang tuo
Mano buliah kakak pulang
Kito dijago bak tahanan
Inyo mananyo sanjato cako
Tandonyo kito ndak babaliak lai
Baitu inyo mintak catuih api
Takuik kito akan mambaka

Nan buruaknyo iko kini
Kito iyo ditahannya
Tapi indak diagiah nasi
Sadang urang nan mancilok
Bilo inyo kito tahan
Ataulah sampai kito kuruang
Dibari makan sacukuiknyo

Bakato saurang lai
”Dama ruponyo maha bana
Kito disuruah bakalam sajo
Untuang lai bulan sadang tarang
Tampak juo sosok tubuah kawan

Manjawab kawannya nan lain pulo
Dimanolah dama kan tabali
Pambali bareh indak ado pitih
Hari paneh sapanjang maso
Angek garang taun ka taun
Padi indak ado nyo babuah
Jan kan babuah tumbuahnya indak
Kapalo banda indak diuruuh
Anak aia di pacakakkhan
Babunuhan sapanjang maso
Urang mati dibuang sajo

Manuruik kato rang di siko
Sajak nyo bunuah puti kito
Iyo Tuanku Pinang Masak
Nagari ko indak salamaik
Rampok marampok sabalahan
Bacakak sapanjang ari
Ayam jo kambiang indak buliah lapeh
Sia kuaik inyo di ateh
Kabanaran indak dipakai

Pandeka dubalang bakuaso
Datuak pangulu indak bakutiak
Angguak geleng sapanjang maso

Indak urang takuik disumpah
Indak takuik kanai kutuak
Bumi jo langik indak kuaso
Nan kuaso Angek Garang surang

Puti kito nan surang lai
Nan banamo Mayang Taurai
Makan ati mah di siko
Alah kuruih indak rancak lai
Dituntuiknyo pulo Bongsu Urai”

Bakato pulo nan ka tigo
Mangapo garan rajo kito
Saba sajo baliau tu
Indak inyo nak mangadu
Itan ka rajo Pagaruyuang
Sarato Basa Ampek Balai

Manjawek pulo nan ka ampek
Kok baliau pai mangadu
Tantu jo rundiang disudahi
Disuruah badamai kasudahannya
Abih ari abih wakatu
Dek barundiang sapanjang maso

Nan mangadu nan kan barabih
 Maagiah pitih baka di jalan
Sarato maagiah minum makan
 Puti kito kan dapek juo
Kok indak dapek jo elok
 Jo buruak kan dapek juo
Ndak lalu dandang di aia
 Di gurun di rangkakkannya

Rajo kito urang baiak
 Indak inyo nak bakareh
Indak inyo nak baparang
 Itu inyo sarahkan sajo
Iyo puti nan baduo

Nan kiniko inyo batahan
 Ibo di puti kaduonyo
Nan ketek ka jadi pamainan
 Bak mancik sirah di mainkan kuciang
Nan gadang maracun ati
 Kironyo badannya jadi umpan
Mati dibunuah Angek Garang

Tasabuik urang nan banyak tu
 Dek babisiaik nan baitu
Lah lupo juo lapa paruik
 Nak tidua ndak dapek juo
Rangik mandanguang bagai labah
 Kain saruang indak tabawo

Urang nan kuaik kaba
 Iyo pandeka jo dubalang
Ado juo nan bakaruah
 Indak pusiang nyo jo rangik
Sarato paruik nan karoncong

Bakuk~~kuak~~ ayam sakali
 Alah gak gadang malah hati

Lah hampia pagi itu garan
Duo kali ayam bakukuak
 Alah basiap kasadonyo
Kok pagi hari baeko
 Kok turun rajo ka barundiang

Tigo kali ayam bakukuak
 Lah tabik pulo matohari
Alun ado urang mandakek
 Baiak pandeka atau dubalang
Sapanggalah mato hari naiak
 Tadanga suaro urang banyak
Tampak datuak jo pangulu
 Bapakaian adaik inyo garan

Sabanta pulo sudah itu
 Lah tampak rajo turun ustano
Tampak urang tu bakato-kato
 Saurang di antoronyo
Mungkin garan Rajo Gumanti
 Atauko Datuak Mangkubumi
Datang bagageh ka balairong
 Bakato inyo maso itu

”Manolah sanak nan banyak ko
 Bari jaleh ambo batanyo
Kapatang ado tigo pakaro
 Nan diajukan rajo kami
Patamo kok sanak kan mangadu
 Itan karajo gadang kito
Nan samayam di Pagaruyuang
 Kaduo kok sanak nak baparang
Katigo kok andak manyarah sajo”

Manjawab Tuak Manti maso itu
 Iyolah Manti Koto Tuo
”Manolah sanak nan batanyo
 Dangakan malah putusan kami

Katiko bagindo yo kan mati
Iyo bagindo rajo kami
Ado bapasan inyo garan
Elok kami manyarah sajo
Rajo siko bukan rang lain
Anak manantu dek baliau

Kok baliau iduik juo
Indak lai dapek mamarintah
Anak kakaknyo nan padusi
Iyo nan kanduang bakeh inyo
Indak ado nan laki-laki
Nan padusi jauah di rantau

Jadi nan patuik manggantikan
Indak ado kamanakannya
Ado garan Sutan Pamenan
Anak adiak rajo kami
Andehnyo bukanlah Puti
Bukan turunan Koto Tuo
Indaknyo buliah jadi rajo

Nan buliah manjadi rajo kami
Iyo Tuanku Mayang Taurai
Dek itu kami disuruh manyarah
Alah koh sanang hati Datuak
Lah pai Datuak Manti Tuo
Pai manyambah karajonyo
Sabanta sasudah itu.

Datang Tuanku Angek Garang
Tasanyum sanyum dari jauah
Bakato inyo ka nan banyak

”Manolah sanak nan banyak ko
Rakyat nagari Koto Tuo
Lah mah sampai tu kaambo
Apo nan kandak sanak sadonyo

Sananglah pulo hati ambo
Apo guno kito baparang
 Jikok mati di pihak siko
Atau mati di pihak sinan
Kito sadonyo kailangan
 Kito nan indak bamusuahan
Indak panah dari daulu
 Koto Lamo jo Koto Tuo
Urangnyo tatap badunsanak

Tapi sabuah itu kini
 Si Mayang tantu indak mungkin
Nan inyo kan jadi rajo
 Jadi kaduo nagariko
Saparentah denai itu garan
 Iyo dari hari ko kateh

Duo nagari surang rajo
 Indaklah mungkin mamarentah
Denai ko indak kuaso
 Dari kiniko kaateh
Ado nagari Koto Lamo
 Ilang nagari Koto Tuo
Manjadi satu kaduonyo

Sabagai pulo itu garan
 Nan patuik kito supakati
Datuak Mangku tantu surang
 Baitu Datuak Manti Tuo
Baitu pandeka rajo
 Baitu pulo dubalang Tuo
Mandeh Rubiah surang pulo
 Baitu juo rajo janang

Mamintak denai bakeh mamak
 Iyolah Mamak Manti Tuo
Sarato mamak Mangku Bumi

Antakan malah padang rajo
Sarato tombak jo lambiangnyo
 Nan buliah tingga pado mamak
Karih pusako kaum mamak
Pendeknyo sagalo punyo nagari
 Datuak antakan sapatang patangnyo
Hari iko salambeknyo hari isuak

Ado lai nan ka denai sabuik
 Iyo tantang padi jo taranak
Dek sinan ado mah banyak
 Di siko sadang kurang kini
Tolong antakan bahagian ambo
 Kok nan lain handak manyalang
Tolonglah pulo agiah salang
 Kapado siapo tu nan datang
Barisuak lusa ka Koto Tuo

Nan sakarang kini nangko
 Pulanglah sanak kasadonyo
Maap sajo denai mintak
 Indak dapek maagiah nasi
Indak ado nan ka bakarajo
 Dek sanak banyak nan datang
Bukan sapuluah duo baleh”

Disusun jari nan sapuluah
 Iyo dek urang Koto Tuo
Ditakuakan pulo mah kapalo
 Indak ado nan manjawek
Indak dapek nan ka di sabuik
 Awak lah jaleh urang kalah

X. PUTI BADUO DALAM RIMBO

Tasabuik puti nan baduo
Pamato Intan Bongsu Urai
Lah patang ari nan kaduo
Alun ado juo urang datang
Masuaklah inyo ka dalam rimbo
Mancari barang ka dimakan

Ndak tampak buah apo tidak
Batang paraweh si kaduduak
Indak ado di tampek itu
Maalum di dalam rimbo rayo
Lai tampak anak pinang mudo
Umbuiknyo buliah dimakan
Jo apo pulo kan **digaruik** .
Ladiang jo pisau indak ado
Nak baliak inyo **maso itu**
Ka dangau tampeknyo tadi
Dek jalan lah ilang pulo
Babaliak baliak nyo di rimbo

Lah kalam kironyo hari
Indak dapek bajalan lai
Duduak inyo di bania kayu
Untuang kain lai tabawo
Kok indak tantu tambah susah

Manangih sajo kadoonyo
Tapi takuik kareh-kareh
Kok tadanga dek rimau jo baruang
Tantu badannya indakkan sadang
Iyo dek binatang rimbo nantun

Si Bongsu **muloi maratok**
Manyasali ayah bundonyo
Inyo biaso dimanjukan
Kini diazab dalam rimbo

"Antakan juo ambo bisuak
Jalan pulang tantu andeh tau

Andeh pulang ka Koto Tuo
Ambo pai ka Koto Lamo
Lai kan pandai ambo mancari
Iyo jalan ka nagari tu
Ambo lah acok pai ka sanan

Amak inyo lalok lakeh
Bajanji andehnyo maantakan
Usah inyo manangih juo
Badannya lah latiah mah tampaknya
Inyo latiah dek bajalan
Latiah pulo dek kalaparan
Batambah latiah dek manangih

Untuang tatidua kaduonyo
Bisuak pagi nyo tajago
Lah agak kuat mah badannya
Auih lapa indak tatahan
Dicari aia dalam rimbo
Dek lambek lamo bajalan
Tadanga garan bunyi aia
Bunyi aia agak mandaruik
Antah aia tajun antah sarasah
Dikaja malah tampek aia tu

Kironyo iyo anak aia
Tajun dari bukit randah
Janiah nan bukan alang-alang
Lah minum inyo kaduonyo
Dibukak baju dek si Bongsu
Nakmandi inyo maso itu
Bakato garan dang **andehnyo**
Mano nak kanduang Bongsu Urai
Usah mandi Upiak di situ
Antah kok tapian mambang

Antah tapian dewi rimbo
Indak baapo itu garan

Tapi kalau iko tapian hantu rimbo
Di mano kito dapek tau
Mularaik kasudahannya
Indak kan tau jalan pulang
Kito manjadi antu rimbo

Ado tampak tu mah garan
Jalan tampak dirambah urang
Antah jalan **rang mancari rotan**
Atau mancari dama kumayan
Mari jalan ko kito turuik
Untuang sampai kito kan kampuang

Bajalan kini kaduonyo
Bajalan balambek-lambek
Kaki si Bongsu alah bangkak
Indak talok bajalan lai
Dihirik sajo dek andehnya

Jalan lai batambah gadang
Lah dapek nyo badundun
Indak lai bairiang iriang
Anak aia batambah gadang pulo
Tapi alun lai tampak
Sasok jo ranah urang kampuang

Lah tibo malam nan ka tigo
Basuo pondok **jo ladang urang**
Ladang tingga mah garangan
Pondok tu lai baatok juo
Dindiangnjo alah mah rarak

Baranti inyo di sinan
Si Bongsu alah tagolek sajo

Bajalan malah Pamato Intan
Bajalan dalam samak ladang
Mancari barang ka dimakan

Dek untuang inyo indak kan mati
Iyolah mati kalaparan
Tampak sabatang tabu mudo
Alah mah manih tu agaknyo

Dicabuik garan tabu mudo
Dicabuik sakuaik tulang
Bumi jo langik nan kan tau
Baapo gadang atinyo
Iyo mandapek tabu nantun

Ditukua pucuaknyo jo batu tajam
Dibawo tabu padu anak
Dibawo juo batu tajam tu
Diambiak tabu dek si Bongsu

Dicampakkan kadalam aia
Bakato inyo jo berang
"Bukan iko makannan ambo"

Tapanca tangih Pamato Intan
Diambiaknyo tabu tu baliak
Untuang alun lai hanyuik
Dibukaknyo tabu jo batu tajam
Sudah itu ditukua-tukuanyo
Diramehnyo kadaun taleh
Disuruh minum ka si Bongsu

Sampalah tabu nan dirameh
Baaia juo gak saketeck
Dikunyahnyo haluih-haluih
Diluluanyo jo sapahnyo
Nak gak barisi paruik nyo garan
Lah sudah makan tabu itu
Tatidua malah kaduonyo
Barisuak pagi itu garan

Bajalan inyo sapanuah ladang
Dek tuhan ibo ka inyo
 Bia inyo indak tau bakeh Tuhan
Tuhan tau tu kainyo
 Dapeklah sarumpun ubi jala
Sadang babuah itu garan

Dicarinyo rantiang nan gak kuaik
Dikalinyo ubi jala tu
 Dapeklah tigo gadang-gadang
Gadang atinyo ndak tabado
 Dibawonyo ubi ka aia
Dibasuahnyo elok-elok

Dibawonyo ubi ka si Bongsu
 Disuruah makannyo jo si Bongsu
Diagiahkannyo duo buah
 Nan sabuah dimakannyo
Bakato si Bongsu maso itu

”Ndak ambo kan makan ubi matah
Ubi goreng makanan ambo
 Bia ambo mati ndak makan
 Itu di andeh nan katuju
Andeh bawo ambo ka mari

Awak kan hiduik sanang-sanang
 Iduik manjadi bini rajo
Andeh larikan masuak utan
 Mamakan tabu ubi matah
Batua gadang sayang andeh”

”Manolah Bongsu anak andeh
 Kito di dalam rimbo gadang
Panuah dek antu binatang jahek
 Basaba malah kau saketek
Andeh **namuah maanta kau**
 Tapi andeh ndak tau jalan

Kito lah sasek dalam rimbo
Kok indak kito bajalan
Maninggakan gubuak tampek batarak
Lapa sajo nan kan ditahan
 malakik ayah upiak datang
Atau rang lain disuruahnyo

Dek kareh kau nak bajalan
 Mancari barang kan dimakan
Baiko mah jadinyo
 Kito takuruang dalam rimbo

Kok kito ditangkok rimau
 Atau dilulua ula gadang
Alun kan baapo itu Bongsu
 Mati kito sabanta tu juo

Tapi kok kau lamah beko
 Indak dapek bajalan lai
Matilah kito dalam rimbo ko

Mati iyo balambek lambek
 Bukan sahari duo hari
Amuah sampai **bapakan pakan**
Antah iyo babulan bulan
 Bapikia kau tantang itu

Si Bongsu manangih sajo
 Indak inyo manjawek lai
Ubi tu indak dielengongnyo
 Susahlah hati Pamato Intan

Sayang andeh sapanjang jalan
 Sayang anak sapanjang panggalan
Bia baitu laku anaknyo
 Tantang dek inyo Pamato Intan
Usah sayangnyo nan kan abih
 Bakurangpun indak juo

Lah paneh kironyo hari
Dicari rabuak dek Pamato
Dari kayu-kayu lapuak
Atok gubuak tampeknyo tingga
Iyo ilalang nan lah kariang
Diambiak pulo tu saketek
Dibungkuihan ka rabuak tadi
Dilatakan di ateh batu aia
Batu aia nan **sangaik kareh**
Dicari batu aia nan basandiang
Nan kareh pulo itu garan
Ditokokkannya batu basandiang
Kasandiang batu nan talatak
Sakali di lakakkannya
Indak lah tampak apo apo
Sampai duo tigo kali
Mamanca tampaknya api

Kini inyo duduak di ateh batu
Batu putiah batu ampa
Ditadahkan tangan ka langik
Ditakuakan kapalo ka bumi
Mamintak inyo maso itu

Manolah langik nan batuah
Iyolah bumi nan sakti ko
Sarato bulan matohari
Agiah ambo api kalian
Anak ambo lah kalaparan
Kok lai dingin paruik manganduang
Salamaik inyo baliak kakoto

Baliak inyo ka batu cako
Didakekkan rabuak ka sandiang batu
Dilakakkan batu babarapo kali
Mamanca api rabuak tabaka
Sananglah hati Puti Pamato

Dicari rantiang kariang-kariang
Didakekkan ka rabuak nan tabaka
 Lah dapek api inyo garan
Dicari pulo tuanggua kariang
 Dilatakkkan diateh tanah kareh
Dibawo api kasinan

Lah gadang tampaknyo api
 Dibaka ubi nan duo tadi
Ado sabanta antaronyo
 Alah mah masak panggang ubi
Disuruah duduak anak kanduang
 Iyo mamakan panggang ubi

Si Bongsu indak nak bagarak
 Bagolek juo di tampeknyo
Sarupo paja umua tigo taun
 Nan alun tau di salah bana
Indak paduli andeh lah pajah
Indak acuah dijariah andeh

Diambiak ubi dek andehnyo
 Dibawo ka dakek anak
Baliaknyo ka tangah ladang
 Dicari pulo ubi jala
Lah dapek malah duo buah
 Dipanggang baliak keduonyo
Disimpan uantuak makan malam
 Alun takana uantuak awak
Nan duo uantuak anak juo

Lah sudah ubi dipanggang
 Lah baliak inyo garan
Indak ado tampak ubi lai
 Tapi ado mah nan lain
Iyolah taleh si kumbahang
 Taleh tu buliah dimakan
Tapi gak gata lidah dibueknyo

Itu diambiak untuak awak

Dijago api jan nyo padam
Buliah basuluah malam hari
Bisuak si Bongsu kok gak kuaik
Buliahlah jalan ditaruihkan
Lah sanjo kironyo hari
Dicari ilalang kariang
Dibuek kasua tampek tidua

Dek panek badan bakarajo
Tatidua nyanyak Pamato Intan

Tajago mandanga tangih anak
Inyo manangih mamakiak sakarehnyo

Bakato inyo maso itu

”Manolah Upiak Bongsu Urai
Apo lai juo ditangihkan
Kok tadanga dek rimau lapa
Dicabiaknyo kito baeko
Indak koh kau dapek bapikia”

”Dimano ambo ndak maratok
Ambo iyo bamimpi cako
Bamimpi tingga di ustano
Iyo ustano Koto Lamo
Bamain main jo rajonyo
Awak tajago dari mimpi
Kironyo baiko nasib badan”

Kok iyo upiak nak kasinan juo
Mangapo badan dipalatiah
Kuaik kan malah badan Upiak
Buliah kito taruih bajalan
Kok basuo kampuang urang
Dapek malah kito batanyo
Kamano jalan ka Pakan Lamo
Dek hari lah hampia pagi

Indak lalok inyo lai

Si Bong

Si Bongsu gilo manangih
Andehnyo gilo bapikia
 Indak inyo mangecek lai
Lah pagi kironyo hari
 Diajak si Bongsu ka bajalan
Tapi inyo aniang sajo
 Indak bagarak dari tampeknyo
Abihlah aka mandeh kanduang

Kok hari agak paneh
 Dicari ka ladang tingga
Barang-barang nan ka dimakan
 Takadang dapek ubi pulo
Barisuak hanyo taleh sajo
 Sudah itu paraweh mudo
Sakali dapek batiak mudo
 Baitu babarapo hari
Si Bongsu tatap diam sajo

Barang nan dapek dek andehnyo
 Kok lai lamak dihabihkannya
Nan tak lamak untuak andehnyo
 Inyo mangecek indak juo

Dek payah andehnyo mambujuak
 Ado pado satu katiko
Pagi-pagi maso itu
 Alah amuah inyo bajalan
Dilakekkannya baju rancak
 Bajalan inyo daulu
Andehnyo manuruik di balakang

Ado sabanta antaronyo
 Tadanga urang mangecek
Tampak pulo dari jauah
 Urang batigo bairiangan
Mungkin urang mancari rotan
 Tapi sabanta itu juo

Urang tu lari puntang pantiang
Sambia mamakiak "**mambang Gunuang**"

Bajalan juo inyo garan
Kaki panek inyo lah latiah
Indak ado tampek baranti
Dek paruik lah lapa pulo
Babaliak inyo ka pondok tadi

Barapo hari pulo di sinan
Mamakan umbuik jo pucuak
Ubi jo taleh ndak ado lai
Batambah laruik paratian
Sumangek si Andeh juo lah kurang
Mananti aja kадuonyo

Ado kapado satu pagi
Malamnya hari hujan labek
Untuang api indak padam
Tasuruak di bawah tunggu
Digadangkan api dek Pamato Intan
Badiang inyo di sinan
Si Bongsu bagolek juo

Tampak urang masuak ladang
Ado barampek laki-laki
Lah **gadang hati Pamato Intan**
Bakato inyo maso itu

”Manolah sanak nan barampek
Dari mano handak kamano
Bari jaleh ambo batanyo”

Manjawek saurang nan tuonyo
Kami ko iyo urang siko
Nak ka hutan mancari rotan
Siapo garan andeh iko
Siapo pulo nan lalok tu

Agak bapikia Pamato Intan
Apo garan nan kan disabuik
Disabuik nan sabananyo
Kok takuik urang manolong

Dalam inyo bapikia nantun
Bakato baliak urang cako

”Lah tigo kali kami lalu
Kami taruih babaliak pulang
Kami manyangko Mambang Gunuang
Rancak muko jo pakaian
Dek tadi kami taruih
Dek kami liek ado api
Mambang indak maikuik kan.api
Siapo garan dunsanak ko
Bari jaleh kami batanyo!!

”Kami urang bajua kayu api
Tasasek masuak rimbo rayo
Indak dapek **pulang lai**
Babaliak-baliak dalam rimbo
Mangkin lamo mangkin jauah
Alah sampai malah di siko

”Dari mano kironyo kakak
Nagari apo ditinggakan
Elok kakak pai jo kami
Lubuak Salasiah nagari kami
Sinan manjua **kayu api**”

”Manolah sanak nan batanyo
Koto Tuo ambo tinggakan
Iduik iyo mularaik sinan
Urangnyo rajin bakarajo
Kayu api dicari surang
Jarang urang amuah mambali”

Mandanga kato nan bak kian
Lah tagak si Bongsu di muko pondok
Bakato inyo maso itu
"Manolah urang nan barampek
Lieklah gaya tubuah denai
Denai bukan panjua kayu
Datang nan dari Koto Lamo
Bini rajo nan di sinan

Kok amuah mamak garan
Maantakan ambo kasinan
Ambo bari ameh perak
Cukuik uantuak iduik mamak
Dalam sambilan sapuluah taun"

Mandanga kato Bongsu Urai
Urang maliek ka andehnyo
Sarupo batanyo itu garan
Nan mano kato nan bana

Bakato baliak Pamato Intan
"Usah inyo sanak dangakan
Inyo tu iyo anak ambo
Dek lamo lambek di rimbo
Banyak keceknyo nan ndak bana
Macam urang batele-tele"

Mandanga kato andehnyo
Batambah berang Bongsu Urai
Bakato inyo jo marantak
"Manolah urang nan barampek
Usah inyo kalian dangakan
Inyo itu budak ambo
Inyo larikan ambo karimbo
Buliah naknyo jadi bini rajo

Bini rajo manggantikan ambo
Tolong antakan denai kini

Denai ko urang taniayo
Lai denai kan mambaleh jaso
Denai agiah ameh jo intan
Denai angkek jadi pangulu
Laki denai saparentah denai
Indak kan susah mamak lai
Iyo hiduik mancari rotan

Mancaliak nyo mangecek ndak manantu
Maradang maninggi kato
Muaklah urang nan mandanga
Indak ado nan picayo
Bakato inyo pada Pamato

"Manolah kakak rang Koto Tuo
Siapo garan namo kakak
Mupakaik kami barampek
Kok lai amuah kaampeknjo
Kami bawo kakak ka kampuang

Kami pailah daulu
Manjapuik rotan dari utan
Indak jauah kami bajalan
Rotan lah lamo ditinggakan
Manjapuik sajo kami lai

Lah pai urang nan barampek
Bakato si Bongsu dangan berang
Manolah andeh janyo ambo
Sampai ati andeh baitu
Mangatokan ambo urang tele
Sampai urang tu ndak amuah
Baurusan iyo jo ambo lai

Elok ambo dibunuah sajo
Dari diazab macam iko
Badan latiah peruaik lapa
Awak batambah buruak juo

Sarupo jo antu rimbo

Kok pulang ambo baeko

Indak amuah lai kakak jo ambo

Dek awak indak rancak lai

Baitu di andeh mah nan elok

Mularaik ambo saumua hiduik

Pamato Intan diam sajo

Dikabeknyo kajn elok-elok

Dilipeknyo **nan tajamua**

Dibakanyo lalang tampek tidua

Nak barasiah gubaak tu tingga

Ado sabanta antaronyo

Lah datang urang parotan

Bakato inyo maso itu

”Manolah kakak nan di siko

Alun lai kakak sabuik

Namo kakak nan sabananyo

Kakak tampaknyo mudo baru

Alun patuik **dipanggiakan kakak”**

”Ambo banamo Pipik Padi

Dek ketek suko manggatok

Lah gadang dipanggia Andeh Lubuak

Dek anak ambo nan tuo

Iyo banamo mah si Lubuak

”Manolah kakak andeh Lubuak

Mari malah kito ka kampuang

Basuo jo anak bini kami

Kami ko iyo urang bangsaik

Indakkan dapek manolong kakak

Tapi dari tingga dirimbo ko

Elok juo pulang ka kampuang.”

”Manarimo suko ambo garan

Bumi jo langik nan kan tau
Barapo gadangnyo ati ambo
Langik mambaleh jaso sanak”

Bajalan urang nan barampek
Duo urang inyo kamuko
Disuruahnyo andeh Lubuak
Jo anaknyo bajalan di tangah tangah
Nan baduo di balakang pulo

Tapi si Bongsu aniang sajo
Saketek inyo indak bagarak
Andehnyo aniang sajo pulo
Bajalan inyo maso itu
Saroman urang indak acuah

”Baapo iko garan
Anak kakak indak amuah pai
Baapo pulo inyo tingga
Di dalam rimbo gadang nangko
Indak kan sadang inyo garan
Iyo dek rimau nan banyak siko

Bakato sanan Bongsu Urai
Kok ndak amuah maantakan denai
Iyo kanagari Koto Lamo
Bia tingga ambo di siko
Bia dimakan harimau siko

Budak ambo ndak bahati
Ndak bahati ndak bajantuang
Indak ambo ka pai jo inyo
Kok mamak amuah maantakan
Denai pai tu jo mamak
Kok indak tinggakan denai siko
Bia dimakan rimau campo

Bakato garan dang andehnyo
”Bajalan sajo kito daulu

Inyo manuruik tu baeko
Kok sanak bajanji maantakan
Payah sanak di turuikkannya

Bajalan urang nan balimo
Bajalan bagageh gageh
Sudah itu nyo baranti
Duduak dalam padang lalang
Indak tampak lai dek si Bongsu

Ado sabanta antaronyo
Tadanga si Bongsu manukiak nukiak
Mamakiak sahabih suaro
Manolah urang nan banyak tu
Samo hantu mah kironyo
Amuah mambunuah badan denai
Tingga surang dalam rimbo

Hai Puti Pamato Intan
Indak babanak kau garan
Amuah mambunuah anak kanduang
Ndak takuik kau ka langik
Kan kanai kutuak kau dek bumi

Usah inyo **didangkan**
Mungkin mimpinyo dalam rimbo
Mambuek inyo cando itu
Andehnyo puti bapaknya rajo
Lakinyo mah rajo pulo
Inyo tu anak gaduh baru

Alah bajalan Bongsu Urai
Di tantang urang nan maandok
Dibiakan urang sapanggalah
Baru inyo dituruik kan
Inyo lai mancaroteh juo
Indak maliek kabalakang
Untuang jalan luruih sajo

Lah patang kironyo hari
Lah sampai kakampuang urang
Barulah si Bongsu tau
Urang nan tadi di balakang

Di muko sabuah lapau
Bakato urang nan barampek
"Duduak kakak daulu
Di muko lapau urang nangko
Kami pulang daulu
Maagiah tau urang di rumah
Sabanta lai kami datang
Manjapuik kakak kamari

Iyo sabanta antaronyo
Datanglah urang nan barampek
Saurang padusi mairiangkan
"Manolah kakak andeh Lubuak
Karumah ambo kakak daulu
Di sinan kito barundiang"

Bajalan urang kasadonyo
Si Bongsu manuruik sajo
Sabanta hanyo di jalan
Sampai ka rumah Sutan Mudo
Nasi mananti di hidangan
Lah makan urang kasadonyo

Lorong kapado Pamato Intan
Baapo bana lapa paruik
Asa rajo di bawo juo
Duo suok katigo kanyang
Baitu adai salamonyo
Kok makan di rumah urang
Tantang si Upiak Bongsu Urai
Makan sajo sakanyangnyo
Dék lamo ndak basuo nasi
Paniang inyo maso itu

Muntah pulo mah saketek
Disuruah lalok di ruang tangah

Lah sudah minum jo makan
Bakato garan Sutan Mudo

"Iyo kapado Andeh Lubuak
"Manolah kakak Andeh Lubuak
Sapakan ko andeh di siko
Duduak-duduak malapeh panek
Pakan datang karumah adiak ambo
Pakan ka tigo pindah **lai**
Baitu pakan nan ka ampek

"Kok Kakak alun lai nak pulang
Dalam pakan nan ampek ko
Kami buekkan kakak gubuak
Agak jauah katapi **kampuang**
Iyo di tapi jalan juo
Di sinan ado ladang ambo
Ladang tingga lah jadi sasok"

"Mano dunsanak nan barampek
Batua dunsanak nan ambo dapek
Ambo talanta dalam rimbo
Diuruih baitu rupo
Tarimo suko ambo garan
Bumi jo langik kan mambaleh
Jaso sanak kapado ambo
Ambo nan tidak batanago

Lorong kapado Pamato Intan
Urang manjo dari lahia
Indak panah mambasuah piriang ciek
Apo lai manjantiak tanah
Kiniko inyo bakarajo
Manolong urang punyo rumah

Apo sajo karajo urang padusi
Iyo manjamua jo manumbuak

Sarato batanak jo manggulai
 Sadonyo inyo karajokan
Gadanglah ati andeh Sutan Mudo
 Buliah inyo manganyam lapiak
Lah sudah karajo hari-hari
 Sampai-sampai mambasuan piriang
Karajo pulo inyo garan

Manganyam lapiak bakua jo kampia
 Sarato mambarasiahkannya
Sampai dapek nyo dianyam
 Sutan Mudo mancari pandan
Sarato kumbuah jo mansiang

Di rumah nan ka duo
 Baitu pulo dibueknya
Baitu di rumah nan katigo
 Nan kaampek apo to lai
Inyo alah tabiaso
 Lah pandai pulo nyo manganyam

Tantang si Upiak Bongsu Urai
 Macam-macam nan dibueknya
Kadang-kadang nyo manangih
 Sudah itu nyo galak kareh
Sarupo urang batuka aka
 Jangangkan inyo kan manolong
Pariang nyo urang nan mambasauh

Lah habih hari ampek pakan
 Rumah baru lah siap pulo
Batunggak kayu nan bakatam
 Baitu pulo mah lantainyo
Dindiangnyo buluah dianyam
 Baitu pulo mah lotengnyo
Atoknya daun rumbio

Dek urang nan bakarajo
 Bukan nan barampekitu

Ditolong anak kamanakannyo
Urang kampuang nan **suko rela**
Ado pulo mah nan sato

Pado hari andeh Lubuak pindah
Makan basamo pulo sinan
Pangulu kampuang juo sato
Nasi dimasak rang basamo

Katiko urang habih pai
Tingga inyo duo baranak
Rumah lah cukuik pulo garan

Jo pariuak jo sanduaknyo
Ladiang tajam yo ado pulo
Paambiak kayu ka dijua
Dek pangkua iyo ado pulo
Dapeklah laman ditanami

Pagi-pagi inyo mancangkua
Sudah itu mancari kayu
Disambiakan pulo mancari pandan
Patang-patang manjua kayu
Malam-malam inyo manganyam
Itu karajo tiok ari

Lah tigo bulan hari habih
Indak taraso itu kawan
Bahaso lah lamo nyo di rantau
Hari ndak ado nan tabuang
Sambuang manyambuang karajonyo

Lah tuo jaguang di parak
Sadang lamak nyo diabuuh
Dimasak malah agak banyak
Dianta karumah dunsanak
Iyo dunsanak nan barampek

Bakato sanan Sutan Mudo

Manolah kakak Andeh Lubuak
Usah tanaman di bagi sajo
Iyo kapado kami nangko
Jualah padu urang **lain**
Atau tuka jo garam gulo
Dek lado lah ado pulo

Hari kakak habih dek itu
Kami indak dapek manolong
Kok kakak kakurangan beko
Atau kok sakik ngilu paniang

Manolah sanak Sutan Mudo
Ambo antakan nan balabiah
Di siko banyak anak-anak
Indak kan dapek itu garan
Pambaleh guno sanak ambo

Alah mah sampai anam bulan
Iyo tingga di Salasiah
Iyo Lubuak tampek rangpangasiah
Urang panolong urang lalu
Tapi sungguahpun baitu
Tiok harinyo intai-intai
Kok ado urang nan ka pai
Iyo kakampuang bundo nyo
Ka nagari Sungai Pagu
Tapi indak nan basuo
Lah jarang urang kasinan
Iyo di Bukik Rimbo Panjang
Ado panyamun nan basarang
Takuik urang malaluinyo

Ado padu suatu hari
Inyo basuo itu garan
Iyo jo urang Koto Tuo
Urang dagang itu garan
Urang bajua kain baju

Urang itu lupo kapadonyo
Dek ruponyo balain bana
Mukonyo putiah dijilek ari
Basisiak bak kaki ayam
Bacampua pulo jo tuturan
Tuturan itam macam capuak
Tapi inyo tau di urang tu
Urang banamo Tukang Mudo
Sabalam manjua kain
Inyo manjadi tukang rumah

Diajaknyo urang tu singgah
Iyo singgah minum jo makan
Bacarito urang tu garan
Apo itu nan lah tajadi
Di nagari Koto Tuo
Rajo kito **alah** mah mati
Mati dibunuah Angek Garang
Sasudah andeh maninggakan kampuang
Manti Tuo jo Datuak Mangku
Kaduonyo diparantikan
Antah di mano inyo kini

Nagari kito ndak aman kini
Salamo Angek Garang mamarintahnyo
Pancilok parampok banyak masuak
Maambiak padi jo taranak
Dubalang pandeka maambiak pulo
Katonyo iyo untuak rajo
Ambo lah lamo ndak kakampuang
Alah garan babarapo bulan
Ambo **bawo anak bini ambo**
Iyo iduik di Salayo
Nagari kini ambo garan
Iyo barasa dari sinan

Ampunlah ambo Andeh Suri
Usah andeh pulang kakampuang

Rumah gadang alah tabaka
Dibaka Rajo Angek Garang
Di mano andeh kan tingga

Urang mungkin indak amuah
Manarimo andeh dalam rumah
Sabab andeh dicari rajo
Dicari kan dibunuah
Siapo urang maandokkan
Urang itu dibunuah pulo

Inyo mamasang mato-mato
Iyo dalam tiok nagari
Untuak mancari Tuanku Puti
Iyolah Puti Bongsu Urai

Mandanga kato urang nantun
Sato mangecek mah si Bongsu
"Manolah mamak Tukang Mudo
Antakan ambo ka Pakan Lamo
Ambo agiah mamak baeko
Kain baju padi taranak"

"Ambo indak akan kasinan
Ambo kan taruih ka Salayo
Anak bini lamo mananti
Sakik sanangnyo ambo ndak tau
Sabagai pulo itu garan
Di lua nagari koto Lamo

Banyak parampok jo pambunuah
Indak ingin ambo kasinan
"Manolah Mamak Tukang Mudo
Kok mamak samo jo ambo
Mamak indakkan digaduan
Picayolah mamak ka ambo"

"Ampunlah ambo Tuanku Puti
Ampun jo maaf ambo mintak

Ambo indak nio kasinan
Ambo banci ka Angek Garang
Salamo inyo mamarentah
Indak ambo injak Koto Tuo
Baitu pulo Koto Lamo”

”Manolah Andeh Koto Tuo
Iko pitih ado saketek
Kain saruang ado sahalai
Andeh tarimo sambahan ambo
Hanyo saki ko ado kini”

”Manolah sanak Tukang Mudo
Lah dapek kaba dari kampuang
Lah sanang hati ambo garan
Usah ambo dibari pulo
Banyak sudah barutang budi
Kapado urang bawah langik ko
Lah ilang tuah dek manarimo
Manarimo paragiah urang
Awak daulu biaso baragiah
Lah ilang sari dek kurangtanago
Ditolong urang bakapanjangan
Awak nan patuik manolong urang”

”Indak baapo itu andeh
Indak kan ilang tuah andeh
Andeh bukan maminto minto
Tapi urang nan mambari
Adaik iduik itu andeh
Sakali di ateh sakali di bawah
Nanti andeh kan naiak lai”

Tasanyum masam Pamato Intan
Kamano inyo ka naiak lai
Rumah gadang alah tabaka
Dek rajo lah mati pulo
Rajo kini badandam gadang
Pulang kakampuang indak dapek
Indak ado urang kan maanta.

XI. BONGSU URAI PULANG KA KOTO LAMO

Alah sataun Pamato Intan
Di nagari Lubuak Salasiah
Alah agak elok iduiknyo garan
Ubi jaguangnyo lah bahasia
Baitu taleh kaladinyo
Pisang mulai babuah pulo

Inyo indak karimbo lai
Pai mancari kayu api
Dibueknyo palanta di muko rumah
Inyo bajaga itu kini
Bajaga kopi jo juadah
Goreng ubi abuih jaguang
Batiah jaguang ado pulo
Taleh jo pisang nan diabuih
Ado pulo dijuanyo

Ado pada satu katiko
Datang urang pakaian dubalang
Inyo masuak nak minum kopi
"Ambo ado mandanga kaba
Andeh ko urang Koto Tuo
Tukang manjua kayu api

Ambo dubalang Koto Lamo
Ambo disuruah rajo kami
Pai mancari yo adiaknyo
Mancari Puti Bongsu Urai
Urang nagari Koto Tuo
Ado koh andeh mandanga danga
Di mano paja tu kini
Kakaknyo Puti Andeh Suri
Rusuah risau mamikiakannyo
"Mano dubalang nan batanyo
Pabilo garan painyo
Iyolah pai dari kampuang

Kamano arah painyo
Jo siapo inyo bajalan”

”Inyo pai katiko parang
Ayahnyo dibunuah **rajo kami**
Rumah gadang dibakanyo pulo
Inyo pai jo andehnyo
Adoknyo karimbo gadang”

”Kok adoknyo karimbo gadang
Mungkin di sinan sampai kini
Atau **koh mati dek kalaparan**
Mungkin juo ditangkok rimau”

”Manuruik pasan rajo kami
Kami cari sampai dapek
Kok indak dapek usah pulang
Kok inyo mati kalaparan
Tulang tulangnya bawo pulang
Kok nyo ditangkok harimau
Kapalo jo abuaknya bawo pulang
Dek rimau ndakkan makan abuak
Lah kami kacau rimbo gadang
Lah kami masuki koto jo kampuang
Bongsu Urai indak basuo.”

Si Bongsu mandanga kaba iko
Nan kudian disabuik dubalang
Kulua inyo dari rumah
Bakato inyo maso itu
Manolah urang nan mangecek
Siapo garan mamak nangko
Nan manyabuik sabanta ko
Bongsu Urai indak basuo
Ambolah urang Bongsu Urai
Cubolah liek muko ambo
Maliek muko gadih mudo iyø takajuik
Iyo takajuik rang dubalang

Nyato gadih tu urang rancak
Raso lah panah dilieknyo
Antah di mano itu garan

Masuak si Bongsu dalam rumah
Dipakainyo baju Putinyo
Babaliak ruponyo bak daulu
Di maso dalam pajalanan
Inyo indak ado bakarajo
Gilo lalok dalam pondok
Indak ado mandapek paneh
Ruponyo indak mah barubah

Bakato dubalang maso itu
"Upiak lah jaleh paja rancak
Pakaian tu iyo mah pakaian
Nan biaso dipakai Puti Puti
Kok iyo Upiak Bongsu Urai
Cubo sabuikkan iko kini
Siapo namo rajo kami
Siapo pulo andeh suri kami
Siapo andeh suri nan lah mati
Siapo namo andeh jo ayah
Cubo katokan tarang-tarang"

Untuak apo itu ditanyo
Ambo ko si Bongsu Urai
Untuak apo ambo baduto
Lah sataun ambo manangih
Mintak anta ka Koto Lamo
Rang tuo ko nyo ndak amuah
Ingin maazab ambo siko
Ka inyo bunuah sampai mati

Manolah andeh nan bajaga
Iyokoh iko Bongsu Urai
Cobo malah andeh tarangkan
Nak sanang dalam kiro-kiro

Lah banyak garan urang rancak
Mangaku dirinyo Bongsu Urai
 Tapi katiko disalidiki
Indaklah itu Bongsu Urai

Tapikia garan maso itu
 Iyo dek Puti Pamato Intan
Untuak apo anak dilarang juo
 Pai kapado Angek Garang
Indak inyo kan salamaik
 Kamano inyo dibawo

Sabagai pulo itu kini
 Kok ibo ka si Mayang Taurai
Indakpun baliak si Bongsu ko
 Si Mayang indak kan sanang juo
Hati si Angek Garang
 Alah mah rusak bakeh inyo
Bakato inyo maso itu

”Mano dubalang nan batanyo
 Mungkin iyo inyo garan
Nan banamo Puti Bongsu Urai
 Ambo sandiri indak tau
Ambo dapek inyo di rimbo
 Katiko mancari kayu api
Suruah sajo inyo garan
 Manjawek tanyo dubalang tadi

”Untuak apo inyo ditanyo
 Indak kan amuah nyo mangaku
Inyo tu iyo budak ambo
 Ambo ko kan dijuanyo
Kasia sajo rang nan amuah
 Iyo mambali badan ambo”

Kok iyo Upiak Bongsu Urai
 Cubo jawek tanyo ambo tadi

Nak ado bukti bakeh ambo
Jan ambo takicuah pulo
Sarupo urang nan daulu

”Bawo sajo ambo ka inyo
Alah jaleh tu dek inyo
Ambo ko iyo Bongsu Urai
Dubalang kan ambo agiah
Pitih jo barang kain baju”

”Kok itu Upiak kecekkan
Ambo indak amuah mambawo
Kok Upiak bukan Bongsu Urai
Di mano Upiak dapek pitih
Inyo nan indak kan mambayia
Inyo iyo mato karanjang
Paja rancak diambiak juo
Biapun indak Bongsu Urai
Dubalang indak dibayianyo”

”Mano dubalang nan duduak ko
Inyo tuyu Bongsu Urai
Anak Tuanku Rajo Nan Sati
Kakaknyo banamo Mayang Taurai
Rajo banamo Mangkuto Ameh
Di sabuik urang Angek Garang”

”Dimano garan andeh tau
Inyo sandiri indak tau
Lah duo kali ambo tanyo
Inyo indak amuah manyabuik kan”

Mandanga kato dubalang tu
Bakato sanan Bongsu Urai
Bukannya ambo indak tau
Ambo alun manyabuikkan
Denai mauji rang tuo tu
Amuah inyo atau kok indak

Mangatokan siapo ambo garan
Kok inyo nak manahan ambo juo
Untuak diazab taruih taruih
Atau inyo amuah malapeh
Ambo pai ka Koto Lamo
Untuak hiduik basanang sanang
Iyo manjadi bini rajo”

”**Manolah Upiak Bongsu Urai**
Mandeh manahan kau siko
Bukan dek banci andeh ka kau

Mukasuik baiak tu nak kanduang
Andeh takuik kau kan malaraike
Sarupo si Pinang Masak
Sarato Upiak Mayang Taurai
Angek Garang urang takutuak
Lambek laun nyo kan diukun
Diukun langik sarato bumi
Iyo kau kan sato pulo

Mukasuik ambo mambawo Upiak
Kan lah andeh sabuikkan juo
Kito pai ka Sungai Pagu
Di sinan kakak andeh manjadi rajo
Kamanakkanno hanyo kalian
Indak ando tu nan lain
Nan kan manggantikan inyo
Untuak manjadi rajo isuak

Anaknyo ado nan bujang
Kok upiak kawin jo anaknyo
Paja tu buliah tu mah isuak
Manggantikan ayahnyo
Manjadi Rajo Sungai Pagu
Kok inyo kawin jo nan lain
Indak buliahnyo jadi rajo”

”Usah itu disabuik juo
Denai indak suko nan lain
Bia baapo kan rancaknyo
Itu mah urang Sutan Pamenan
Ambo tulak abih-abih
Kini nan lain di sabuik pulo
Baapo denai kan malarai
Itu bana nan dipikiakan
Antah apo dandam ka denai
Mungkin juo bak kato kak rajo
Kau daulu nak kawin jo inyo
Tapi inyo indak amuah

Kini ko kau alah buruak
Bak hantu di dalam rimbo
Indak kan amuah inyo lai
Iyo kan kawin jo kau ko
Inyo iyo mancari kau
Kan dicancangnyo habih-habih
Sarupo jo laki kau
Dek berangnya itu garan
Denai nan indak disarahkan”
Mandanga kato patangkaran
Bakato sanan dubalang tu
Ampunlah ambo Andeh Suri
Andeh Suri rang Koto Tuo
Kiniko jaleh tu dek ambo
Andeh nan Puti Pamato Intan
Sataun kito ndak basuo
Sarancak itu andeh daulu
Kini iyo barubah bana
Tantang dek Puti Bongsu Urai
Alah takana juo kini
Tadi tu ambo yo gak lupo
Maalun, urang jolong gadang
Duo taun indak tampak
Tantu ruponyo gak barubah

Bialah inyo ambo bawo
Tapi andeh tinggalah di siko
Inyo iyo lai manyabuik
Kok urang basuo jo andeh
Disuruah cancang jadi bubua”

”Mano dubalang Koto Lamo
Dangakan malah kato ambo
Si Bongsu iyo anak ambo
Sadangkan ula binatang biso
Lai sayang pado anaknyo
Kok kunun kito manusia
Dek sayang kami tu mah garan
Mangko inyo dibawo lari”

Lah duo anak disarahkan
Kapado Rajo Koto Lamo
Jadinyo mambuek sakik hati
Nan katigo nak kami tahan
Tapi iko mah jadinyo

Kok si Bongsu dapek dilarang
Bamain ka Koto Lamo
Iyo duo taun nan lalu
Lai juo inyo garan
Kan dapek jadi bini rajo

Kamanakan bapaknyo indak ado
Lakinyo dapek dipilih urang
Manggantikan ayahnyo isuak
Itu inyo dipatunangkan
Iyo dengan kamanakan jauah
Nan banamo Sutan Pamenan

Kakak ambo rajo pulo
Iyolah rajo Sugai Pagu
Dunsanak padusi ambo surang
Taniaik di nyo tu garan

Kan mangwinkan dang anaknyo
 Jo saurang anak ambo
Buliah anaknyo jadi rajo

Tapi iko mah candonyo
 Pulang kakampuang alun dapek
Si Bongsu marentak nak baliak
 Baliak kapado Angek Garang
Indak dapek diajari
 Jo lunak inyo malawan
Jo kareh apo to lai”

”Mano Mandeh Pamato Intan
 Ambo lai baranak pulo
Baranak padusi sagadang inyo
 Ambo tau itu garan
Baapo urang sayang ka anak

Ambo suruah anak ambo
 Iyo pai ka neneknyo
Itan di nagari Talang Babungo
 Ambo lah lamo iko andeh
Manjadi dubalang di ustano
 Tau bana ambo garan
Laku parangai Angek Garang

Kok urang katuju dek inyo
 Indak dapek mananti ari
Anak rajo jadi andeh suri
 Rang kampuang jadi pamenan
Asa urang rancak saktek
 Lah punyo inyo tu garan

Andeh jo bapak anak nantun
 Diganjanyo jo pitih ameh perak
Urang mudo nan suko di paja tu
 Dibuang jauah dari nagari
Atau dibunuah mati sajo

Kini baiko malah andeh
Kok barek bana hati andeh
Untuak malapeh anak andeh
Bia inyo indak ambo bawo
Tapi iyo itu garan
Ambo indak buliah baliak lai
Iyo ka nagari Koto Lamo
Bini ambo rang Talang Babungo
Bia kami baliak kasinan
Indak baapo itu mandeh
Ibo bana ambo garan
Maliek andeh lah malarai
Kan tingga pulo surang siko
Kok tibo sakik ngilu paniang
Siapo urang kan manolong”

Mandanga kato nan bak kian
Alah mamakiak Bongsu Urai
Manolah mamak dubalang ko
Kok indak ambo dibawo
Ambo bunuah padusi ko
Ambo cancang jo ladiang gadang
Sudah itu ambo gantuang diri
Alah koh sanang hati mamak
Baitu pulo rang tuo ko
Kato putuih ambo katokan
Indak dapek diubah lai

Tatakuampak dubalang tu
Bakato sanan Pamato Intan
Sanak dubalang Koto Lamo
Eloklah inyo sanak antakan
Bia ambo tingga di siko
Indak inyo panah manolong
Kok ambo sakik ngilu paniang
Malengong sajo inyo indak
Kok kunun mancari ubek

Hanyo sabuah pintak ambo
 Sabuik kan ambo alah mati
Siapo sajo nan batanyo
 Kacuali Mayang Taurai”

”Kok baitu kato andeh
 Barisuak pagi kami barangkek
Iyo pagi-pagi buto
 Iko pitih ado saketek
Buekkan kami nasi bungkuah
 Talua abuih jo samba lado
Jadi itu untoak lauaknyo”

Ambiaklah pitih sanak baliak
 Sakadar nasi duo bungkuah
Dapeklah ambo maadokan
 Baitu lauak pauaknyo
Antah paralu pitih tu beko
 Jalan nan jauah kan ditampuan

Kok kami mambawo nasi
 Indak paralu pitih lai
Tibo sajo di Koto Lamo
 Lah banyak kami dapek pitih
Di tampek kami bamalam
 Indak kami kan mambayia
Sagalo kadai jo lapau
 Nan ado di tangah jalan
Di nagari bakuliliang ko
 Alah di bayia rajo kami
Untuak dubalang nan barangkek
Mancari Bongsu Urai
 Sataun lamonyo ilang

Beko rakyat nan bahabih
 Sadang iduik nyo lah malaraike
Tinggalah andeh daulu
Ambo pulang ka lapau ambo

Bisuak pagi ambo kamari

Elok makan daulu siko

Iyo makan jo samba lado

Antah hanyo sakali iko

Kito makan basamo

Rugi malah kito andeh

Lapau ambo alah dibayia

Iyo untuak sabulan ko

Baitu pasan rajo kami

Sabalun dapek Puti Bongsu

Usah pitih dipikiakan

XII. BONGSU URAI MANDURHAKO

Tasabuik Puti Pamato Intan
Lah tingga surang inyo kini
Langang lingau raso dek inyo
Salamo baduo jo si Bongsu
Bia inyo ndak mangecek
Ado juo mah bakawan
Ado urang kan dimasakkan
Nan kan dijapuik kan aia mandi
Taubek juo hati susah

Katiko siang itu garan
Banyak urang datang mambali
Sanak barampek jo bininyo
Sarato anak-anaknyo
Acok datang mangawani
Untuak bamain galak galak
Lah lupo juo sakik iduik

Kok lah malam hari garan
Taraso barapo paiknyo
Dek iduik tagolek surang
Laki mati anak lah pai
Ayah jo andeh lah mati pulo
Sanak jauah tingga di kampuang

Awak biaso tidua di anjuang
Di ateh tilam tigo lampih
Diantaro banta nan basusun
Dalam kalambu suto cino
Indak digigik rangik ciek

Kini baiko parasaian
Tidua di ateh papan kareh
Rangik mandanguang bagai labah
Apo garan salah badan
Kapado bumi sarato langik

Baiko bana nan ditangguang

Ado sabanta antaronyo
Takana salah bakeh ayah
Sarato mandeh kanduang badan

Wakatu inyo tu manulak
Iyo kawin jo Angek Garang
Tapi alah mintak ampun
Lah acok pulang kakampuang
Mambawo anak nan batigo
Katiko ayah jo andehnyo
Iduik juo itu garan

Dek lamo bakalamoan
Hampia tiok malam ko tajadi
Pangana nan macam iko
Badannya alah tambah kuruih
Ruponyo alah tuo bana
Alun lai garan ampek puluah

Pikia bapikia macam itu
Lah banyak bulan talampau
Indak tatahan tu dek inyo
Taragak pado anak-anak
Talabiah Mayang Taurai
Lah lamo indak basuo
Takana dalam hatinyo
Handak pai ka Koto Lamo
Manjadi urang mintak mintak
Bia maliek dari jauah sajo
Sananglah juo dalam hati

Didatangi sanak nan barampek
Disabuikkan mukasuik hati
Malarang urang kasadonyo
Dek iduiknyo alah agak elok
Kok pai pulo jauah-jauah

Kok tajadi macam daulu
Tantu inyo kan tambah susah
Daulu lai mah baduo
Iyo jo si Upiak Kuniang
Kini inyo dilarikan urang
Bajalan jo siapo lai

Tapi inyo ndak tatagah
Bakato inyo maso itu
"Ambo pai indak kan lamo
Barang sabulan duo bulan
Sakadar mancubo cari sajo
Anak ambo si Upiak Kuniang
Kok indak lakeh nyo basuo
Ambo babaliak mah kamari

Tantang rumah jo alaiknyo
Indak ado ambo pangapokan
Tolong sajo malah unyi
Dek saurang anak kito
Siapo nan amuah sajo
Ubi jala jo ubi kayu
Lah ampia tuo itu kini
Indak cukuik sabulan lai
Alah buliah tu diambiak

Dek jaguang alah bapanggau
Pisang banyak pulo nan tuo
Buliah digatok malam-malam
Dek paja-paja nan maunyi."

"Bukan itu kami rusuhakan
Tapi diri kakak surang
Indak tantu arah tujuan
Kok abih pitih di jalan
Anak indak juo basuo
Mungkin tajadi itu beko
Kakak manjadi rang mintak mintak

Bialah mati kalaparan

Kamintak mintak ambo indak
Indak ambo kan mambawo
Iyo tampuruang atau talang
Manampuang nampuang pambarian

Tapi anyo akan sabuah
Kok urang bajalan surang
Bajalan ndak tantu arah
Tantu disabuik pamintak mintak
Atau urang batuka aka
Salamat tingga sanak sadonyo
Kok ambo indak babaliak
Rilakan sagalo nan tamakan
Sarato jariah payah sanak
Galagah batang galagah
Elok ditateh madang baliak
Kami tagah indak tatagah
Kami suruah mah baiak-baiak

Bajalan malah Pamato Intan
Mamakai kain campang campiang
Kok dipakai nan gak elok
Pitih saketek nan di pinggang
Kok diambiak urang pulo
Inyo bajalan gontai sajo
Di mano panek nyo baranti
Nasi mah ado di bawonyo
Untuak tahan duo hari
Goreng ayam jo abuih talua
Itu untuak lauak pauaknyo
Abuih ubi jo abuih taleh
Ado pulo panambahnyo
Dibawo saketek-saketek

Di mano malam nyo baranti
Manumpang lalok di kadai urang
Dek inyo mambawo parang

Diambiak malah kayu api
Dijuang ka lapau nasi
Kadang-kadang sampai ka pakan
Batambah juo balanjo saketek

Dek lambek lamo di jalan
Sampai inyo katapi Koto
Katapi nagari Koto Lamo
Singgah inyo kadalam kadai
Diganti baju compang campiang
Jo baju nan agak elok
Tapi alah lusuah juo

Dek labuah basimpang tigo
Ditanyo jalan ka ustano
Inyo mancari dang adiaknyo
Jadi dubalang di ustano
Nan bagala Sutan Diateh
Ditunjuakkan urang labuahnya

Bajalan inyo lambek-lambek
Lah sampai kalua pagu
Lah tampak Sutan Diateh
Sadang duduak dakek rangkiang
Mancaliak urang bakarajo
Manurunkan padi kakatidiang

Disuruahnya paja ketek
Manjapuik Sutan Diateh
Alah mah tibo inyo garan
Takajuik inyo maso itu
Bakato tapatah patah
Ampunlah ambo Andeh kanduang
Mangapo Andeh kamari
Kok tampak dek rajo kami
Andeh dipancaung jo padangnya
Inyo di anjuang tumah kini
Untuang kok lai nyo takalok

”Baapo garan caritonyo
Wakatu si Bongsu pulang
Lai koh inyo takana juo
Iyo dek Rajo Angek Garang
Lai koh elok sambutannya.

Mandanga kato andeh tuo
Galak tabahak Sutan Diateh
Bakato inyo maso itu
Urang dicari nan lah pulang
Indak tabado banyak pitih
Nan lah dihambua-hambuakan
Untuak mancari Bongsu Urai
Di mano hatinyo ndak kan sanang

Baru tibo kami garan
Tibo maso tangah hari
Ambo balari masuak ustano
Tatingga Puti di halaman
Baru abih ambo manyambah
Tagak Tuanku Angek Garang
Dikaja Puti kahalaman
Puti Bongsu mangaja pulo.
Dijulang Tuanku tigo kali
Dipangku dibawo kateh anjuang

Pado maso katiko itu
Puti Tuo turun kahalaman
Andak manyuruah rang manjamua
Mandakek inyo kaadiaknyo
Indak malengong Puti Bongsu

Barapo hari nyo ndak turun
Dari ateh anjuang perak
Indak ado urang nan tau
Galaknya sajo nan tadanga
Galak badarai kaduonyo
Mambuek urang banyak jijik

Makan minum keduonyo
Dilatakan di tanggo anjuang
Dibawo masuak dek Tuanku
Baitu aia mandinyo
Baitu juo pakaianyo

Disabuik padu dayang-dayang
Puti Bongsu inyo mah sakik
Tapi galaknyo kareh bana
Indak ado urang nan picayo

Tantang Tuanku Nilam Cayo
Sarato Tuanku Manti Tuo
Sakali inyo nak datang
Basuo jo Puti Bongsu
Mandanga galaknyo dari laman
Babaliak abih keduonyo
Indak inyo datang-datang lai
Kacuali maso baralek
Alah sabulan Puti di rumah
Inyo mamintak nak baralek
Ingin manjadi anak daro
Dek rajo tantu diiyokan
Bia nagari dalam susah

Dicari padi jo taranak
Iyo kanagari Koto Tuo
Dipaso urang bakarajo
Baralek sabulan panuah
Sarupo alek Puti Mayang
Tiok hari baarak-arak
Anak daro galak badari
Tacangang urang nan maliek
Usah kan lai Puti Puti
Anak kampuang lai mangalok
Katiko jadi anak daro

Marapulai jo anak daro

Bacubik cubikan dalam tandu
Indak bamalu kuduonyo
Urang nan indak galak lai

Mancaliakkan kurenahnyo
Urang alah mambuang muko
Rajo-rajo nan dijapuik
Datang surang duo urang
Wakatu adaik kawin sajo
Dibawonyo anak cucunyo
Nak rami juo urang makan

Sajak baralek sampai kini
Iduik urang batambah payah
Dek paneh batambah garang
Padi indak amuah tumbuah
Kok tumbuah indak babuah
Rakyat banyak nan lah lari

Manolah dubalang Sutan Diateh
Tolong imbaukan Mayang Taurai
Taragak ambo indak tatanggaung
Dek itu ambo kamari

Ampun Tuanku Pamato Intan
Puti alah mah lari
Wakatu alek inyo lari
Dibawonyo Puti Sari Intan
Antah kamano inyo pai
Indak ado urang nan mancari

Diam diam itu garan
Ambo suruah dubalang mudo
Untuak mancari Tuanku Puti
Katauan dek Puti Bongsu
Ambo pulo diberangi

Manangih tampak Pamato Intan
Maliek si Bongsu tangah laman

Masuak sajo inyo kalaman
Indak amuah inyo dilarang

Mungkin niatnya ingin mati
Mandakek inyo ka si Bongsu
Mano rangkayo Puti Bongsu Urai
Lah kayo gadang Puti kini
Ambo datang mamintak padi
Mamintak padi sakatidiang
Untuak dimakan sabulan duo

Mandanga kato rang nan datang
Takajuik garan Bongsu Urai
Tampak tabayang di mukonyo
Inyo tau di urang itu
Bakato inyo maso itu

Manolah kau urang datang
Usah maribuk kau siko
Bagageh juo kau pai
Kok tau laki den beko
Dicancangnya kau jadi bubua

Dek kareh suaro Bongsu Urai
Tadanga kalabuah gadang
Lah banyak urang mandakek
Nilam Cayo lah sato pulo.

Manjawek sanan Pamato Intan
Ambo datang mamintak padi
Ambo ko urang mularaik
Patuik mamintak padu rajo
Mangapo ambo kan dicancang

Usah kau mangecek juo
Ambo tau siapo kau
Bagageh kau pai kini
Indak ado padi untuak kau”

”Kok padi indak mah buliah
Bari ambo nasi sapiriang
Lah duo hari indak makan
Kan ubek lapa sajo jadi”

”Mano kalian dayang-dayang
Ambiakkan karak babiak
Masuakkan dalam tampuruang
Bari makan anjiang nangko
Manyalak sajo nyo disiko”

Bakato dayang maso itu
Ampun ambo Tuanku Puti
Nasi elok lai ado
Mangapo karak babiak
Diagiah padu urang tuo”

Usah ambo dibantah pulo
Lakeh ambiak karak babiak
Inyo itu bukannya urang
Anjiang kurok indak bajantuang
Usah dibari nasi elok”

Manangih Puti Pamato Intan
Mano nak kanduang Bongsu Urai
Anjiang ko malaiakan kau
Aia susunyo kau minum
Inyo nan manggadangkan kau
Sampai manjadi Puti rancak
Budi ambo padu kau
Jo karak babiak kau baleh”

”Mamakiak garan Puti Bongsu
Pai kau anjiang gadang
Usah manggonggong juo siko
Indak ado budi kau padu denai
Indak ado nan kan den baleh
Lamak lalok kau jo laki kau

Tapancua denai kalua
Disambuik dek dayang dayang
Inyo garan manggadangkan denai
Bakirok kau dari siko
Usah kau mandakek juo.
Ambo jagokan laki ambo
Nak dipangganyo lihia kau”

Jagokan malah kini nangko
Itu di ambo nan ka tuju
Buliah sanang iduik kau
Kalian bunuah kami sadonyo
Nak sanang kau surang tingga.

Manolah dayang urang baiak
Bawo kamari karak babiak
Nak buliah ambo makan abih
Sudah itu ambo kan mati”

Diambiaknyo karak di tampuruang
Dibawo duduak kateh batu
Dimakannyo susuok duo suok
Ditadahkannyo tangan kalangik
Tagak inyo elok-elok
Bakato inyo kareh-kareh
Lantang suaro bak sipongang

Manolah langik nan batuah
Manolah bumi nan sakti
Turunkan juo kutuak engkau
Kapado anak nan durhako
Ambo ~~usmpahi~~ inyo kini
Mato hari manjadi saksi”

Alun abih inyo bakato
Datang garan patuih tungga
Manembak rangkiang padi
Teraso gampo kuaik bana

Dalam maso saketek bana
 Tampak luluih rangkiang ciek
Patuih kini batubi tubi
 Gampo mangguncang sakarehnyo
Nan lain manuruik pulo
 Habih luluih rangkiang padi
Luluih tajun katujuahnyo

Larilah urang kasadonyo
 Si Bongsu mangaja andehnyo
Tadanga nyariang pakiaknyo
"O, andeh ampuni ambo
O, andeh ampuni ambo
Andeh andeeeeeeeeeh . . ."
 Datang lakinyo manangkoknyo
Dilarikannyo naiak rumah

Lah turun urang kasadonyo
 Inyo baduo tingga di ateh
Bagarak pulo rumah gadang
 Sakajap mato inyo taban
Tajun jauah kadalam bumi

Dari jauah tadanga juo
 Andeh andeh si Bongsu Urai
Indak ado urang nan manangih
 Salain dari Pamato Intan
Diciumnyo cucunyo Majo Intan
 Dipaluak inyo dek Nilam Cayo
Indak inyo bakato kato
 Manangih sajo inyo taruih

Mandanga patuih **manggaga bumi**
 Bunyi nan jatuah kareh pulo
Dek gampo mambuek urang jatuah
 Kalua sadonyo dari rumah
Tukuik nan bukan alang alang
 Larinyo manuju ustano

Nak balinduang ka tuah rajo
Ramilah urang bakuliliang
Iyo kaliliang ustano tu

Sampai patang tampak tu rami
Indak ado urang nak pulang
Tagak tuanku Manti Tuo
Di ateh tanggo rumah gadang
Rumah gadang Puti Nilam Cayo

”Manolah sanak kasadonyo
Manti pangulu datuak datuak
Pandeka dubalang di nagari
Sarato rakyat’ tuo mudo
Dangakan malah kato ambo

Tampaknyo kareh kutuak langik
Gadang tu garan berang bumi
Diluluanyo rangkiang tujuah
Ditalannya rumah gadang kito
Tapi ndak usah kito takuik
Nan salah mambayia utang
Dek talintang mangko patah
Jokok tabujua tantu lalu

Kito lah samo tau juo
Kurenah Tuanku Rajo kito
Nan bagala **Mangkuto Ameh**
Disabuik sajo Angek Garang
Itu gala nan sasuai
Gala dibari urang banyak

Dek parangai inyo juo
Nagari kito kuruih kariang
Indak dapek ditanami
Indak amuah kayu babuah
Bak kabau batino kakurangan susu
Rakyat’ apo to lai

Nan lari, lari juo

Nan mati satiok hari
Indak satangah lai nan tingga
Nan tingga sakik kasadonyo
Nan makan kanyang sajo
Itu hanyo nan bagarak

Sungguah baitu kan karehnyo

Alun turun kutuak langik
Nan tajadi kini nangko
Lah berang bana bumi langik
Lah sampai kini kapuncaknyo
Sagalo nan buruak cako itu
Ditambah pulo jo nan baru
Iyo durako dang bininyo
Iyolah Puti Bongsu Urai

Durako yo taradok andehnyo

Andehnyo Puti Pamato Intan
Urang nan samo kito tau
Haluih manih budi basonyo
Inyo tahan mandarito
Hiduik di dalam rimbo rayo
Dek sayang di anak Bongsu
Iko balasan didapeknyo

Nyo mintak nasi sapiriang

Karak babiak nan diagiah
Diagiah dalam tampuruang
Inyo disabuik anjiang kurok
Diusia kalua laman ustano

Iko pangaja ka nan mudo

Sayang ayah sarato bundo
Usah itu diabaikan
Kok indak dapek mambaleh
Jago sajo malah hatinyo
Jan inyo berang di kito

Kok inyo sajo tu nan salah
Inyo sajo nankan dikutuak
Mungkin mati tagalimpang
Atau manjadi patuang batu

Tapi tampak kini nangko
Iyo nagari mah nan salah
Ulah kurenah dang rajonyo
Padi urang diambiak sajo
Jariah urang indak diragoi
Dimasuakkan dalam rangkiang awak
Dek itu rangkiang luluih
Sabijo padi indak tingga

Ustano tampeknyo babuek
Karajo nan dibanci urang
Malangga adaik niniak muyang
Iyo Prapatiah Nan Sabatang
Sarato Datuak Katumanguungan
Tantu mandapek kutuak pulo
Dari arwah urang nan baduo

Sagalo nan tajadi ko
Indak usah kito takuik
Jadi pangaja tu mah sanak
Pangaja untuak kito sadonyo
Kok siapo antaro kito

Nan sakongkol jo rajo ko
Bapikia malah sanak kini
Untuang ndak sato luluih pulo
Tapi kok ndak nak maubah
Parangai salamo nangko
Kutuak langik bukan samacam
Sumpah bumi bukan doh ciek
Nan salah kan patah juo
Nan bungkuak dimakan saruang

Manolah manti jo pangulu
Sarato dubalang jo pandeka
Talabiah datuak Mangku Bumi
Ambo ko bukan to rajo
Tapi nan tuo kini nangko
Mamintak ambo bakeh nan banyak
Barapek kito barisuak
Barundiang kito nan tingga ko

Tabuah larangan indak ado lai
Aguang gadang indak ado pulo
Kito sampai manyampaikan
Ambo mananti di tampek iko
Sapanggalan mato hari naiak

Sabuah lai itu garan
Mamintak ambo kini nangko
Mamak suruah dubalang lai
Iyo pai ka Koto Tuo
Maagiah tau pangulunyo
Sarato urang gadang di nagari
Mintak datang nyo kamari
Kito barundiang samo-samo

Lah pulang urang nan banyak
Turunlah hujan salabeknyo
Mandarun bunyi galoro
Di lubang tampek ustano luluih
Tinggalah lubang nan tangango

XIII. SUTAN MAULANO KAWIN DENGAN MAYANG TAURAI

Lah tanang tampak Pamato Intan

 Lah gak kariang aia matonyo

Kini batanyo inyo garan

 Pado urang Nilam Cayo

”Mano kakak Nilam Cayo

 Bari bana ambo batanyo

Adokoh kakak tau pandai

 Tantang si Upiak anak denai

Iyo si Upiak Mayang Taurai

Batigo anak dilahiakan

 Samo rancak katigonyo

Bak gunuang inyo diharok

 Kini manjadi buah ratok

Padiah paruik ambo mamikiakan

 Rasokan putuih jantuang hati

Balimo baranak kami garan

 Hiduik tanang aman tantram

Sanyum jo galak tiok hari

 Indak ado bakaberangan

Kok salah sabuik manyabuik

 Indak ado jantiak jo tampa

Turuik manuruik kalimonyo

 Hiduik lalap bakasayangan

Kiniko ambo tingga surang

 Kaateh indak bapucuak

Kabawah indak baurek

 Di tangah indak batuneh

Bak tunggu tagolek tangah padang”

”Manolah adiak Pamato Intan

 Dangakan malah kato kakak

Indak adiak tingga surang

 Kaateh lai mah bapucuak

Mangko baitu kato ambo
Sanangkan malah hati adiak
Si Mayang lai iduik juo
Io anaknya si Sari Intan
Majo Intan ado mah pulo
Itu di ateh anjuang berak

Tantang Upiak Mayang Taurai
Di maso urang baralek
Baralek untoak Bongsu Urai
Kami ndak sato di alek tu
Sabab indak tu satuju
Dilarang adaik jo limbago

Datang garan Mayang kamari
Manangih marameh paruik
Maliek laku kak rajonyo
Sarato adiaknya Bongsu Urai
Manyabuik inyo handak lari
Handak lari mambunuah diri
Sarato anaknya Sari Intan

Ambo bujuak inyo di siko
Ambo katokan kainyo garan
Dek adiak lai iduik juo
Disabuik sajo tu mah mati
Usah adiak dicari lai
Iyo dek adiak gagah ambo
Nan banamo si Angek Garang

Maliek laku adiak kanduang
Kurenahnyo nan manungkahak
Ibolah ambo ka si Mayang
Saraso kakak turuik pulo
Basalah bakeh pajo ko
Dek ambo nan mambujuaknyo
Amuah kawin jo adiak ambo

Ambo katokan padō si Mayang
Anak ambo lai iduik juo
Nan banamo Sutan Maulano
Ambo baru tau garan
Baso urangko bamainan
Ambo tau dari adiak ambo
Adiak ambo di Koto Anau
Nan banamo Datuak Majo Lelo

Mandanga namo Sutan Maulano
Sananglah hati Mayang Taurai
Inyo galak jo aia mato
"Dimano inyo kini kakak
Antakan ambo ka inyo
Untuak pambasuh basuah piriang
Inyo tantu lah ado bini
Salaruik salamo iko
Indak mungkin inyo bujang juo

Ambo katokan ka si Mayang
Iyo inyo alah babini
Kapado anak adiak kakak
Tapi rang ko sadonyo tau
Hati Maulano ka si Mayang
Maulano sandiri mangatokan

Ambo mintak ka mamak ambo
Iyo Sutan Mangkuto Ameh
Nan tingga di Koto Tuo
Untuak maanta Mayang Taurai
Sarato Upiak Sari Intan

Inyo ditarimo elok urang
Iyolah urang Koto Anau
Dikawinkan jo alek gadang
Kami ko juo pai baralek
Disabuik dek adiak ambo
Kapado urang nan di siko

Inyo baralek mangawinkan anak

Nan sakarang kini nangko

Tingga sarumah Mayang Taurai

Iyo jo Puti Cinto Manih

Bini Tuo dek Sutan Maulano

Rumahnyo lai gadang juo

Baanjuang juo suok kida

Si Mayang di anjuang suok

Cinto Manih di anjuang kida

Baitu diatua dek ayahnyo

Iyolah Sutan Majo Lelo

”Manolah kakak Nilam Cayo

Tolong malah kakak suruah

Urang maanta ambo kasinan

Indak tatahan rindu hati

Kapado anak jo cucu tu

”Mangapo adiak pai ka sinan

Inyo tu bana disuruah japuik

Amak pulang inyo kamari

Siapo nan kan jadi rajo

Salain si Buyuang anak ambo

Kuaso ambo kini ko adiak

Iyo nagari Koto Lamo

Indak ado urang nan patuik

Salain dari anak ambo

Dek mamak Sutan Mangkuto Ameh

Sadang daulu indak nyo amuah

Kok kunun kini inyo lah tuo

Bapak adiak mamak dek ambo

Bapak ambo mamak dek adiak

Lah patuik bana itu kini

Si Mayang jadi Andeh Suri

Sanangkan malah hati adiak

Indak ado urang nan kuaso
Iyo manyabuik nan baiko
Salain ambo saurang ko
Kamanakan Datuak Mangkuto Ameh
Rajo gadang turun tamurun
Iyo di Koto Lamo nangko

Barisuak harinyo itu garan
Rami urang di laman Nilam Cayo
Urang barapek tumah garan
Sagalo manti jo pangulu
Dari nagari nan duo tu
Alah bakampua kasadonyo
Datuak Mangku mamimpin rapek
Dek inyo pangganti rajo
Kok rajo indak mah ado

Diputuihkan dalam rapek tu
Untuak manjapuik sutan Maulano
Sarato Puti Mayang Taurai
Nan Tingga di Koto Anau

Takajuik garan rang nan banyak
Mandanga inyo iduik juo
Gadanglah hati urang nan banyak
Rakyat sayang tu mah kini
Iyo kapado urang Sutan Maulano

Bakato surang nan tuonyo
"Kito mandapek maro gadang
Ustano kito mah nan luluih
Rajo kito dibawonyo
Tapi sunguahpun baitu
Mungkin pitolong dari langik
Kito nan susah salamo ko
Nagari kariang padi ndak tumbuhan
Padi nan ado saketek-saketek
Pindah pulo ka rangkiang rajo

Tantang Tuanku Sutan Maulano
Kito lah samo tau juo
Inyo **bagaua** jo kito ko
Macam urang badunsanak
Nan tuo dimuliakannyo
Nan ketek disayanginyo
Samo gadang sagan manyagan

Kok urang ndak tau dinyo
Indak manyangko itu garan
Inyo tu kamanakan rajo
Urang nan patuik mamarentah
Jiko rajo ndak ado lai
Atau rajo bahalangan

Bakato Datuak Mangku Bumi
Dek itu inyo kito japuik
Iyo urang nan ka pai
Bukan lah itu urang lain
Tapi ayahnyo tu sandiri
Mamak kito Datuak Manti Tuoe
Sarato dubalang tuo
Pandeka rajo sato pulo

Agak baranam urang pai
Maracak kudo sikua surang
Buliah tabawo kasadonyo
Bininyo ado baduo
Dek anaknyo iyo duo pulo

Elok juo ambo katokan
Dek bininyo mangko baduo
Andeh Suri kito nan lamo
Nan lari dari nagariko
Iyo kainyo Puti lari
Inyo bakawan dari ketek

Kito lah samo tau juo

Baapo elok urang iko
Salamo inyo di siko
Iyo nagari sadang sansaro
Tapi inyo bausaho
Mangurangi sakik iduik rakyat'
Rangkiang nan aman indak barisi
Padi abih dibagikan
Iyo kapado urang bangsaik

Kok ado sakik ngilu paniang
Kito ado sakik ngilu paniang
Talabiah kito nan tuoko
Andeh Suri lai amuah datang
Mambawo makanan nan katuju

Sadangkan jo rajo nan daulu
Lai baitu dibueknyo
Kunun kok lai nan kan datang
Urang nan elok samo elok

Tahanti tuak Mangku babicaro
Maliek urang baru datang
Batigo urang ateh kudo
Kudo sairiang katigonyo
Urang bapakaian datuak datuak

Takajuik sangaik Datuak Mangku
Baitu pulo nan lain tu
Urang batigo alah mati
Surang dibunuah Angek Garang
Nan baduo dibunuah parampok

Turunlah inyo dari tanggo
Balari manyongsong urang nan datang
Nan lain manuruik pulo
Padusi nan tagak di muko tingkok
Lah turun pulo ka halaman

Tapakiak garan Pamato Intan

Tarauang inyo kareh-kareh
Balarî dalam urang banyak
Di mano inyo indak kan takajuik
Urang mati nan lah iduik
Urang nan lah diratokinyo

Katapi urang nan banyak tu
Maliek inyo balari
Urang di kudo turun pulo
Nan di tangah manyongsong garan
Iyo manyongsong Pamato Intan
Dipaluak dicium ubun-ubunnyo

Jo nan lain inyo basalam
Basalam jo sanyum manih
Indak inyo bakato kato
Baitu pulo nan baduo
Sampai nyo **naiak kateh rumah**
Di turuikkan dek Datuak Mangku
Sarato Datuak Manti Tuo
Nan lain tingga di halaman

Ado sabanta antaronyo
Urang nan batigo tu
Lah tagak inyo di tanggo
Kida suqknyo Datuak Mangku
Sarato Datuak manti Tuo
Urang gadang di Koto Tuo
Iyo duo taun nan lalu

Bakato Tuanku Sati
Manolah sanak nan banyak ko
Agak takajuik cako garan
Maliek kami ko datang
Sabab manyangko kami ko mati
Urang mati nan iduik baliak
Kami ko lai iduik juo
Kami takuik kan baparang

Bukan kami takuik kan mati
Tapi takuik rakyat susah
Dek itu kami maandok
Maandok di rimbo rayo
Di tampek ambo batarak

Kapatang kami mandanga
Koto Lamo ditimpo maro
Tadi ko pagi-pagi buto
Bagageh kami kamari
Handak maliek itu garan
Apo bana nan tajadi

Alah tadanga sabanta ko
Baapo duduk pakaronyo
Barisuak kami barangkek
Barangkek ka Koto Anau
Manjapuik urang nan kan diangkek
Iyo manjadi rajo kito
Nan banamo Sutan Maulano

Iyo baranam kami kan pai
Batigo tu komah garan
Batigo pulo dari siko
Iyo datuak kapalo suku
Manti Tuo Koto Lamo
Sarato pandeka jo dubalang

XIV SUTAN MAULANO PULANG KA KAMPUANG

Tasabuik hari barisuaknyo
 Barangkek urang nan baranam
Manunggang kudo sikua surang
 Amak lakeh inyo di jalan
Duo hari sasudah itu
 Lah tibo urang nan dijapuik
Kudo batambah anam lai
 Dek urang banyak maanta

Duo hari pulo kamudian
 Tampaklah Sutan Maulano
Inyo tagak di ateh tanggo
 Iyolah tanggo rumah andehnyo
Urang banyak tangah halaman
 Mandanga inyo babarito

"Manolah niniak mamak ambo
 Sarato ibu bapak sadonyo
Sanak saudaro sadonyo tuo mudo
 Nan hiduik di nagari nangko
Iyo nagari Koto Lamo
 Sarato nagari Koto Tuo
Sananglah kini hati ambo
 Dapek tagak di tanggo nangko
Maliek roman kasadonyo

Bataun ambo indak pulang
 Hiduik mularaik di rantau urang
Dapek pagi dimakan patang
 Dapek patang dimakan pagi
Indak dek banci padu kampuang
 Bukan ambo indak taragak
Ambo mainda mah daulu

Indak lain indak doh bukan

Nan jadi sabab itu sanak
Balain paham ambo garan
Iyo jo mamak kanduang ambo
Ambo lai tau juo
Kok ambo andak malawan
Managakkan kabanaran

Lai mah banyak itu garan
Nan manyabalah bakeh ambo
Tapi ambo indak suko
Maliek darah nan tatumpah
Mancaliak urang batangisan
Diadu kareh jo kareh
Tantu api nan kan manyalo
Dek itu ambo nanti sajo
Langik jo bumi manyudahi

Nan sakarang kini kaateh
Kok niniak mamak, ibu bapo
Sarato sanak nan banyak ko
Iyo kok suko padu ambo
Untuak mamimpin nagari ko
Ambo tarimo itu garan
Kok indak ambo manyarah
Saketek ambo indakkan berang
Bia ambo manuruik alua
Nan patuik mamacik tampuak
Tapi nan tuo banyak lai
Nan labiah bapangalaman
Manjawek urang banyak tu
Indak lain nan disabuiknyo
Iyo suko sukoooooooo sajo
Hiruak pikuak bunyi suaro
Inyo mamakiak sakarehnyo
Raso kan taban pulo tanah
Nan dirantak urang banyak tu
Dek sanang suko di hatinyo

”Kok lai suko kasadonyo
Barapek malah niniak mamak
 Dalam nagari nan duoko
Pabilo ambo dinobaik kan
 Baapo caro-caronyo
Tantu nan tuo nan kan tau
 Mamintak ambo kini nangko
Kapado mamak kanduang ambo
 Iyo Rajo Tuanku Sati
Iyolah Rajo Koto Tuo
 Untuak mamimpin rapek-rapek
Sabalun ambo dinobaikkan

Katangah tampak Tuanku Sati
 Iyolah Rajo Koto Tuo
Bakato inyo maso itu
 ”Manolah anak kanduang ambo
Iyolah Sutan Maulano
 Sarato Mamak jo sanak
Nan banyakko
 Dangakan pulo kato ambo
Amboko Rajo Koto Tuo
 Tapi Rajo nan lah kalah
Iyo rajo nan lah mati

Tantang nagari nan duo ko
 Alah basatu tu mah garan
Baapo caro basatunya
 Usah lai kito sabuik juo
Nan sakarang kini nangko
 Jikok satuju dek nan banyak
Talabiah urang Koto Tuo
Pado pikiran hati ambo
 Elok kito basatu taruuh ratuuh
Di bawah ciek payuang kuniang
 Nan dipacik dek Mangkuto

Aguang di sinan lah tabaka

Baitu tabuah larangannya
Nan di siko baitu pulo
Lah luluih basamo ustanyo

Kito paralu karajo barek
Karajo sakuaik tulang
Mandirikan ustano gadang
Sarato rangkiang tujuah barih
Baitu pulo balairongnyo
Elok kito basatu sajo
Di buek sabuah Ustano
Di bateh nagari nan duoko
Ilang nagari Koto Lamo
Habih nagari Koto Tuo
Nagari baru kito tagakkan
Kito namoi Rangkiang luluih

Mangko rangkiang di kamukokan
Bukan ustano, bukan rajonyo
Dek rangkiang nan daulu tajun
Inyo bana nan jolong luluih
Dek isinyo padi takutuak
Indak sarela nan mambari
Padi itu nak lari garan
Babaliak manjadi tanah
Basamo jo **karak oabiak**
Nan dimakan Pamato Intan
Nan tacampak pulo katanah
Tabuang basamo tampuruangnyo

Tapakua rajo maso itu
Indak dapek bakato lai
Jauah kalangik pangananyo
Baitu pulo urang banyak

Ado sabanta antaronyo
Bakato sanan Sutan Maulano
Hingga iko rapek kito

Pulang dunsanak malah daulu
Isuak nak kami imbau pulo
 Bia kami mupakaik daulu
Urang gadang di nagari ko
 Koto Lamo jo Koto Tuo

Kok lah dapek kato sapakaik
 Iyo dek urang tuo-tuo
Kito barundiang pulo lai
Iyo di laman rumah nangko
 Kok sanak lai manarimo
Kito lalukan mah karajo
 Alah koh **sanang** hati sanak

Duo hari pulo sudah itu
 Barundiang urang di ustano
Ustano iyo samantaro
 Rumah gadangnya Nilam Cayo
Rapek dipimpin Tuanku Sati
 Dek inyo memang nan patuik
Diputuihkan dalam rapektu
 Nagari nan duo disatukan
Dibari namo Rangkiang Luluih
 Ustano **dibuek** duo buah
Nan ciek Ustano Gadang
 Di bateh kaduo Koto nan Lamo
Nan ciek di Koto Tuo Lamo
 Di tampek ustano nan daulu

Ustano gadang nan di bateh
 Kan tampek tingga rajo baru
Nan bagala Datuak Mangkuto Ameh
 Baduo jo Puti Mayang Taurai
Nan kan manjadi Andeh Suri

Ustano ketek di Koto Tuo
 Kan tampek tingga itu garan
Rajo tuo Tuanku Sati

Basamo jo Andeh Pamato Intan
Batigo jo Buyuang Majo Intan

Rumah gadang nan kini nangko
Di sabuik Ustano Lamo
Tampek tingga Puti Nilam Cayo
Jo **Datuak Kapalo suku**
Manti Tuø Koto Lamo
Sarato Puti Cinto Manih
Bini Rajo nan baru ko

Koto Lamo disabuik Kampuang Lamo
Koto Tuo disabuik kampuang Tuo
Buliah barubah kasadonyo
Nan lamo dilupokan malah
Nan baru dibangun baliak

Ustano gadang itu garan
Kan dibari rangkiang tujuah buah
Utano ketek Ustano Lamo
Tigo buah rangkiangnya
Ditatapkkan aturan lamo
Untuak rang rumah ciek rangkiang
Iyolah si Tinjau Lauik
Salabiahnya untuak rakyat
Untuak rang nan mamintak
Untuak rang nan manyalang

Di kampuang lamo kampuang tuo
Diadokan juo mah balerong
Balerong ketek dinamokan
Tampek datuak Mangku basidang
Ambo hanyo marampuangan
Nan lah di tantukan suaro banyak

Tabuah gadang aguang gadang
Iyo di Ustano Gadang
Di Ustano Ketek nanti

Di adokan juo tabuah ketek
Tapi iyo tabuah larangan
 Bukan batuang pambari tau
Ado maliang ado kabakaran
 Tapi tabuah dari kulik jawi
Nan dapek tadanga jauah

Bakato sanan Sutan Maulano
 Kok ambo kan **dinobaikkan**
Usah kito baralek gadang
 Cukuik sakali makan sajo
Nagari sadang **bangsaik** kini
 Rakyat kakurangan pulo

Ambo mamintak bakeh ayah
 Sarato ayah Manti Tuo
Manti Tuo Koto Tuo
Usah ayah keduonyo
 Baketek ati bakeh ambo
Dek ambo indak amuah
 Iyo di sambah ayah kanduang
Baitu ayah Koto Tuo
 Kito cari dari nan banyak
Pangganti ayah nan baduo
 Urangko di asam basa pulo
Wakatu ambo di nobai'kan

Ayah ambo rajo nan lamo
 Sarato ayah nan baduo
Ambo mintak manolong ambo
 Iyo dalam pamarentahan
Kok teleng mintak datakan
 Kok bungkuak mintak luruihkan
Kok tadorong kasuok kida
 Mintak ayah katangahkan
Baitu pulo andeh kanduang ambo
Kok tasangkuik ambo garan

Iyo di unak sarato duri
Kok tataruang ambo isuak
 Kok indak data jalan ambo
Ka siapo ambo kan mangadu
 Salain ayah nan batigo

Baitu pulo andeh kanduang ambo
 Sarato Andeh Mayang Taurai
Tolong pulo malah si Mayang
 Iyo manjadi Andeh Suri
Kito alah samo maliek
 Rangkiang kito alah luluih
Dek ulah Andeh Surinyo
 Padi diambiak dari rang banyak
Rakyat mamintak indak dibari
 Urang manyalang indak buliah
Padi kan disuruah bakapang
 Iyo busuak dalam rangkiang
Kasudahannyo bumi berang
 Rangkiang jo padi diluluanyo

Bakato sinan Manti Tuo
 Iyo urang kapalo suku
Manti Tuo di Koto Lamo
 Ndak taragak tu dek ambo
Nak duduak juo jadi manti
Bakarajo siang malam
 Dek ambo alah mah tuo
 Daulu ambo amuah juo
Dimintak dek urang banyak
 Dek rajo kito maso itu
Indak inyo namuah dibanari
 Iyo dek urang banyak nangko”

Manti Tuo dari Koto Tuo
 Bakato pulo maso itu
”Mangapo ambo kan berang
 Ambo iyo lah tuo juo

Lah duo taun ndak karajo
Lah sanang caro iko
Pai batarak tiok bulan
Iyo jo Datuak Tuanku
Sarato Datuak Kapalo Suku”

Datuak Mangku Koto Tuo
Nan lah lamo pulo ndak karajo
Amboko iyo alun tuo bana
Tapi mintak baranti juo
Ambo ingin handak basawah
Iyo basawah jo baladang
Salamo ambo ndak di rumah
Sawah liek ladanglah samak

Indak ado nan mauruihnyo
Ambo ajukan adiak ambo
Iyo untuak ganti ambo
Urangnyo iyo mudo bana
Tapi amuah bakarajo
Lah biaso inyo tu garan
Manolong-nolong dalam ustano
Bagala Sutan Pamenan

Bakato pulo surang lai
Pangulu dari Koto Tuo
”Kamiko urang Koto Tuo
Satuju sajo itu garan
Jo sagalo kaputusan
Tapi hanyo akan sabuah
Indak satuju kami garan
Kito nan tidak kan baralek
Hanyo kanduri sakali makan

Kami mamintak ka nan banyak
Mintak adokan alek gadang
Manuruik adaik rajo-rajo
Dijapuik rajo bakuliliang

Sarato rajo Pagaruyuang
Baliau tu mah nan patuik
Malatakkan mangkuto ameh
Di ateh kapalo rajo kito
Iyo Tuanku Mangkuto Ameh

Tujuah baru rangkiang luluih
Tujuah pulo nan tabaka
Alun kan bansaik nagari ko
Talabiah nagari Koto Tuo

Manuruik kato nenek ambo
Mangko nagari ka batuah
Hujan turun padi manjadi
Batang kayu babuah pulo
Dek alek acok diadokan
Urang banyak basuko hati

Taranak mangko kan kambang
Iyonyo acok disambaliah
Disambaliah di bawah payuang kuniang
Untuak dimakan urang banyak

Bakato saurang lai
Iyo urang Koto Tuo juo
Itu bana nan kami mintak
Dek kito bukan manobaikkan sajo
Iyo rajo kito nan baru
Kito ko kini bagadang hati
Urang mati lah iduik baliak
Bukan surang bukan baduo
Limo urang itu garan

Kami maratok siang malam
Indak ado barajo lai
Andeh Suri lah hilang pulo
Manciok kami bak ayam
Antah kasiapo kan mangadu

Batambah pulo itu garan
Iyo urang tuo-tuo kami
Manti Tuo jo Mangku Bumi
Disabuik alah mati juo

Tuanku Sutan Maulano
Lah lamo pulo disabuik mati
Indak koh kito tarimo suko
Kapado bumi jo langik
Nan maubah sagalo latak
Nan di ujuang alah ka pangka
Nan di tapi alah ka tangah
Bapikia kito kini nangko

Nan takana di hati ambo
Tujuah hari kito baralek
Alun kan abih kabau kito
Nan partamo tujuah ikua
Nan kaduo cukuik anam sajo
Nan katigo iyo limo ikua
Nan kaempek iyo ampek pulo
Kalimo iyo tigo sajo
Kaanam duo ikua pulo
Katujuah cukuik lah ciek
Hanyo duo puluhan lapan

Taraso dek ambo surang
Pangulu sajo nan maisi
Ditambah urang kayo-kayo
Kan balabiah itu garan

Kok bareh nan ka dimakan
Indak kito kan mamintak
Diadokan sajo itu garan
Talabiah urang Koto Tuo
Lah lamo indak baralek
Alah labiah sapuluah taun
Sajak kawinnyo Puti Pinang Masak

Tadiam urang kasadonyo
Ado sabanta antaronyo
Manjawek saurang urang pangka
Dari tampek duduak andeh-andeh
Manolah adiak Tuanku Sati
Pamimpin rapek nan gadangko
Ambo iyo nak mangecek pulo
Nan taraso di hati ambo

Cako disabuik tu mah garan
Dek nagari Koto Lamo
Nagari bansaik itu kini
Tapi ambo indak sato bansaik
Rangkiang tigo di halaman
Panuah barisi katigonyo
Kok nyo kabau sapuluah duo
Ado garan di kandang ambo
Baitu juo jawi jo kambiang
Parak karambia ado pulo
Dek itu ambo mamintak
Iyo baralek tujuah hari

Dek si Buyuang nan luluih ko
Dinobaikan manjadi rajo
Baralek ampek puluah hari
Habih padi jo taranak
Tapi ameh jo perak
Sarato intan jo dalimo
Indak usak saketek juo
Turun sadonyo bakeh ambo
Inyo mandapek karih jo padang
Nan lain ambo nan manyimpan
Mangkuto Ameh pandiang ameh
Dulang carano dari ameh
Kalua dari rumah iko
Kok inyo paralu mamakainyo
Baitu juo bungka jalo

Ameh tulen itu garan
Buliah dijua ka sadonyo
Kok pitih indak sadang juo

Sabagai pulo itu sanak
Anak ambo iyo surang **ko**
Indak bakakak ndak baradiak
Duo kali baralek kawin
Bukan doh ambo nan baralek
Kok kini kito ndak baralek

Hanyo makan sakali sajo
Bak urang turun kasawah
Atau urang sudah manyabik
Indak kan ado itu garan
Ambo baralek saumua hiduik
Ibo garan hati ambo
Kok tajadi nan bak itu

Kok acok bana itu garan
Ambo baralek di ustano
Tapi indak jo hati suko
Urang iyo galak badarai
Ambo lai galak juo
Galak palipua ka urang banyak
Bak paneh manganduang hujan

Bakato pulo pamato Intan
Rumah ambo iyo tabaka
Rangkiang baitu pulo
Tapi kak tuo dek iduik juo
Ameh intan lai di pinggangnyo
Taranak dipiaro urang
Baranak pinak itu kini
Lah sapuluah itu garan
Indak ado urang nan mamakan
Buliah dipakai untuak baralek

Bakato kini tuo rapek

Iyo Rajo Tuanku Sati
Kok baitu bunyi pandapek
 Dari ujuang sampai ka pangka
Ambo tagak malah di sinan
 Mungkin itu nan labiah elok
Rusuah jo risau salamo ko
 Kito sudahi iyo jo alek
Tangih jo ratok nan lah sudah
 Kito ganti jo bunyi rabab
Sarato canang jo talempong

Tagalak urang kasadonyo
 Galak tasangai Sutan Maulano
Jo itu rapek disudahi
 Di tutuik jo minum makan.

XV. ALEK GADANG DI RANGKIANG LULUIH

Sahabih rapek nan cako tu
Mulai urang baase
Managakkan balerong samantaro
Mambali aguang ka Sungai Pua
Sarato sabuah ka Galuah Gandang
Mancari kayu api jo talang
Mambali karambia banyak-banyak
Manumbuak padi samo-samo
Tiok urang ado karajonyo

Tampek ustano nan luluih tu
Dibari bapaga kukuliliang
Iyo bapaga kayu ruyuang
Usah tajatuah paja-paja
Nan nak maliek ka dalamnyo

Dibuek pulo gaba-gaba
Di saluruah labuah rang kan masuak
Masuak nagari Rangkiang Luluih
Balerong jo rumah gadang
Dibari batabia langik-langik
Batirai babanta gadang ketek

Urang di rumah masing-masing
Batabia balangik-langik pulo
Bagaba-gaba di lamannyo
Inyo kan manarimo tamu pulo
Iyo manti samo mantinyo
Pengulu samo pangulunyo
Nan bamalam di Rangkiang Luluih

Sapakan kan baralek
Urang baduduak-duduak
Manantukan lorong surang-surang
Dalam alek itu nanti
Tuanku Sati jadi nan tuonyo

Dijapuik rajo bakuliliang.
Sarato Rajo Pagaruyuang
 Iyo Dasa Ampek Balai
Indak buliah katingalan
 Inyo nan patuik manobaikkan
Tuanku Sati nan manjapuik

Sahari sabalun alek
 Hari mamasak tu namonyo
Dilimaui kabau tujuah ikua
 Diarak di bawah payuang kuniang
Didabiah di tanah lapang
 Tampak bamain layang-layang

Sabalun Datuak Ampiang Basi
 Malatakkan goloknya di lihia kabau
Bapantun malah Mandeh Rubiah

Adolah urang nan basuluah
 Iyo basuluah batang padi
Dikabek jo rantiang cubadak
 Manolah buyuang nan batujuah
Relakan nyawo buyuang pai
 Kan ubek auih urang banyak
Bukan tanti nak sumbarang tanti
 Tanti dari batang kamuniang
Bukan mati sumbarang mati
 Mati di bawah payuang kuniang

Tanti dari batang kamuniang
 Diukia bagai bungo lado
Mati di bawah payuang kuniang
 Dimakan sutan rajo-rajo

Diseraki jo bareh kuniang
 Sarato bungo tujuah ragam
Dikarek limau dek datuak
 Iyolah Datuak Ampiang Basi

Iyolah limau tujuah ragam
Dilimau kapalo katujuahnyo
Sarato golok katujuahnyo
Ditadahkannyao tangan ka langik
Basaru inyo maso itu.

”Manolah langik nan batuah
Sarato bumi nan sati ko
Tarimo darah kabau kami
Indaknyao mati dek sakik
Indak mati taniayo
Bukan mati dek jua bali
Mati mulia tu mah garan
Darahnyao jadi pupuak bumi
Darah paimbau hujan langik
Mak tanaman nak nyo subua
Baitu pulo rumpuik makanan taranak rakyat
Iyo rakyat Rangkiang Luluih
Manolah mambang jo pari
Sarato urang bunian
Mailak malah kalian
Usah diisok darah kabau kami
Usah jadikan kami musuah
Huuuss huuss huuuss
Manyambua inyo tigo kali
Dikilekkan pisau kalangik
Usah manyakik lihia kabau
Kabau didabiah rang batujuah

Katujuah kapalo itu
Disarangkan kapado bumi
Nan maisok ustano jo rangkiang
Usah inyo mintak darah lai
Jangan inyo mintak nyawo lai

Lah sudah itu garan
Urang batanang sampai bisuak
Urang dapua hanyo nan sibuak

Iyo batanak jo manggulai
Untuak urang duo nagari
Sarato urang nan dipajuik

Pagi hari barisuaknyo
Urang bararak ka tapian
Iyo tapian rajo-rajo
Sutan Maulano nan diarak
Inyo bajalan di muko sakali
Di kanannya rajo dari Pagaruyuang
Nan diwakili Basa Ampek Balai
Duo orang inyo nan datang
Di kidanyo Tuanku Nan Sati
Di balakang rang gadang nan batigo

Nan turuik di asam basa
Di kida kanan rang batigo
Iyolah urang rajo-rajo
Di balakang itu pulo
Manti pangulu nan banyak tu
Di tutuik urang mudo-mudo
Di balakang itu pulo garan
Baru padusi babarih-barih
Mambawo talam dulang carano
Barisi limau badak jo kasai
Sarato siriah salangkok nyo
Kumayan putiah paralu pulo

Tapi katapi padusi tu
Urang bagandang barabano
Sarato barabab bakucapi
Canang talempong pai juo
Hiruak-pikuak labuah ka tapian

Alah sampai urang kasadonyo
Katangah malah dukun tuo
Dibakanyo kumayan putiah
Dikarek limau tujuh ragam

Tagak di tangah Sutan Maulano
 Katigo rang gadang kaliliangnyo
Diusoki dukun jo kumayan
 Diliamaui urang kaampeknyo
Dari ubun sampai ka kaki
 Diseraki jo bareh kuniang
Sarato bungo tujuah ragam
 Banalam Mandeh Rubiah

Abih mudonyo Sutan Maulano
 Diiliakan aia katapian
Darah mudo kok pamberang
 Dianyuikkan aia pulo
Muluik kok kaku salamo ko
 Di bawo kailia dek aia ko
Mamintak kami bakeh aia
 Agiah cahayo rajo kami
Agiah pamanih rajo kami
 Mamintak kami padō langik
Turunkan tuan ka rajo kami

Mano bumi nan sati ko
 Bari sati rajo kami
Nak takuik urang jahek
 Bari pakasiah rajo kami
Nak sayang urang kasadonyo
 Bari piganta rajo kami
Nak tunduak urang bawahannya

Mano bulan jo mato hari
 Tarangi jalan rajo kami
Bari pitunjuak inyo garan
 Bari ilimu jo pangaja
Nak nyo manjadi rang jauhari
 Urang nan arih bijaksano

Lah habih malah Mandeh Rubiah
 Dukun tuo mambaco manto

Mano niniak kuaso rimbo
Mano niniak kuaso tanah
Iyo niniak kuaso aia
Rajo kami kan mandi kini
Mandi partamo itu dangai
Bari inyo cahayo tanah
Cahayo rimbo jo aia
Usah inyo digaduah
Dalam iduik sapanjang maso
Usah inyo ditagua sapo
Nan manyababkan inyo sakik
Ilangkan dari nyo angek api.

Sarato sajuak balabiah
Bari tanago ka tubuahnyo
Bari kuek ka tulangnyo
Karajo barek kan dipikua
Nagari duo kan dijunjuang
Baribu-ribu rakyat kan di sandang
Huuusss huuusss huuusss
Pailah nan jahek-jahek
Tinggallah nan elok-elok

Lah sudah pulo itu garan
Rajo dibabari kain saruang
Lah masuak inyo ka dalam
Baitu pulo nan batigo
Disuruah duduak kaampeknyo
Di ateh batu putiah nan data

Tantang Tuanku Paga Ruyuang
Disiram rajo dari kapalc
Disiram jo aia bungo
Surato aia minyak harun
Samarabak bau tapian
Urang baduo nan manyiram
Iyo ayah jo bundonyo

Sudah itu Tuanku Sati
Sarato Puti Pamato Intan
Urang batigo disiram juo

Aia bungo nan balabiah
Diserakkan di ulu tapian
Baru inyo buliah mandi bana
Di bawah pincuran tujuah

Lah sudah pulo itu garan
Inyo dibari pakaian rajo
Salain mangkuto jo sanjato
Diarak pulo inyo pulang

Lah tibo di ateh rumah
Naiak kaateh palaminan
Di bawah tirai langik-langik
Tagak sajo di tangah-tangah
Disuruah tagak di dakeknyo
Iyo Puti Mayang Taurai
Jo rambuik tagerai panjang
Lah tagak inyo elok-elok
Datang Andeh Nilam Cayo
Mambawo mangkuto ameh
Andeh Pamato Intan
Mambawo tangkuluak tanduak

Disarahkan mangkuto ameh
Kapado Basa Ampek Balai
Mawakili Rajo Pagaruyuang
Bakato rajo maso itu
"Denai latakkkan mangkuto ko
Di ateh kapalo Sutan Maulano
Denai angkek inyo ka ateh
Bagala Datuak Mangkuto Ameh

Manjadi Rajo Rankiang Luluih
Mangkuto ko barang batuah

Alah dipakai niniak tuyang
Antah barapo katurunan
Kok inyo kalangkahan
 Jo parangai jo kurenah
Nan indak disukoi urang banyak
 Inyo akan manyumpah
Basamo arwah urang daulu
 Inyo akan mangutuak
Urang nan manujuangnyo

Kok urangnyo lai elok
 Inyo tau dikarajo inyo
Inyo disambah urang banyak
 Bukan mangkuto nan di kapalonyo

Sasudah mangkuto talatak di kapalonyo
 Manyambah inyo maso itu
"Ampunlah ambo Tuanku Pagaruyuang
 Bajanji ambo bakeh Tuanku
Kan manjunjuang mangkuto ko
 Sakuaik kapalo ambo
Sakuaik hati sakuaik tanago
 Kan ambo turuik parentahnyo
Sarupo manuruik parentah Tuanku
 Kan satia ambo ka inyo
Sarupo satia pado Tuanku
 Tuanku jauah dari siko
Inyo manjadi mato-mato
 Maniliak kurenah ambo
Sarato laku parangai ambo
 Kok ambo mungkia kan janji
Jo sangajo jo dikatahui
 Inyo akan mangutuak ambo
Sarato langik jo bumi ko

Lah sudah pulo itu dangai
 Disangguwa rambuik nyo dek si Mayang

Rajo malatakkkan itu garan
Tangkuluak tanduak banang ameh
Tandonyo inyo lah manjadi
Andeh Suri di Rangkiang Luluih

Tapanca tangih Mayang Taurai
Lah duo kali itu garan
Inyo diangkek dek rajo ko
Manjadi Andeh Suri di nagari

Tapi iyo nan kini ko
Taraso garan dijiwanyo
Baban barek nan kan dipikua
Bukan bamain basanda gurau

Iyo jo rajo di ustano
Tantang urang nan maliek
Banyak pulo nan tatangih
Dek banyak bana nan taraso

Nan patuik barubah nan ka datang
Talabiah Andeh Nilam Cayo
Sarato Andeh Pamato Intan

Tantang urang nan batigo
Diagiah pulo nyo basaluak
Saluak Rajo Gumanti
Saluak Datuak Mangku Bumi

Nan baduo dilatakkkan Basa Ampek Balai
Nan surang dek Datuak Mangkuto Ameh

Bajanji pulo inyo garan
Kan manjunjuang saluak nantun
Sabagai lambang karajonyo
Nan kan dijujuang sudah itu

Diagiah inyo bakarib
Untuak panjago diri
Diagiah pulonyo batungkek
Untuak panunjuak jalan

Basumpah pulo inyo garan
Kan manjago kurenahnyo

Kan manjago kurenahnyo
Sarato laku parangsinyo

Lah sudah itu kasadonyo
Barulah urang buliah duduak
Rajo janang mangatangahkan
Iyo hidangan makan siang
Makanlah urang kasadonyo
Lah sudah minum jo makan

Urang bararak kini nangko
Bararak bajalan kaki
Indak buliah pakai kudo
Indak buliah pakai tandu
Langik jo bumi nak maliek
Barapo kuaiknyo rajo baru tu

Nan mulo-mulo didatangi
Iyolah kampuang nan tadakek
Kampuangnyo Datuak Mangku Bumi
Rakyat sinan alah mananti
Di laman rumah nan gadang
Manjujuang juadah dalam bakuak
Sarato aia dalam ciubak
Rajo-rajo naiak ka rumah
Disonsong do siriah di carano
Di ateh rumah disugu juadah
Iyo galamai paniaram
Kareh-kareh jo dakak-dakak
Sarang-balami jo bungo inai
Mayang pinang jo ondeh-ondeh

Urang nan tingga di halaman
Disugu pulo dek rakyat
Jo juadah di bakua tadi
Dibari minum sayak baukia
Dari cibuak nan baukia pulo

Pado hari sahari tu
 Sabuah kampuang tu didatangi
Barisuaknyo ka kampuang lain
 Nan agak jauah biasonyo
Taturuik sagalo kampuang
 Barulah urang kan baranti

Kampuang nan banyakku
 Balomba-lomba biasonyo
Jo gaba-gaba nan di labuah
 Sarato di rumah pangulunyo
Baitu pulo jo juadah
 Nan di laman nan di rumah

Ado pulo itu garan
 Nan mananti jo nasi di hidangan
Sarato nasi nan dibungkuih
Untuak nan tingga tangah laman
 Kampuang lain lain pulo dibueknyo
Sasudah makan juadah
 Katiko maanta pulang
Diirik kabau atau jawi
 Sarato kambiang jo ayam itiak
Manuruik ukuran rakyatnyo
 Katiko rajo nan baruko
Iyo dek Datuak Mangkuto Ameh
 Nan banyak maagiah padi
Sarato taranak kabau jawi
 Iyolah urang Koto Tuo
Di sinan urang nan kayo
 Di sinan banyak ameh intan
Balasan taun ku lamonyo
 Mungkin labiah duo puluah
Padinyo runduak taranaknyo gapuak
Saparintah rajo bijaksano
Malam-malam baralek juo
 Iyo badendang jo manari

Tari silek tari pancak
Adang-adang maadu ayam
Ado juo itu garan
Iyo pandeka basi pandai
Balomba maracak kudo
Sapanjang labuah nan panjang
Jo basuluah buluah mati sajo

Lah abih hari nan katujuah
Manutuik alek urang lai
Makan basamo tangah laman
Rajo-rajo jo pangulu
Sarato pandeka jo dubalang
Makan basamo jo rakyat
Di piriang upiah nan diimeh
Iyo makan baduo-duo
Tapi laki-laki sajo

Padusi-padusi itu garan
Makannyo dalam ustano
Tapi indak buliah itu di piriang
Di upiah di daun pisang

Maniru rakyat nan bansaik-bansaik
Kok indak tabuék di ustano
Inyo makan di balairong
Atau di rumah nan tadakek
Minumnyo iyo di tampuruang
Tapi tampuruang nan bakikih
Saya baukia tu namonyo
Bapucuak rabuang di atehnyo

Tantang Rajo jo Andeh Suri
Bapindah-pindah inyo makan
Sasuok sinan sasuok siko
Talabiah nan tuo-tuo
Didatangi itu garan
Diambiak nasi dari upiahnyo

Andeh Suri si Mayang surang
Tapi inyo makan baduo
Iyo jo Puti Cinto Manih
Alah šabanta inyo makan
Pai pulo kaduonyo
Manyuok nasi urang banyak
Bukan tu puti-puti
Rakyat kampuang didatangi juo
Gadanglah hati urang banyak

Lah sudah minum jo makan
Mangapua siriah kasadonyo
Batuka sapah itu garan
Mangkuto Ameh jo Mayang Taurai
Sudah itu jo Cinto Manih pulo

Nan indak dicaliak salomo ko
Tajadi padu maso itu
Mayang Taurai itu garan
Mamintak sapah Cinto Manih
Sarato maagiahkan sapahnyo
Agak tamali Cinto Manih
Datuak Mangkuto Ameh
Mandoronghyo dari balakang
Sananglah hati urang banyak
Maliek parangai Mayang Taurai
Marandah diri ka madunyo

Sabalun alek disudahi
Bakao sanan Mangkuto Ameh
Manolah ayah Tuanku Sati
Sarato mamak mamak ambo
Andeh ambo nan baduo
Kakak jo adiak rajo-rajo
Nan datang dari kuliliang
Sarato sanak kasadonyo
Dari nagari Rangkiang Luluuh
Tarimo malah sambah ambo

Kalua dari lubuak hati
Tarimo suko ambo garan
 Jo sagalo nan dibuek
Untuk ambo jo si Mayang

Kito mulaimah jo elok
 Sajak mangkuto ambo jujuang
Jo tolong nan banyak kasadonyo
 Elok handaknyo sataruihnyo
Sampai mangkuto ambo latakan
 Indak takao manujuangnya

Mamintak ambo ka nan tuo-tuo
 Mamintak sakali lai
Tolonglah uleh mano nan singkek
 Iyo di karek nan tajulai
Disambuang mano nan patuik
 Salamo ambo mamarentah

Kapado sanak saudaro
 Rajo-rajo nan bakuliliang
Ambo mintak baitu juo
 Sasudah ambo baliak nanti
Dari nagari Paga Ruyuang
 Dari manyambah Rajo kito
Sarato Basa ampek Balai
 Ambo bajanji padu sanak
Kan datang pulo tu batandang
 Iyo agak samalam sajo
Ambo jo Puti Mayang Taurai


usah ambo dinanti-nanti
 Ambo datang bagai dunsanak
Bukan sabagai urang gadang
 Mamakai adai kabasaran

Mukasuik sangajo dalam hati
 Handak pai ka Sungai Pagu

Ka Surian Alahan Panjang
 Ka Talang Pabungo Pubuak Salasiah
Ka Koto Anau ka Sirukan
 Ka Solok ka Silayo
Dimulai dari Supayang.



PN BALAI PUSTAKA — JAKARTA



Perpustakaan
Jenderal K...

899.2

SE

r

11:23

85